

**NATIONAL ASSEMBLY OF
SEYCHELLES**

Wednesday 21st May 2025

The Assembly met at 9am

National Anthem

Moment of Reflection

*Mr Deputy Speaker in the
Chair*

MR DEPUTY SPEAKER

Bonzour tou Manm Onorab. Bonzour tou bann travayer Sekretarya Lasanble, e piblik an zeneral ki pe swiv nou. Nou travay pou sa Merkredi le 21 Me.

Byenveni zot tou e mon le dir en bonzour e byenveni spesyal nou bann envite dan galeri ozordi, se bann etidyan lekol segonder Lekol Belonie ki avek nou - sertenman nou pou ganny sans annan enteraksyon zot pandan *break*.

E mon lapriyer se ki sa i bann zenn adilt ki avek nou ozordi, e ki nou bann deliberasyon ki prensipalman dominan dan bann Mosyon lo *Order Paper* ozordi i kit zot avek bann bon lesan lavi e bon mannyer fer ki nou dwatet fer dan Lasanble. Mersi.

E pou nou kontinyen mon ava demann Madanm Clerk pou pa lo prezantasyon papye. Mersi.

MADAM CLERK

Mersi Mr Speaker. Bonzour Mr Speaker, bonzour tou bann Manm, tou bann *staff* Lasanble, nou bann envite dan galeri e tou dimoun a lekout. Bann papye ki pe ganny prezante se maten se;

S.I.31 of 2025 Physical Planning (Fees) (Amendment) Regulations, 2025

S.I.32 of 2025 Public Enterprises (Amendment of Schedule 1) Regulations, 2025
2024 Annual Report – The Asset Management Unit – Finance Department -Ministry of Finance, National Planning and Trade

Public Enterprise Monitoring Commission - Annual Performance Report 2023.
Mersi Mr Speaker.

MR DEPUTY SPEAKER

Mersi Madanm Clerk. E parey mon'n enform Lasanble, nou travay ozordi *Order Paper* i prensipalman dominan par Mosyon ki annan de lo *Order Paper*.

E premye Mosyon i dan non Onorab Johan Loze, ki Manm Proporsyonnel pou parti *United Seychelles*. Mon ava envit Onorab, pou prezant son Mosyon en dimoun i ava

segonde avan ki nou pas lo prezantasyon Mosyon. Mersi.

HON JOHAN LOZE

Mersi Mr Speaker. Mr Speaker, Mosyon ki devan Lasanble Nasyonal Sesel pe demande ki Gouvernman aktyel ensi ki tou lezot Gouvernman dan le fitir i travay avek lonnekte, senserite, e lentegrite pou sof gard e protez patrimwann Sesel dan son antyerte pou benefis nou bann fitir zenerasyon. Mersi Mr Speaker.

MR DEPUTY SPEAKER

Mersi Onorab. Onorab Vidot.

HON AUDREY VIDOT

Mosyon ganny prezante i ganny segonde Mr Speaker. Bonzour tous.

MR DEPUTY SPEAKER

Mersi Onorab. Donk mon ava envit Onorab Loze, pou fer-

HON AUDREY VIDOT

Mr Speaker, mon ti le zis dir ou mon rezerv mon dwa koze pou en pti pe pli tar, *thank you*.

MR DEPUTY SPEAKER

Sertennman. Mon ava envit loter e prezantater Mosyon pou prezant son largiman prensipal. Mersi.

HON JOHAN LOZE

Mersi Mr Speaker. Mo pli enportan dan sa Mosyon ki mon'n anmenn devan Lasanble ozordi i lonnekte, senserite, e lentegrite.

Mon komans koumsa pou dir ki lentansyon Mosyon se pou annan en refleksyon lo fitir nou pei, pou annan en refleksyon e pou sisit en deba parmi nou pep lo lafason ki zot ti a kontan ganny Gouvernen dan lefitir.

Me non selman lo lafason ki nou pep ti a kontan ganny Gouvernen dan le fitir, me lo nivo zot partisipasyon dan la gouvernans, lo nivo zot partisipasyon dan la demokrasi e lo nivo zot partisipasyon dan sosyete an zeneral li menm.

E sa ki mon swete nou pep ti ava les zot ganny gide avek ganny gide par se zisteman lonnekte, senserite, e lentegrite.

Mr Speaker, nou en zenn nasyon. Nou en zenn pep mon a kapab dir nou annan en listwar forse 250 an par sa ki nou ganny dir ki'n ganny rikorde dan listwar ki nou etidye.

E listwar i montre nou ki nou'n annan en lepase ase enteresan. Nou'n annan en lepase ki sisit divers lemosyon, divers reaksyon. Nou'n annan nou 6enm Lasanble ki'n koz

fortman lo bann fot lepase ki'n kadre li e sible li lo 43 an.

Sa enn Lasanble osi in koz fortman lo sa 43 an, be ki mannyer eski nou koman en pep nou tir leson, nou aprann par nou pase nou aprann par sa long zistwar ki nou annan e nou bouz de lavan.

Kwa ki nou swete demen nou pei i vini? Kwa ki nou anvi vwar koman en pep, koman en nasyon e kan mannyer nou bouz devan partisipasyon ?

Mr Speaker, sa term partisipasyon mon krwar i enn ki nou pa realize son lenportans dan la demokrasi. Pli gran aksyon partisipativ pe vini e sa se eleksyon.

Kot desizyon i ganny pran par sa ki partisipe e non pa par sa ki reste dan lakour. So si ou anvi en lavwa deza ou bezwen partisipe.

Be sa i pli gran partisipasyon me i pa le sel. Nou annan volontarya, nou annan bon vwazinaz. Nou annan partisipasyon dan konservasyon lanvironnman, dan bann diferan desizyon dan lafason ki viv koman en nasyon.

E yer nou'n abord en size sansib ki labi zanfan, e labi zanfan letan mon pe ekout Minis koze yer, mon krwar i swe nou lo sa kote egalman swe Minis e zot Gouvernman ki nou pep i apros sa size avek

en pe plis lonnekte, senserite, e lentegrite.

Parski labi i dan leker sa abizer li, i ganny soutire par sa ki otour li i en problemn sosyeter in vin en kanser san nou sosyete. E lala kot sa bout i lonnekte, lentegrite, e senserite i antre pou nou tou, pou nou tou. Be egalman Mosyon pe koz lo protez patrimwann.

Nou patrimwann nou leritaz be en fot ki nou tant otan tant pou fer se ki nou krwar ou patrimwann i zis la vyeyri, zis bann vye keksoz ki dan en mize bann vye konnesans bann vye fason fer.

De fwa nou, nou kre bann leritaz nou menm nou kre bann patrimwann nou fer nou repete nou kontinyen fer.

Zisteman Minis yer nou'n vwar son *helplessness* la devan ler i pe dir nou i pa konnen, i pa konpran sa labi si nou bann fason si annan bann keksoz dan sosyete.

Mr Speaker, eski nou pe, eski koman en pep nou, nou pe kre en leritaz negativ pou nou lekor, nou pe kre ne patrimwann negativ pou nou lekor.

Eski nou tou koman manm sosyete Seselwa nou kontribye aktivman ouswa par nou silans, oubyen par annan en konversasyon lo serten size ki nou pou ede fer sa bann

keksoz negativ vin parti nou leritaz.

So, sa rezon ki mon anvi i vin plito en refleksyon, en refleksyon pou nou pep, pou nou sosyete pou nou dimoun, be mon pa oule i vin en refleksyon 6 mwan en refleksyon 5 an full stop ler nou fer en refleksyon nou bezwen sey gete.

Si nou fer lo nou lekor nou bezwen gete kot nou anvi ete dan 10 an ki nou anvi vwar dan nou lavi dan 10 an? ki nou plan? Ki nou fason avanse devan?

Be ler nou mazin an term nou sosyete petet nou devret koman en pep sey komans mazin kot nou anvi vwar nou sosyete dan 15 an, dan 30 an? Dan 50 an ki kalite sosyete? Ki kalite Sesel? Ki kalite Gouvernman? Ki kalite system an plas nou le vwar? E plis ki sa ki nou anvi vwar an plis ankor dan nou sosyete?

Mr Speaker, aköz mon'n servi sa mo patrimwann? Patrimwann i kapab dir lansanm ou bann byen, ou bann drwa, e ou bann lobligasyon ki ou annan koman endividi koman en sitwayen koman lasosyete koman en pep.

Tou i an globaliz tou en lakonpannyen, parey nou dir an franse en sosyete i kapab annan son patrimwann i osi. Aköz i en *legal person* i osi

dapre nou Lalwa Sesel ou patrimwann i egalman leritaz ou pase.

E parey mon'n *point out* i pa zis leritaz ou pase, me i egalman bann mers e manni e labitid ki nou tant pou pe devlope pou enkilke dan nou pep e nou pe kontinyen mars avek.

Ou patrimwann - ou kapab annan patrimwann ki ou parey ou dir en patrimwann imateryel sa i ou bann tradisyon, ou bann konnesans ler nou dir konnesans parey sa ki nou dir nou bann geriser tradisyonnel, zot annan en konnesans tradisyonnel dan ki plant pou servi pou geri maladi.

Zot annan konnesans merite ki desann o fiy amezir ki la ozordi i form parti nou patrimwann, me i egalman osi nou bann tradisyon oral.

Zistwar sounboula par egzanp, i for parti nou patrimwann be sa i plito bann konnesans ki nou annan e parey mon'n komanse ou bann tradisyon ki ou posede.

Ou patrimwann i tou ou larises kiltirel, natirel, materyel kominoter, ou langaz, ou sanson, ou bann propriyete entelektyel ki ou pe zenere ki ou'n zenere dan lepase, ki ou ankor pe kree anal an koman en pep koman en nasyon.

Tou sa larises ki pa dan labank e ki a lafen dizour i ou larises pli enportan. Akoz se li ki fer ou viv byen. Ou kapab annan larises finansyel, ekonomik.

Be si ou napa animasyon, *entertainment*, ou napa sanson dan ou lavi, ou napa la poezi ou napa lar, ou pa antour ou lekòr avek bon keksoz. Keksoz ki byen, zoli keksoz, ou pou zis en lakòk avek larzan ou pa anrisir ou atraver literatir, ou pou zis en lakòk avek larzan.

E i annan en valè ekstra ki nou koman en nasyon nou bezwen aprann atas avek sa bann dimoun spesyal dan nou sosyete ki zot, zot pe zener sa larises kiltirel, entelektiyel.

Menm mon bann koleg lo lot kote konmela takin nou mon tann zot pe sant Boum Sesel, ki byen i propriyete entelektiyel en zenn Seselwa ki'n kree e si sa Boum Sesel i kontinyen parey in komanse parey i pe ale, evantiyelman wi, en patrimwann pozitiv pou nou pep. E rezon mon pe komans koumsa Mr Speaker, mon pe zis sey montre ki mon patrimwann i *vast*, i *vast*, i gran i zeneral petet en pe tro ouver osi.

Be en pei ou egalman annan ou annan ou bann patrimwann natirel. E ou bann patrimwann natirel i souvan bann keksoz ki ou

koman en pep ou konsider presye.

Mon krwar *Planning Authority* i annan sa *issue* avek mon krwar *Sight of Incredible Natural Beauty* or mon'n bliye egzakteman ki mannyer zot fraz sa, *exceptional* Mr Speaker, mersi.

Anse Lazio mon krwar nou'n dir enn, be sa i ou patrimwann natirel sa Anse Lazio la i pou nou li, i pou nou tel ki Aldabra, tel ki *Vallée de Mai* i nou patrimwann akòz i apel pou nou koman en pep koman en nasyon ou egalman

E la mon konnen posibelman bokou dimoun pa pou konsider sa ou annan ou patrimwann finansyel tou. Mon a pran nou pei zanmi *Abu Dhabi* i annan plis ki en 30 enn lannen ki *Abu Dhabi* in kre son *Sovereign Wealth Fund* - sote 30 an.

Be in fini vin zot patrimwann finansyel. Ou annan tout en zenn zenerasyon ki'n ne grandi in fini aksepte sa pou li i form parti son realite ki son pei menm si annan larises petrokemikal, i pe fer *savings*.

I pran larzan i met a kote dan son *Sovereign Wealth Fund* ki son patrimwann finansyel e letan ou mazin sa en pei pa fer sa, li Leta fer sa i pe kre en tradisyon *savings* dan son nasyon.

Pa zis *savings* met dan labank pou labank fer larzan lo ou, me zot annan en fon lenvestisman kot zot met larzan de kote, zot envestir pou anrиси zot lekonomi.

Proper savings pa met labank, pa ganny mon an mal pou krwar pou dir *savings* se pran larzan met labank apre labank li i pran ou larzan i fer larzan lo la, non.

Ou envestir ou larzan. Ou aste ou *shares* dan bann lakonpanyen, ou plas ou larzan dan *Bonze Treasury Bills*. sa *savings*. Ou plas ou larzan dan *Pension Fund* pa dan labank.

Mr Speaker, Sesel i annan en lot kategori patrimwann ki nou osi annan. Nou annan sa ki term koman patrimwann mondyal ki ou pran en morso ou teritwar eksepsyonnel ou fer en don avek larestan lemonn.

E i al anba *l'egide UNESCO* e nou annan sa osi. Nou annan Aldabra nou annan nou *Vallée de Mai* so, pou en mon a koriz mon lekori mon ti pe al dir pou en pti pei.

Alors mon a les mon gide par la parol Onorab Bernard Georges, ki toultan dir nou dan Lasanble pou dir li i prefere dir Sesel en gran pei aköz ler ou kalkil sa *vast* teritwar maritime ki nou annan Sesel pa en pti pei, i en gran pei.

Me pou en pei avek pti git teritwar teres later teren nou'n lev en kopo nou'n konfyè avek lemonn lala nou bizou la nou maspen nou volonterman donn ou, ou gato maryaz avek.

Vwar mannyer nou annan bon leker koman en pep ? Mwens ki 100 mil, 200 mil dimoun Sesel Mr Speaker. I annan en lot konsepe mon le antre en pti pe lo la, sa lide annan en patrimwann kominoter en patrimwann sosyeter, en patrimwann pou devlop an komen koman en pep.

Mr Speaker, pa ni tous li mwan, mon anvi sorti dan bann lide zeneral e desann en pe lokaliz en pe mon lentrodiksyon.

Isi nou annan bann legzanp sa ki nou kapab term koman bann leritaz pozitiv, parey mon'n komans avek mon'n dir nou annan bann leritaz negativ osi sa i normal.

Be nou annan bann legzanp bann leritaz pozitiv. En legzanp mon pou donner, Konstitisyon i garanti Lasante Iniversel Primer Sesel, sa i ou drwa koman sitwayen garanti koman Konstitisyon Sesel.

Me nou sosyete, sosyete Seselwa nou pei nou ta Sesel i fourni swen lasante ziska lasante tersyer tretman kanser, ou tretman lopeyasyon leker, ou tretman al sonnyen aletranze ki mwan

personnelman mon'n
benefisye avek.

Sa i ganny fourni par Leta Sesel par sosyete Seselwa, e sa la in vin parti nou patrimwann sosyeter e in vin en patrimwann natirel i osi akoz i vin natirelman pou nou aprezan.

Be i pa en lobligasyon lo sosyete pou fer sa, be vi ki'n la dan tou sa lannen mon asire bann zenn anler dan galeri zot in ne avek konesans ki Sesel si ou tonm malad parey nou kontinyen dir Gouvernman i anvoy ou sonnyen deor.

E i annan sa lakseptans, i annan sa lakseptans natirel ki sa i koumsa, e i form parti nou patrimwann aprezan. Be pareyman Mr Speaker, nou sosyete i fer provizyon legal pou 9 an ledikasyon obligatwar ki ganny fourni atraver en sistenm ledikasyon iniversel.

Iniversel, ledikasyon iniversel pou benefis bann zanfan dan galeri se ledikasyon ki donn akse tou, san kestyon, nou tou nou ganny akse avek pou nanryen.

At point of use ou pa peye, Sanmenm mon'n kalifye li koman ledikasyon iniversel, non pa ledikasyon pou nanryen ki nou kontan dir.

Akoz nou tou nou pey *tax*, zot paran i pey *tax*, nou pa pe pey ledikasyon *at point of*

use me i ganny fourni par larzan *tax* atraver Bidze.

Be menm si lobligasyon lo Leta Sesel se pou fourni ledikasyon obligatwar pou 9 an, nou sosyete i fourni ledikasyon ziska ledikasyon tersyer.

Ou fini ou 9 an ou al pos-segonder si ou *meet* bann kriter ou kalifye, comma ou fini ou pos-segonder si ou kalifye, ou'n travay ou'n debourye e ou anvi e ou kapab ou al ledikasyon iniversiter.

Ankor fourni par Lepep la nasyon Seselwa, la sosyete Seselwa. Leta Sesel sa osi in vin nou patrimwann kominoter Mr Speaker, akoz tou sa bann zanfan dan galeri la zot annan lekspektasyon ki si zot leve, zot debourye, zot travay dir, zot etidye, zot annan sa lanvi, sa dezir, e sa kapasite a lafen zot parkour zot pou al fer en letid iniversiter zot osi.

A kondisyon ki zot, zot onor zot bann lobligasyon e zot *pass* tou bann ki zot bezwen pase. Mr Speaker, mon a tous lo en lot petet sa enn i a sisit en pti pe, en pti pe kontrovers.

En lot lekspektasyon natirel mon dir en lekspektasyon natirel ki nou pep i annan, atraver nou bann patrimwann kominoter e sosyeter se ki laz retret i a laz 63 an.

Mwan mon ti en zanafan mon ler laz retret ti vin 63 an mon defen granmanman i pe travay li, i toultan dir ou mon 63 an mon pou ganny mon repo, mon ti en zanafan ler i ti met an plas in la depi 78.

Kantite nou, nou'n leve nou'n travay avek sa konnesans ki 63 an nou pou pran nou retret, be li osi in vin en lekspektasyon natirel nou'n ne nou'n vwar li la in form parti nou patrimwann, in vin nou patrimwann sosyeter, kominoter natirel.

En lot, mon a termin sa lokalizasyon ki mon pe sey fer la aköz mon pe sey relye tenm mon Mosyon avek bann sityasyon lokal.

Konstitisyon Sesel i tous ki nou bezwen fourni nou pep avek en lozman dekwa i en pe vag lo sa enn. Be selman i dir ou *entitled* en lozman.

Be aköz sa nasyon ki apel Seselwa la, sa pep Seselwa sa sosyete sa Leta Sesel la pandan plizyer lannen i pe fourni sa pep ki apel Seselwa avek lozman a pri redwi, lozman a pri redwi.

Subsidized Housing e Mr Speaker. Nou pe koz bann gro sonm en, nou annan dimoun ki li i pey son lozman 600 mil, 800 mil, 850 mil.

Me kou konstriksyon i 1.2, 1.3, 1.4 milyon e ler ou pe gete i annan dimoun fanmir par lafason ki zot fanmir i

konstitye lo zot menm si nou pep nou sosyete Leta Sesel pa ti'n fourni, lozman a pri redwi i annan fanmir ozordi ki pe *enjoy* zot lozman ki pe viv byen *comme il faut* parey zot devret viv.

Si nou ti en lot kalite pep, en lot kalite nasyon, en lot kalite sosyete ki pa ti pare pou fourni byen pou nou pep dibyen pou nou pep, *the greater good*, en kantite fanmir ozordi pa ti pou dan sa sityasyon lavi kot zot pe *enjoy* lavi dan lafason ki zot pou *enjoy*.

Aküz zot pa ti pou'n kapab *afford* sa lozman lo zot menm. Aküz mazin en i annan fanmir ler nou get zot ozordi ou vwar dan en lozman ou vwar sa manman pe al lo son laz i annan son de zanafan gran gro e for pe debourye.

Mon reste Perseverance mwan tanzantan ou tande lo Perseverance "arr zot dan lakaz Gouvernman selman gro, gro loto deor" *go back, go back*.

Mazin sa madanm ler i ti ganny son lakaz i ti annan son de, trwa zanafan lo son lebra i ti pe *struggle* li, ozordi wi, nou vwar son zanafan in gran zot *afford* zot pran zot *loan* zot debourye zot pe bouze dan lavi zot osi.

Be annou retournen kan sa madanm ti ganny son lakaz, kan sa msye ti ganny

son lakaz, kan sa zenn fanmir ti ganny en zenn fanmir fek komanse zot ganny zot lakaz.

Zot pa ti dan sa sityasyon finansyel kot zot ete ozordi, sa ki'n permet zot antre dan sa sityasyon se akòz nou sosyete in pran li en desizyon ki nou fourni lozman nou pep.

Nou fer dibyen pou nou pep, nou fer byen pou nou pep be Mr Speaker, bann *economist* ti a dir ou ler ou donn en fanmir en lozman abòdab byen *comme il faut* ou liber esansyelman tou son potansyel.

Premyerman ou liber son potansyel ekonomik akòz i nepli annan larzan ki'n pri dan pe pey en *landlord* la i aste son propriyete i pe re pey son *loan* i pe pey sa a pri redwi.

Dezyenm, ou liber potansyel entelektyel akademik bann zanfan akòz ou'n donn zot en *safe nurturing* lanvironnman pou zot grandi e devlope ladan.

Kot sa bann zanfan prezan zot kapab vin sa bann dimoun ki ozordi nou dir gete zot annan *Twin Cab* deor selman zot dan lakaz Gouvernman.

Wi, se zisteman akòz zot in dan sa lakaz Gouvernman ki'n liber zot potansyel, ki ozordi zot sa bann Seselwa gran gro e for ki pe kontribye aktivman dan lekonomi Sesel, e sa i enn nou bann

patrimwann ki nou devret fyer.

Mwan mon krwar Seselwa koman en nasyon dan sosyete Seselwa nou devret fyer nou'n fer bokou, nou'n fer bokou pou nou pep, nou'n fer dibyen pou nou pep nou.

Pou en gran nonm lannen, e sa osi in vin enn nou patrimwann akòz Seselwa i annan sa lekspektasyon ozordi ki i ganny en lakaz abòdab pou soutenir son lekor, son fanmir e son zanfan.

Mr Speaker, mon pou konklir tre vitman e mon pou dir zot laverite par deryer mon Mosyon. Ki mannyer eski ou enspir en pep? Ki mannyer nou fer Seselwa ralye deryer en bi komen?

Mon konnen nou ti ralye ler pirat ti atak nou, nou ti ralye par deryer pirat. Mon konnen ti Seselwa ti ralye 2020 ler pou fer sanzman Gouvernman.

Me sa in tre bref, Seselwa in ralye resaman par deryer *beach soccer* zis parey sak fwa Festival Kreol i vini Seselwa i ralye par deryer son bann levennman sportif, e son bann atlet.

Be Mr Speaker, politik i vini i ale. Mwan, mon en politisyen mon pou dir sa. Politik i vini i ale. Politisyen i vini i ale. E Sesel nou pe antre dan staz en Gouvernman son

proper demokrasi mon kapab dir la.

Kot en Gouvernman pou vini i a fer en manda ouswa de manda i pou ale li. Akoz tou demokrasi modern i koumsa. Nou pou nepli annan Gouvernman 15 an, 30 an, in fini sa. Nou, nou'n fini rekonnet sa.

Zot osi mon krwar zot in rekonnet zot pou al *cycle out* tre byento be par lao sa bann ale vini politik, politisyen kwa ki pou ralye sa pep a lafen dizour?

Akoz Seselwa i travay? Kwa ki enspir li? Resaman mon'n fer en konversasyon avek en zanmi ki i travay dan konstriksyon, i dir mwan i ganny en konversasyon avek en Endyen ki pe travay pou envestiser etranze.

E sa envestiser i dir li "*we're building an empire*" sa Endyen i dir "*we're building an empire*" prezan i dir li ou pe *build* en *empire* Sesel? I dir "*no, no, no, no "we're building an empire throughout the world."*

E li pou li sa Endyen li i ganny sa avek sa lenvestiser son anplwayer, son anplwayer li in ganny sa aköz son nasyon, son pep zot pe fonksyonnn koumsa aköz zot pe *build* en *empire* zot.

Whether i vin Sesel i fer en bout son lanpir, i pou al en lot bor i pou fer en bout. Be zot

annan en keksoz ki pe motiv zot.

Be nou Seselwa kwa ki pou motiv nou? Mon pa pe dir nou *build* en *empire* mwan, be kwa ki pou motiv nou pou fer volontarya? Kwa ki pou motiv nou pou nou detri sa bann plant anvaisan la ki pe defas nou pei?

Kwa ki motiv nou pou lev nivo la konservasyon dan nou pei? Tou sa ki demann mon retourn ankor lo sa term la partisipasyon. Kwa ki fer nou avans devan e pare pou nou partisipe?

E mon ava menm dir Mr Speaker, pou en zenn Seselwa antre dan larme aköz en solda ou pe al *serve* ou pei la, ou pe met ou lekor o servis ou pep.

E sa i enn bann keksoz ki nou bezwen an rekonnet sa servis. Egalman pou antre dan lapolis, kwa ki fer ou swazir letan ou ankor zenn swazir en metye ki pou met ou kontinyelman konfrontasyon avek bann lezot manm ou sosyete pou en rezon ouswa lot?

E ou pe al *serve* laba ou, letan ou pe al dan lapolis ou pe al *serve* e sa i retourn mon lo en lot parol Onorab Georges, Mr Speaker, mon krwar ou ava rapel ou ti dan Lasanble letan i ti dir pou dir.

"Si i annan en keksoz ki li i ti a kontan sanze se sa non Lafors Lapolis" mon pa tro

rapel si 4enm Lasanble i ti dir sa i ti a kontan plito nou annan en Servis Lapolis.

Be si nou ti annan sa non Servis Lapolis *then* i retourn lo sa ki mon pe dir la, kwa ki pou fer en zenn Seselwa antre dan lapolis? Ki mannyer nou anmenn sa nide ki mont odela la politik?

Ki anmenn mon pa pou kontan servi sa mo patriyotik, me ki anmenn sa lespri kominoter ki nou en pti git nou lo en gale dan milye en losean, e nou annan zis nou, zis kanmarad antre nou pou nou depan lo la. E sa i refleksyon ki nou anvi ki mwan mon anvi Lepep Seselwa i fer, full stop i refleksyon ki mon, mon anvi Seselwa i kapab pans lo la pou sa prosen 25 an, 30 an lo ki mannyer nou'n bouz de lavan.

E annan en gouvrenans *ethical*, onnet, fran avek nou pep ki protez tou sa bann bon keksoz ki apel pou nou pou nou pep.

Ki nou sa zenerasyon ki la ozordi nou zis bann garan pou nou zanfand, pou zenerasyon fitir. Mersi Mr Speaker.

(APPLAUSE)

MR DEPUTY SPEAKER

Mersi Onorab. Nou ouver lasal aprezan pou deba e Onorab Vidot, ou le entervenir la sa staz ou ki ti segonde? Pli tar

ok. So, si pli tar next lo mon lalis i Onorab Gill, you have the floor.

HON CHURCHILL GILL

Mersi Mr Speaker. Bonzour tou etidyan Belonie dan galeri, bonzour tou Manm e tou dimoun ki pe ekout nou.

Mr Speaker, sa Mosyon anmennen par Onorab Loze, i tre fondamantal pou en pei ek son pep. Nou zoli pei Sesel i pa zis en group zil.

Me i en *beacon of natural beauty*, ris patrimwann kiltirel ekonomik, lenfrastruktir, konstitisyonnel, sit mondyal e lezot ankor.

Pou protez nou patrimwann, in ganny enkilke dan nou atraver konfyans serye par nou bann zanset, responsabilite pou mentenir sa trusts i reste enn nou bann responsabilite pri mondyal pou nou fitir zenerasyon.

Mr Speaker, pou konstaman protez nou bann patrimwann nou bezwen en Gouvernman ki gouvren nou pei avek lonnekte, senserite, e lentegrite solid.

Sa Mosyon i pa zis a *wake-up call*, me en lobligasyon moral *leadership* nou pei. Annou komans avek bon gouvrenans, kot tou aksyon tou desizyon i ganny gide par la transparans.

En Gouvernman ki rann kont ek son pep sa pa zis en

lenspirasyon, me en nesesite pou tro bokou letan nou'n vwar potansyel lefe koripsyon ek faver nou bezwen ferm tou lespas ki pou fer li posib pou nou patrimwann ganny konpromize.

Lentegrite i bezwen en prensip fondamantal pou seryezman protez nou leritaz. Sesel i beni avek bann zoli lans, en lekosistenm la marin vibran, e en panaroma enkrwayab.

Me sa bann aki pe toutan ganny menase swa par bokou devlopman ki kontribye pou degradasyon lanvironnman. En bon envestiser i ganny bann lagreman ki zot annan kontrol ekskliziv lo zil.

Avek bann kondisyon ki pa neseserman kler pou pep Seselwa, kot nou pe vwar en *slack* dan lafason ki nou mentenir proteksyon nou bann zil, espesyalman nou bann zil elwanye.

I kler ki parmi bann desizyon ki pe ganny pran konsernan devlopman lo nou bann zil pa pe neseserman ganny donnen dan son totalite avek piblik Seselwa.

Sa dan li menm i kree bokou dout lo lentansyon ladministrasyon lafason ki nou bann zil elwanye pe ganny zere.

Mr Speaker, atraver sa Mosyon loter Mosyon pe remet

sa diskisyon lo latap pou ganny revwar dan son totalite, an term polisi eski polisi an plas ozordi pe reponn bann bezwen ki nou pe fer fas avek, pou protez nou bann lekosistenm.

An menm tan antre pran bann devlopman touristik ki soutenab, e an armoni ek nou lanvironnman.

Pou ki nou lanvironnman i reste en sours lafyerte, e prosperite pou fitir zenerasyon. I enportan ki nou debout ferm kont bann reisit kour term ki annan potansyel pou detri nou fitir.

Se sa kalite *leadership* ki sa Mosyon pe rode, komitman pou senserite i devret dekoul dan leker Gouvernans nou pei.

Zis senserite ek lentegrite pa ase pou mentenir nou lidantite. En patrimwann entak ki nou devret kit deryer pou nou zanfana, e nou aryer pti zanfana.

Sa pouvwar pou kre sa fitir ki nou le i dan kalite bann *leaders* ki diriz nou pei ozordi, e dan lefitir pou en meyer rezilta ki sa Mosyon pe rode.

Mr Speaker, nou osi annan lezot patrimwann ki devret ganny mentenir dan en fason entak pou nou fitir zenerasyon.

Nou Konstitisyon i prevwar serten aki ki pa zanmen devret ganny neglizye, oubyen ganny menase a

nenport ki moman anba nenport ladministrasyon pei.

Mr Speaker, nou patrimwann ekonomik, kiltirel, ek lenfrastriktir i sa fondasyon ki nou idantite in ganny etabli - sa *legacy* ki nou pas avek nou fitir zenerasyon.

Sesel i plis ki en paradi ek zoli lans, i en pei avek listwar ris tradisyon e rezilyans, komansman par nou bann bazar tre frekante ki kontribye dan sa moter lekonomi.

Nou koutim kreol ki definir nou fason viv ek nou bann arsitektir enpresyonnen ki an silans in kontinyen swiv nou pase, ki donn nou plis rezon pou protez tou nou bann patrimwann dan en fason bokou pli determinen e konsistan.

Kestyon ki nou devret pe demann nou lekor, eski nou pe vreman protez nou patrimwann? Eski nou pe asire ki tou lendistri ki'n fer nou sirviv koman en nasyon pou tou sa letan pe kontinyen fer nou pei grandi ekonomikman? Eski nou tradisyon kreol pe kontinyen vibre?

Mr Speaker, nou bezwen fer ladministrasyon pei responsab pou ban desizyon ki kontribye pou detri nou bann patrimwann etabli.

Nou bezwen ogmant kapasite aktivite ekonomik

lokal par siport entrepreneur, e *business* Seselwa, tou keksoz ki fer lokal i ganny aste par Seselwa.

Tou lendistri lokal i garanti lendependans finansyel e soutenab pou nou pep e nou *livelyhoods*. Nou bezwen *champion* nou idantite kiltirel, nou langaz, nou lanmizik, nou lakwizin, nou folklor.

Annou angaz nou pou montre nou bann zenn nou bann zoli sanson kreol, nou bann zanset annou selebre nou bann diferan festival avek plizyer plezir ek loner.

Nou konnesans bann ki'n vin avan nou. Mr Speaker, nou protez tou nou bann lenfrastriktir ki'n kit nou konekte nou bann batiman istorik ki'n akont nou listwar nou bann semenn e *port* ki'n fer bouze progre ler nou pe fer mentenans.

E i pa vreman en depans, me plito en lenvestisman dan dirabilite. Nou patrimwann i pa en kado pasif, me en responsabilite si nou eswe pou proteze nou kapab perdi lesansyel ki fer Sesel diferan avek lezot pei.

Me nou kapab nou tou ansanm pran bann desizyon e aksyon ozordi, epi demen nou kapab debout ansanm koman bann vre kostodyen nou nasyon ki refize pou les nou *legacy* disparet.

Les listwar rikord tou sa ki nou fer, les fitir remersi nou pou nou bann aksyon desiziv. Annou protez sa ki pou nou Sesel i devret i *deserve nothing less*.

Mr Speaker, pou zil Praslin mon'n toultan fer konversasyon isi menm dan sa Lasanble, sa se nou patrimwann mondyal sit *Vallée de Mai*.

En tel sit i devret ganny byen mentenir e prezerve. Ki fason nou fer sa? Zabitan Praslin pa'n zanmen kont sipor ki *Vallée de Mai* i donn Aldabra.

Me zabitan in toultan krwar i en poursantaz sa bann reveni i devret ganny donner Praslin pou diferan sipor, enkli res investisman dan formasyon bann zenn pou vin bann fitir travayer swa dan konservasyon, *ranger*, *fire brigade*, travayer fore e lezot formasyon ki *SIF* i bezwen ki garanti kontinite.

Travayer dan sa sit patrimwann enkli *Fond Ferdinand*, Curieuse, e Aldabra li menm. I domaz nou pa ankore konpran vre lenportans en tel sipor pou al dan sa bann direksyon.

Mr Speaker, Praslin nou osi annan en gro problem avek nou sistenm lasante, ki a neserman a laoter donner kantite lenvestisman ki pe

ganny enzekte dan Bidze pou mentenir en standar o nivo.

E adekwa pou pasyan lo Praslin menm apre kontinyelman anmenn sa size devan Mr Speaker, nou'n menm vwar kot laz pansyon in vin 65 an san pran kont kalite travay ki sa bann dimoun ti pe fer e ki lenpak sa in annan lo zot lasante.

Ki leta zot kondisyon fizik, sa i bann desizyon i pa rezonnab ler nou pa pran kont sa bann diferan sityasyon ki nou bann dimoun avek sa bann laz in fer fas pou mentenir bann patrimwann ki nou ozordi nou pe apresye.

Mr Speaker, i kler ki sa Mosyon ki Onorab Loze, in anmennen i annan en vre merit ki nou bann *leadership* ozordi, e fitir i pran kont lenportans bann responsabilite ki Lepep Seselwa i donn nou dan bann partisipasyon eleksyon.

E pou fer sir ki patrimwann Sesel i ganny byen proteze, e byen devlope byen mentenir pou asire ki nou fitir zenerasyon i kapab apresye nou pei Sesel pli byen ki nou, nou'n deza fer.

Mwan, mon pou donn mon sipor tou sa Mosyon ki Onorab Loze, in anmennen. Mersi Mr Speaker.

(APPLAUSE)

MR DEPUTY SPEAKER

Mersi Onorab Gill. Mon pou donn laparol aprezan Onorab Tamboo.

HON LOUISETTE TAMBOO

Mersi, Mr Speaker. Bonzour Mr Speaker, bonzour bann etidyan dan galeri, bonzour tou koleg Manm Onorab, e en bonzour spesyal tou dimoun Cascade tou zabitan Cascade.

Mr Speaker, depi mon'n ne mon'n konn Sesel koman mon pei mon lafyerte dan lape trankilite, e sekirite.

Nou Seselwa nou en nasyon ki sanse nou bann ros granit, nou disab, blan, lanmer, nou lanatir, nou bann plant e bann diferan lespes ki viv dan nou lanvironnman.

Nou bann fason viv sa ki nou zanset in fer, e in kit la pou nou erite, nou kiltir nou leritaz tousala i apel pou nou pep Seselwa.

E nou bezwen protez li a tou pri. Pou siport sa Mosyon mon pou bezwen adres detrwa size ki mon krwar i vreman enportan koman parti nou patrimwann e nou souvrennte.

Ozordi Mr Speaker, mon annan en lenkyetid lo mon pei e son stabilite a lavenir, nou zil nou koman pep Seselwa nou bezwen rod lezot fason pou gard nou bann zil anba nou responsabilite.

Pa zis anba nou responsabilite, me osi fason pou devlop li nou bann zil i pou nou sa, me ki ou vwar ozordi? Laplipar i ganny donnen oubyen vann avek etranze apre nou vwar nou pe ganny difikilte pou gard lord.

E nou Seselwa nou pa benefisye dan okenn fason, nou bezwen Mr Speaker, rod lezot fason pou gard nou bann zil pou nou, pou gard nou bann zil anba nou responsabilite.

Me tou resaman nou vwar zil Lasonpsyon ki'n en size ki'n annan bokou kestyon ki'n leve lo la. E sa in osi anmenn bokou dout.

Lekel ki pe anrиси zot lekor e pa pe mazin lenpak ki sa pou annan lo nou pei a lavenir. I nou devwar Mr Speaker, pou protez nou bann zil.

In annan bokou koze dan lepase, aret vann nou zil, rann nou, nou zil, me la ozordi ki nou vwar sa Gouvernman pe fer? Ozordi zot pe vann nou par isi e vann nou par laba.

Be nou Mr Speaker, nou Lepep Seselwa koman en nasyon, nou bezwen tonm dakor pou nou protez tou sa ki apel pou nou e pou nou zanfán.

E la i fer mwan mazin parol serten isi menm dan sa Lasanble, e se la Mr Speaker, dan bann lenstans parey ki

nou ti devret pe mazin pran tou sa ki pou nou e pou nou zanfan.

Mr Speaker, sa i osi fer mon mazin letan pase kot ti annan bokou koze lo lavant later avek etranze. E sa ti ganny fer isi menm dan nou Lasanble.

E i ti osi enn bann pli gran konsern Prezidan aktyel Wavel Ramkalawan. Me ozordi nou vwar nou later pe ganny vann avek etranze, e sa menm dimoun ki ti kont ozordi i fer kontrerman.

Be mwan, mon demande kote sa i benefisye nou koman en pep? Ki sa pou anmenn pou nou? Demen nou menm ki soufer aköz nou vwar ki bann devlopman ki ganny fer i pa dan lentere pep Seselwa nou pa ganny nanryen avek.

E sa i pa merit arive, letan nou koz lo zil ek later nou pa kapab pa koz lo nou lanvironnman e bann lespes ki annan ladan zot labita. E sa i fer mon mazin Cascade kot mon'n ne e grandi.

Nou annan nou en lanatir eksepsyonnel, nou annan nou bann plant andemik, nou annan nou bann *trail* e ki nou vwar ki bokou touris i frekante.

Me i pa ganny son lanpler ki i merite. Be mon ti a oule fer konnen ki ler mon ganny elekte koman *MNA* Cascade an

Septanm mon pou fer sir ki i ganny son merit.

(Interruption)
(APPLAUSE)

HON LOUISETTE TAMBOO

Mon konnen ki mon bann koleg lo lot kote latap pou riye, mon konnen i en riye riy zonn aköz sa ki la pa'n kapab protez nou bann *trail* Cascade, nou plant andemik e ki pa'n nob ou kapab donn li son lanpler ki merite.

Ozordi bokou dimoun espesyalman bann profesyonnel dan lanvironnman zot dir ou ki o fiy e amezir nou lanvironnman pou ganny afekte avek serten bann devlopman ki'n ganny fer.

In annan tou dernyerman bann devlopman ki kantmenm in ganny dir ki pou afekte nou lanvironnman, nou vwar ki Gouvernman pa'n ekoute in kontinyelman ganny fer.

E sa i aköz senpleman nou mazin nou pos e nou frenm lize lo la, tousala Mr Speaker, i nou patrimwann sa e nou bezwen protez li ankor enn fwa mon dir.

Lape Mr Speaker, trankilite, sekirite en nasyon me letan mon pe koz lo sa size la Mr Speaker, annou fer en refleksyon annou vwar si vreman nou pep Seselwa nou

patrimwann, nou souvrennte in vremen ganny proteze.

Mon leve 1 er bomaten avek en gro tapaz ki pa labitid tandeleker i palpitem vit fannen partou lo nou, plafon in sorti anler e in vin zwenn nou lo nou lili.

Nou vwazen pe kriye sove, e disan pe verse, ou loto ki ou'n travay, ki ou'n *sweat* pou ou gannye i kraze. Tou ou byen ki ou'n transpire pou ou gannye i ganny detri.

Zanmen in deza arive dan listwar nou pei kot en tel lensidan in anmenn lensestite e lafreier dan nou pep. Be i devwar en Gouvernman pou asir lape, trankilite, e sekirite son pei e son pep e nou bezwen osi dir ki devwar Gouvernman pou rann kont.

Akoz ki nou dan sa leta ozordi? I en kestyon. Lekel ki'n met nou dan sa leta ozordi? E sa apre sa refleksyon i leksplasyon le 7 Desanm 2023.

Malgre pep Seselwa zot in antann ki mon bann koleg *LDS* ozordi in riye letan mon'n akont nou soufrans le 7 Desanm. E mon swete ki zot pa zanmen oubliy ozordi ki mannyer sa bann Manm *LDS* in riy nou soufrans.

En Gouvernman i merit protez son pep, ozordi Gouvernman i lour lo rann kont, i lour lo protez nou

souvrennte lavi i sanze, e tou nepli parey.

Se sa ki mon pe koz lo la Mr Speaker, sa size leksplasyon i montre nou ki sa Gouvernman ozordi pa pe demontre sa nivo responsabilite anver proteksyon e byennet son pep.

A plizyer repriz in annan bann manifestasyon par bann viktim leksplasyon, i annan komite ki'n ganny kree e se avek bann bon lentasyon pou donn koudmen rod lazistis.

Mon menm mon'n fer kantite pou rod lazistis, me ki ou vwar Gouvernman olye donn soutyen bann viktim rod lazistis soulaz soufrans bann viktim, i paret zot deside protez zot lekor.

En kominote ki ti pe viv byen menm, pa ti parfe me nou ti *ok*. Ler en tel kalamite parey i arive en Gouvernman i deside kasyet keksoz.

Oli nou sekirite? Oli nou trankilite? Gouvernman i la pou protez son pep me ozordi i pa le ka. Letan bann viktim zabitan Cascade ankor pe esper led, delo ankor pe koule dan zorey, lakaz pa ankor aranze zot ankor pe viv ek lafreier.

Sa ki'n perdi tou e pe rode kote pou gannye pou re aste, sa pa zanmen protez nou patrimwann e nou souvrennte.

E san oubliye ki i annan apepre 1 mwan mon'n anmenn en prozedlwa ki ti pou ede rod lazistis pou nou bann viktim leksplozyon.

Me ziska ozordi mon pa ankor ganny en larepons. Mon'n anvi ki nou bann viktim nou ganny lazistis nou retrouv sa trankilite lespri e sa prozedlwa ki ti pou kre en Tribinal Lanket Endepandan ti pou en fason pou nou konnen kwa ki'n arive?

E ki nou ti ava ganny leklersisman e soulazman e lazistis, me ankor enn fwa i fer mon panse ki Gouvernman pa pare pou ed nou ganny sa bann soutyen.

Eski la Gouvernman pe protez nou souvrennte? Tou byen personnel en dimoun tou son sakrifis ki'n erite, ki'n fer i ganny detri koumsa e nou pa ganny lazistis.

Be mwan, mon enkyet pou nou fitir, e se sa Mr Speaker, ki pou fer mon siport sa Mosyon menm si bann Manm lo lot kote latib in riye, in gognarde.

Me i en Mosyon ki pou asir sekirite, lazistis ki pou protez Lepep Seselwa ozordi e a lavenir, ki nou ganny en Gouvernman ki pou asir tousala avek son pep.

Avek sa detrwa mo mon a terminen e mon swete ki nou ganny en konpran aköz nou

bezwen protez sa ki apel pou nou. Mersi Mr Speaker.

(APPLAUSE)

MR DEPUTY SPEAKER

Prosen entervenans lo lalis e evidaman dernyen dimoun ki'n lev lanmen ki lo mon lalis *hold on*. Ok, Onorab Vidot, mon pou bezwen anvoy ou la.

Akoz lo mon lalis napa lezot non. *You are the last one*, e la ler mon pe al donn ou laparol ki 2 Manm ou caucus in lev lanmen, so mon pou bezwen donn ou laparol la.

Ok Onorab Gabriel, ou le ale. Pardon? Ou annan en *point of order*.

HON EGBERT AGLAE

Mr Speaker, lafason ki ou pe zer Lasanble ki mon pa pe dir nanryen mal. Eski ou annan lentansyon pou ou fer malis la?

Sa ki mon, mon anvi konnen. Ouswa ou pou les lalis ouver sa ki anvi leve i pou leve ler i anvi? Mon anvi konnen. Mersi.

MR DEPUTY SPEAKER

Hm, ok. Anfet sa ki mon ti pe annan lentansyon fer parey mon pe dir mon pe pran non bann dimoun anmezir ki mon ti pe ale.

E dernyen dimoun ki ti'n lev lanmen ti Onorab Vidot, ki mon ti pe al donn li laparol la

apre ti napa personn ankò, me Onorab Gabriel avek Onorab Larsen, in lev lanmen.

Ti mon lentansyon avan nou al break 10 er edmi pou dir avek tou bann Manm ki annan lentansyon koze pou les mon konnen pou mon marke.

Akoz i annan de Mosyon lo *Order Paper* ozordi. I posib ki nou pran zis sa enn la ki nou pe koz lo la, me selman mon bezwen konnen akòz pou mon kapab *manage* letan sa i enportan pou mwan.

Akoz letan 5 er mon pou ferm Lasanble, so i enportan ki bann Manm i les mon konnen lekel ki pou anvi koze avan nou al *break* 10 er edmi akòz pou mon kapab *manage* letan pou nou kapab konnen konbyen letan mon pou donn sak Manm.

Si zot pa fer sa i ariv 5 er i annan 3 Manm pa ankò koze mon pou zis ferm deba e donn *right of reply*. So, avan 10 er mon pou dir bann ki le koze endike so Onorab Gabriel, ou annan laparol. Mersi.

HON CONRAD GABRIEL

Mersi Mr Chair. mon a dir bonzour toulmonn a lekout, mon a dir *welcome* bann envite dan nou galeri.

Mr Speaker, dabor tre enteresan e i vreman pertinan montre grander lespri Onorab Loze, ki'n toultan la pou

defann zentere sa pep, malgre ek bokou difikilte.

Alors an prensip i tre enportan ki nou get byen sa trwa mon swivan dan sa Mosyon lonnekte, senserite, e lentegrite.

Vreman enportan Mr Speaker, sa i trwa valè ki primordyal dan en sosyete sa ki pli vye ki mwan i konpran tre byen sa trwa prensip debaz ki'n ed nou sof gard e protez nou patrimwann e fer nou fyer nou en Seselwa.

Mr Speaker, nou pa zis en group zil, me en labote inik dan lemonn. Bokou lenerzi in ganny depanse pou asire ki nou reste sa labote dan milye sa gran losean.

En bizou ki fer mwan fyer mon en Seselwa e mon panse bokou lezot dimoun Sesel i fyer ki nou en Seselwa. I kler pou dir pandan sa dernyen 5 an patrimwann Seselwa patrimwann nou pep i an danze.

Laz sekirite sosyal 63 an ki la depi 1978 in ganny zwe avek, e sa in anmenn bokou me kontantman parmi nou popilasyon. Bann benefis ki nou travayer ti gannyen nou bann sportif in mal ganny anmenn, Lasonpsyon i en gro kestyon ziska prezan ki zot in fer, ki zot pa'n fer nanryen pa kler.

Selman sa ki nou konnen nou debout lo lakot Mahe, e

nou get Lasonpsyon enn nou patrimwann pli presye kot pe glise pe ale me zot dir nou i *ok*.

Akoz nou'n ganny 4 bal disab an retour. Mr Speaker, sa Mosyon in vin o bon moman, eski sa Gouvernman i vreman konpran sa trwa valer primordyal?

Si zot ti konpran sa Loter Mosyon pa ti pou santi lobligasyon anmenn en tel size devan nou Lasanble. Mr Speaker, mon pran legzanp mon distrik Pointe Larue ki annan sel *airport* enternasyonal.

Parey in le ka depi louvertir *airport* 1972, touris in nou sours reveni prensipal sa in fer ki bokou zabitan mon distrik e lezot dimoun sorti dan plizyer lezot distrik in travay tre dir pou fer ki nou pei i ariv kot i ete ozordi.

Pa ti fasil ditou, Mr Speaker, mon repete - sa pa ti fasil ditou e nou bezwen rekonnet. Gouvernman avan ti fer sir ki sak fanmir i ganny en lozman adekwa par en kou redwi.

Ledikasyon e lasante pou nanryen, e byensir bokou lezot mezir ti ganny met an plas pou soulaz lavi nou pep. Tousala i montre nou ki bokou bon keksoz in arive dan sa pti pei Sesel. Bokou pa le admet *SPPF* Parti Lepep, e la *US* in fer bokou pou nou pei ariv kot i ete ozordi.

Bokou zot lot kote latab in byen benefisye, zot lentansyon se detri tou, me pep Seselwa pa pou les sa arive.

Byento pep Seselwa pou reklanm son patrimwann. Byensir bann ki pe viv Sesel osi byen bann ki pe viv aletranze, pe swiv de pre sa ki pase dan nou zoli pti pei beni.

Mon konnen ki annan bann ki tre konsernen avek latitud e lapros sa Gouvernman, kot zot pa oule ekoute, e sa pou kout zot ser dan sa eleksyon ki pe vini.

Bann proze distrik Pointe Larue pa'n ganny materyalize, e sa in koz bokou lensertitid parmi bann zabitan. Dabor nou bezwen en bon refleksyon lo nou fitir e sertennman nou bezwen aprann par nou pase.

E ki mannyer nou bouz devan? Koman en distrik nou bezwen reste konnekte ek nou pep pou finalman konpran byen sa pep.

Mon latas pou fer sa arive pa'n enn ki fasil. Me avek determinasyon disiplin, mon pou double mon zefor pou fer pli byen dan bann lannen ki pe vini pou asir benefis nou bann fitir zenerasyon.

Patrimwann i en size *vast* parey Loter Mosyon in met nou azour, e i konpri tou nou byen, e i enportan ki Gouvernman i fer li son lobligasyon pou protez nou

sosyete, e nou bann leritaz lepase a tou pri.

Mr Speaker, koman bann lezislater nou bezwen zwe nou rol pou protez patrimwann Sesel dan son totalite pou benefis nou fitir zenerasyon. E se zisteman sa ki Mosyon pe demande. Gouvernans pei i bezwen sanze, si nou koman en pep nou kapab ralye otour bann keksoz ki presye, bann bon valer ki presye san dout nou pou sof gard e protez nou patrimwann sa gran difikilte.

Mr Speaker, lo mon kote pou konklir mon a profit lokazyon pou remersi tou nou bann veteran, bann vye solda e militan ki ti partisip dan sa konferans Sanmdi le 17 Me ICCS.

Osi bann ki pa ti la, me ki ti pe swiv de pre ki ti pe pase. Zot in kontribye bokou e an fezan sa zot in ede sof gard e protez patrimwann Sesel dan son antyerte pou benefis nou fitir zenerasyon.

Lo sa *note* mon a remersi zot e loter Mosyon garanti ki mon pou donn ou mon *full* sipor. Mersi.

(APPLAUSE)

MR DEPUTY SPEAKER

Mersi Onorab. Prosen enterven an lo lalis i Onorab Larsen.

HON CECILE LARSEN

Mersi Mr Speaker. Bonzour a tous, espesyalman zabitan Au Cap a lekout. Mon pran laparol ozordi avek en gran sans responsabilite lo sa Mosyon ki'n ganny propoze par Onorab Loze.

Aprè tou Sesel i pou ki? Sesel pou Seselwa, alors Polisi e prosedir ferm i devret ganny met an plas lo lafason ki keksoz i ganny fer.

Nou patrimwann i enportan i form parti nou laverite nou listwar ek nou lidantite koman en pep, i permet nou gard konneksyon avek nou rasin respekté bann valer ki'n pas atraver zenerasyon.

E asire ki nou kiltir langaz ek tradisyon pa perdi. Atraver proteksyon ek valorizasyon nou patrimwann nou montre respe pou zenerasyon ki'n viv avan nou.

Pou zot kontribisyon e nou kapab transmet sa konesans avek zenerasyon fitir, e fer sir ki nou nasyon i grandi lo en baz solid.

Nou bezwen komans met disiplin, reazir onnet e fer sa ki devret ganny fer dwat ek lonnekte, senserite, e lentegrite pou protez nou patrimwann dan son antyerte.

Okenn ladministrasyon ki gouvern pei, pa sipoze annan sa pouvwar fer sanzman konsernan

proteksyon nou idantite dan laform ki zot anvi.

Swa pou rezon politik, ou personnel aköz sa pa pou anmenn okenn benefis pou nou fitir zenerasyon.

Zis parey ladministrasyon oparavan in fer bann desizyon ek leker ouver, ek bonn fwa in ganny pran pou benefisye tou dimoun san leksepsyon.

Arey akse a ledikasyon e lasante gratwit, en lot legzanp i sa *Right to Information Act* ki ti vin an fors an Zilyet 2018.

Sa Lalwa i annan pou bi promouvwar bon Gouvernans an favorizan la transparans, responsabilite ek lentegrite dan ladministrasyon piblik.

E nou vwar ki sa i en problemn menm dan sa Lasanble kot MNA proporsyonnel LDS i ganny akse ek lenformasyon, me MNA proporsyonnel US i ganny refize.

I nou devwar edik nou zenn pou zot konn zot rasin ek zot valer, nou pa kapab refas nou listwar. Nou ava anmenn Lalwa e dokimantasyon.

Me lefe i reste ki nou en nasyon ek nou prop idantite. Bann desizyon ki konsern sof gard e protez patrimwann Sesel i devret ganny pran o serye e aker.

Nou bezwen realize ki tou aksyon i annan son konsekans, e par ler i move

pou nou. Avek ou permisyon Mr Speaker, les mon fer referans lo aksyon Seselwa 2020.

Ozordi la mazorite pe met lanmen lo latet, e lestoman pe kriy se ma fot. Alors kestyon ki nou devret pe demann nou lekor, eski i normal pou politisyen fer Lalwa zis pou ganny pwen politik ouswa fer plezir serten? Ki probableman pou gen personnel.

Eski i normal pou fer nou fitir zenerasyon pey lepokase ki probableman pou enn ki ireparab aköz nou anvi fer plezir serten?

Lo sa kote latab nou fortman rezet e kondann okenn lesey mal kalkile ki pou met an danze nou patrimwann nasyonal ki vreman frazil.

Alors annou fer li nou drwa e nou devwar pou fer sa ki meyer pou nou pei, e sa i senpleman par konsilte nasyon Seselwa fortman kot i konsern desizyon patrimwann nou pei.

Pa fer Sesel plere. Pa fer nou fitir zenerasyon repros nou pou okenn desizyon ki sa Gouvernman dizour i pran.

Pou terminen nou patrimwann i en keksoz presye ki fer parti nou idantite nasyonal, e nou lafyerte ki dir ki nou ete koman Seselwa, e nou annan responsabilite pou protez li pou bann zenerasyon ki pe vini.

Sa i vedir pran bann desizyon ki reflekte bonn Gouvernans respe pou nou listwar, nou lanvironnman e nou kiltirel.

Se selman avek en tel langazman, e konsistans ki nou kapab asire ki Sesel i gard son valer pou tou dimoun, ozordi e demen. Mersi Mr Speaker.

(APPLAUSE)

MR DEPUTY SPEAKER

Mersi Onorab. Ler mon pe get bann dirasyon letan, dirasyon bann entervansyon posibleman nou kapab pran ankor en lot avan *break*. E ankor enn fwa lo mon lalis i reste zis Onorab Vidot, ki dernyen.

So, Onorab, mon pou donn ou laparol la, me selman parey mon ti dir ler ki Onorab, pe koze lezot Manm ki annan lentansyon entervenir silvouple endike, pou mon kapab konnen apre *break* ki mannyer mon pou balans letan lo sa Mosyon. Mersi.

Onorab, laparol i pou ou.

HON AUDREY VIDOT

Mersi Mr Speaker. Bonzour Mr Speaker, tou Manm Onorab, bann envite dan galeri, e en bonzour spesyal pou zabitan Roche Caiman.

Mr Speaker, permet mwan avan mon komans mon

lentervansyon pou mwan senpatiz avek de fanmir ki'n perdi zot zanfand kominote Roche Caiman.

E sa se lafanmir Daniel Nancy ki ozordi son servis finaray pou ganny fer. osi byen ki bann fanmir Clarisse ki bokou bann zenn i konn li Roche Caiman ki'n lekol Plaisance, Hubert Clarisse ki'n kit nou, mon senpatiz ankor avek lafanmir.

Me osi mon le sezi sa moman pou mwan swet en bon laniverser de dimoun ki'n touzour lwayal e donn mon bokou sipor dan mon parkour karyer politik, koman manm MNA pou distrik elekte pou distrik Roche Caiman, e sa se madanm Vicky van der Westhuizen, byen koni koman Mis Vicky, e osi Linda Moustache ki mon *clerk* dan sa de term manda ki mon'n servi koman Manm Lasanble Nasyonal. Mon swet zot tou boner.

Mr Speaker, nou bann patrimwann i nou bann leritaz nasyonal, i kapab ganny refer dan diferan konsepan zeneral i ganny refer koman bann byen larises e valer ki apar tyen a en nasyon.

Leritaz ekonomik nasyonal i nou kont finansman pei, e son bann byen propriyete ki nasyon Seselwa i annan drwa akse.

E osi refer avek bann lenvestisman finansyel, ki pei ek bann lezot resours Leta ki swa lekipman i annan. Tou det e lenvestisman ki Gouvernman Sesel i fer i osi tonm anba nou leritaz ekonomik nasyonal.

Mr Speaker, nou bann patrimwann i osi nou bann leritaz kiltirel ki ganny refer avek propriyete, lobze artistik tradisyonnel ki anmenn valer pou nou pei.

Bann moniman, bann sit lokasyon, e peizaz ki annan valer e fyerte pou nou pei. An zeneral nou leritaz kiltirel i nou bann byen ki son valer i anmenn lafyerte.

Me an menm tan pe dekrir nou lidantite. Par kont nou leritaz natirel i nou bann lespes ki parey bann Manm in fer resorti ki ganny trouve dan nou pei, espesyalman bann ki a plizyer lannen nou'n vwar.

Ek nou bann resours ki'n anmenn fyerte pou nou atraver son bote natirel, e son reveni ki kapab anmenn atraver son bote e lezot form larises.

E finalman, nou bann leritaz nasyonal ki osi anmenn serten valer spesyal pou listwar, e kiltir nou pei. Souvandfwa sa bann sit leritaz i ganny rekognisyon e adopte e ganny mentenir par Gouvernman Sesel.

E menm par bann lorganizasyon non-gouvernmantal, e menm prive.

Mr Speaker, apre ki mon'n zwenn Loter Mosyon e lezot Manm lo sa kote latab pou partaz en pti pe nide lo pou definir nou bann patrimwann Sesel.

Mon oule adres demann ki sa Mosyon egzize dan konteks lokal vedir dan mon kominote Roche Caiman avan mon bouz lo en pti pe nivo nasyonal.

Mr Speaker, mon bezwen deklar mon lentere koman en zanfan Sesel ki'n benefisye atraver nou bann patrimwann Sesel, espesyalman dan kominote Roche Caiman.

Mwan Audrey Vidot, pou bann zenn ki dan galeri konnen lekel mwan, ne Sanders aze 38 an ozordi, ti kit distrik Mont Fleuri, sou distrik *Corgat Estate* a laz 7 an pou vin reste dan vilaz Roche Caiman avek mon frer ek mon manman Amida Sanders.

Ki ti benefisye avek en lozman anba nou leritaz ekonomik nasyonal, sa menm leritaz ekonomik nasyonal in ede pou mon manman ki'n pas dan bokou difikilte lavi.

Me avek perseverans ek determinasyon pou fer grandi mwan ek mon frer dan son kapasite koman en manman tousel.

Koman en paran, e mon manman i enn, enn parmi plizyer, plizyer zabitan dan distrik Roche Caiman ki'n benefisye anba Gouvernman *SPPF* atraver vizyon en zonm, en dirizan ki'n anvi vwar e ofer plis loportinite pou son pep, e sa pa lot ki ansyen Prezidan France Albert Rene.

Mr Speaker, kreasyon distrik Roche Caiman i en fyerte pou pep Seselwa, akòz sa later konble ki'n devlope dan sa dernyen 30 enn lannen in enn bann patrimwann Sesel.

Menm si i annan dan lepase ti kont konblaz, e ler zot ti kont konblaz i vedir zot ti kont okenn devlopman ki ganny fer lo sa konblaz.

Alor ler serten endividi pe felisit Gouvernman *LDS* lo serten lenfrastruktir ki'n ganny konstri e dekore lo fondasyon, e teren ki son predeser in batir, pa bliye sa menm remersiman i al pou tou Seselwa ki'n la avan pou permet bann tel loportinite.

Zis parey mon'n tandey sa miray Lekol ek miray *PUC* ki ansyen Ladministrasyon Gouvernman *US* in konstri e ozordi sa zanfan Sesel ek son ladministrasyon ki pe *rule border* pe mentenir ozordi.

Dan 5 an apre 5 an dan 5enn manda, pou zot penn sa bann miray, par kont zabitan

Roche Caiman e tou lezot Seselwa i rekonnet travay ansyen Ladministrasyon *United Seychelles* pou sa konblaz, fondasyon, e devlopman ki'n ganny envestir atraver nou leritaz ekonomik nasyonal.

I kler ki ansyen ladministrasyon pa ti pe regard zis loportinite lozman, me aktivite sportif, kiltirel, e lekòl ki annan 5 lekòl lo la ozordi e aktivite ekonomik.

Si in pran 4 an pou zot vin devan pou penn de miray mon Audrey Vidot, mon pa pou esper, mon pa'n esper en manda pou mwan travay.

Mon byen eskiz zot Mr Speaker, ler *LDS* pe fer zot kanpanny politik pou al rod vot kot zabitan Roche Caiman nou annan sa pou nou dir zot.

Kote *LDS* ti ete ler Audrey Vidot, ti pe lager e met presyon pou zabitan Roche Caiman benefisye avek sa de proze lakaz 24 dan distrik Roche Caiman?

Kote *LDS* ti ete, letan Audrey Vidot, ti pe lager pou annan en plan pou gid zabitan Roche Caiman ki anvi agrandi zot lakaz?

E ki annan bokou ki'n agrandi byen zoli, pe enport pou ki i ti vote dan dernyen eleksyon, pou permet son zanfan zouir e kapab annan son prop lozman.

Mon konnen laverite i fermal pou zot plenmyen lo kote, kote *LDS* ti ete Audrey Vidot, ti pe lager pou annan logmantasyon dan alokasyon lozman pou sa bann dimoun konstri, espesyalman sa bann zenn pou zot konstri lakaz.

Kote *LDS* ti ete letan Audrey Vidot, ti pe met presyon pou proze distrik bouze? Akoz Ladministrasyon *LDS* ti pe trenn lipye.

Kote *LDS* ti ete dan sa 4 an letan Audrey Vidot, ti pe fer letour sa distrik Roche Caiman pwennvi e konsern pou zabitan Roche Caiman?

Kote *LDS* ti ete letan bann zenn ti pe antre sorti dan sa menm lofis Audre Vidot ou kapab prepar zot, ed zot *CV* fer zot *CV* e ed zot pou zot kapab sey rod enn louvraz?

Alors avan ler zot zis pas zot letan devan laport dimoun Roche Caiman, ouswa zwenn an sou sekre avek zofisye Gouvernman pou sey rod tou fason pou vin sey denigre.

E asasin mon karakter konnen pou dir Audrey Vidot i fer i vin travay dan sa manda ki'n ganny donnen e konfyé par zabitan Roche Caiman.

Mr Speaker, atraver ou Onorab Georges, in deza ganny elekte par 4 vot 4 vot Mr Speaker, e i kapab konfirm sa si i entervenir pli tar.

E i ti retourn dan Lasanble Nasyonal pa vre

Onorab Georges, ti retournen. Alors si mwan Audrey Vidot, apre tou sa travay e konfyans ki zabitan Roche Caiman in donn mwan dan sa de term.

Menm si mon ti ganny eleksyon par 5 vot mon'n antre e ankor le 27 Septanm 2025, Audrey Vidot, pou kontinyen debout a kote zabitan Roche Caiman.

(APPLAUSE)

HON AUDREY VIDOT

Audrey Vidot, pou kontinyen defann e protez patrimwann zabitan Roche Caiman, ensi ki patrimwann antye pou Sesel.

Mwan Audrey Vidot, *MNA* elekte pou distrik Roche Caiman mon pou kontinyen ede montre, kontinyen montre e ede travay avek tou sa bann administrater distrik.

Ki zot, zot ki Gouvernman *LDS* in konte avek lesey e dir zot al sey roul sa gro ros, tasyon aköz ros ler ou al zwe avek i pou kraz ou.

Mr Speaker, plizyer zabitan Roche Caiman ki'n annan son diferans pwennvi politik, i kapab konfirman ki mon pe dir. Aköz zot in konnen pou dir nenport ki moman ki zot bezwen mon sipor, mon gidans koman zot *MNA* pou reprezant Roche Caiman mon la.

E mon tret zot egalman, egalman zot tou parey san fer

okenn *polemic* politik pou viktimiz personn.

Malgre difikilte ki mon rankontre, avek plizyer lazans ek lotorite Gouvernman mon konnen ki bor lord i sorti.

Me sa pa pou fer mon lebra tonbe, mon pou kontinyen debout for e mon remersi tou bann ki la a kote mon pou donn mwan sa sipor.

Si en Seselwa ki'n fek konn valer patrimwann zanfan, e zabitan Roche Caiman pe koz ek fyerte ki fondasyon eskize Mr Speaker mon a rebran sa.

E zabitan Roche Caiman pe koz ek fyerte, wi, nou annan tou drwa koz ek fyerte pou nou distrik. Akoz nou tou ki ti la tou sa lannen nou'n donn lanmen koudmen pou nou kapab ariv kot nou ete ozordi.

Mr Speaker, Seselwa espesyalman zabitan Roche Caiman pa bliye kote nou sorti, tou sa bann ki'n donn ansyen Prezidan Rene, defen Madanm Jovanah Charles ek mwan sipor pou nou kapab lager e defann pou byennet zabitan Roche Caiman.

Nou reste fyer, fyer pou sa ki nou'n akonpli si ozordi nou bann patrimwann Roche Caiman i dan problem i gras a Ladministrasyon LDS ki li in prefere negliz zabitan Roche Caiman.

An krwayan krwar i pe met baryer dan semen Onorab Vidot, me angiz pou donn zot pou donn mwan difikilte mon *sorry* zot.

Zot in fer zabitan soufer. Be les mon a dir zot sa Roche Caiman ki zot pa ti oule i ne me apre ki Gouvernman *SPPF*, Parti Lepep, *US* in berse zot oule ozordi.

E mon'n menm ganny dir par zabitan mon distrik pou dir zot sa mark ki zot ti dir nou reste dan lakaz lapen la, ozordi *still* ozordi zot vwar zot pe lager pou vin rod sa bann menm dimoun dan sa bann lakaz lapen.

Parey Madanm Bristol in dir zot, pa vini pa borde. Akoz son soufrans ek son douler pa zot ki konnen. Mr Speaker, i annan en msye in dir ek mwan dir avek sa oponan ki pe vin debout akote ou Onorab Vidot.

Dir li sa ki i ti fer Praslin avek msye Francis la, i pa pou vin fer avek zabitan Roche Caiman. Mr Speaker, lenportans sa Mosyon se son mesaz en mesaz pou dir avek tou dirizan ozordi, e le fitir pou travay avek lonnekte, senserite, e lentegrite pou sof gard e protez patrimwann Sesel.

Dan ka mon distrik Roche Caiman i en mesaz pou Gouvernman LDS aret sa vilen manni travay deryer rido, e met *MNA* Elekte, ek son *DA*

donn zot sa respe parey zot dir zot travay ansanm.

Omwen sa bann dernyen Mwan ki reste annou montre sa lonnekte ek senserite pou sof gard e protez patrimwann zabitan Roche Caiman.

Sa osi i aplik pou nivo nasyonal. Zot pres linite nasyonal selman zot menm ki ouver laport pou divizyon.

Mr Speaker, deklarasyon Parti LDS lo linite nasyonal in anven ler zot in fer tou lesey pou denigre karakter zot prop frer ek ser Seselwa ki opoz zot.

E menm ki deside kit zot prezan get lekel ki pou mont lo medya sosyal pou denigre son ansyen koleg e *praise* ki'n *praise* dan 7 enm Lasanble.

Sa enn ki'n pran son plas, me nou lo sa kote latab nou pou, nou pa sirprann aköz i pa fer premye fwa avek sa ansyen ki ti debout pou Roche Caiman.

Zot in osi fer parey avek li, lipokrizi i apele sa, lipokrizi i apele sa.

Mr Speaker, deklarasyon promes pou bon Gouvernans in perdi de moman ki Ladministrasyon LDS in servi en pwa demezir pou gouvern pei.

Sa bann swadizan pratik, bon pratik pou fer pli byen avek nou leritaz ekonomik nasyonal, pe fer Seselwa lev plizyer keştyon e annan dout ki nou bann resours ki pe

ganny byen parta- ki nou bann resours i ganny byen partaze.

Deklarasyon promes pou lazistis in perdi, de moman kot bann dirizan LDS i ganny proteze, e montre ki zot par lao Lalwa. Kontrerman avek sa sitwayen ki ti met son konfyans dan sa bann menm dirizan ki'n koz zot en kantite mansonz konsernan zot drwa.

Apre tou sa bann zil, sa bann zoli parol lo deklarasyon ek promes zot *manifesto* Gouvernman LDS in *fail* pou delivre. Zot in menm *fail* pou fer Seselwa apresye ki Sesel i son pei.

E lenportans ki i annan dan son pei. Etranze ki annan larzan pou ofer plis i pas koman priyorite.

Alors sa Mosyon pe egzize ki bezwen komans la konmela menm avek sa Gouvernman dan sa bann dernyen pti letan ki reste zot.

Ler *United Seychelles* pou antre dan Gouvernman le 27 Septanm 2025...

(APPLAUSE)

HON AUDREY VIDOT

... nou, nou pou oner nou langazman atraver sa Mosyon.

Nou bezwen donn bon legzanp pou ki sa ki pe swiv i vwar sa langazman e senserite, me non pa les nou bann patrimwann nou bann

patrimwann tonm dan lanmen etranze zis parey sa bann *Villa Maia* ki nepli pou nou Sesel - zis parey sa bann disab ki mon koleg Onorab Gabriel, in fer resorti ki Seselwa nepli kapab anmenn nou bann disab, nepli kapab zouir lo zil *Ile Long*. Mr Speaker, menm si mon ti ava annan bokou pou dir dan sa Mosyon mon oule konklir avek detrwa mesaz.

Souvandfwa nou tann politisyen pe demann avek sitwayen pou pran zot responsabilite, pou protez e sof gard nou bann patrimwann.

Politisyen i edik sitwayen lo lenportans valoriz nou bann patrimwann, ki i byen aköz sa i nou drwa fondamantal ki preskri dan nou Konstitisyon i nou responsabilite koman bann sitwayen Sesel pou onor e respe sa bann drwa.

Me i osi aplikab pou nou politisyen, ki pa bliye nou'n sermante pou defann sa menm Konstitisyon.

Alor i nou responsabilite pou pratik sa ki nou prese, e dan konteks sa Mosyon se travay avek lonnekte, senserite, e lentegrite pou sof gard e protez tou nou patrimwann Sesel, dan antyerte pou benefis nou bann fitir zenerasyon.

An terminan, mon annan sa pou mwan dir avek Loter Mosyon, Onorab Loze, mon

pou siport sa Mosyon aköz mon senserman krwar dan son lenportans.

Mon rekomande ki Gouvernman aktyel e byensir nou Gouvernman ki pe vini apre le 27, i kre plis loportinite pou Sesel agrandi son ban patrimwann.

Mon demande, -mon'n deza demande avek sa Gouvernman aktyel dan Lasanble Nasyonal a plizyer repriz, ki nou osi nou valoriz en pti pe plis nou bann, nou bann leritaz annou pa zis fer li lo larzan lo bann *coin* ek rounpi, bann *coin* rounpi.

Ouswa atraver nou bann tenm, me osi annan plis nou bann idantite, nou bann, nou bann aki ki ganny fer dan form skiltir ki kapab ganny mete otour lavil Victoria.

Ou menm dan nou kominote ki kapab e lev, e donn en ledikasyon nou bann zenn e menm en latraksyon touristik.

Menm parey mon pou demande ki bann lenfrastruktir ki osi ganny konsidere ki ganny renouvle dan pei, i osi annan sa latous kreol pou nou kapab re monte nou idantite koman Seselwa.

Fer parey bann pei parey Lasin, *Uzbekistan*, e kot nou valoriz zot valoriz zot kiltir e bann zenn ki bann anbasader ki koz lo nou bann byen pei.

Lo sa pwen Mr Speaker, mon oule felisit tou dimoun ki'n donn mwan zot bann pwennvi dan mon distrik, pou mwan kapab fer resorti zot bann pwen atraver sa Mosyon.

E mersi pou tou bann dimoun ki'n swiv nou deba depi bomaten. Mersi Mr Speaker.

(APPLAUSE)

MR DEPUTY SPEAKER

Mersi Onorab. Avan ki nou al *break* parey mon ti'n dir zot ki nou ti'n demann bann Manm ki oule koze pou endike.

E alor apartir la dezormen mon lalis i fermen. E ler nou retournen apre *break*, tou bann entervenans pou ganny selman 15 minit pou koze, pou nou kapab fini avek sa Mosyon enkli *right of reply*, 5 er si pa en pe apre 5 er.

Donk bann Manm ki reste lo lalis, i annan Onorab Uranie, Onorab Woodcock, Onorab Roucou, Onorab Bastienne, Onorab Loizeau, Onorab Labonte, Onorab Aglae, Onorab Naidu, Onorab Georges, Onorab Arissol.

E parey mon'n dir mon lalis in fermen, mon pa pe pran ankor. E zis pou lenformasyon Lasanble e osi benefis bann etidyan ki dan galeri lo anba *Order 59*.

Content of speech i dir "a *Member shall confine his or her*

observations to the subject under discussion and may not introduce matters not relevant thereto.

Sa i en pou bann etidyan dan galeri, zisteman parey pou bann ki pe al fer zot *IGSCE* ouswa *A Levels* ler zot pou ekrir ler zot pou ekrir *essay*. Zot bezwen koz lo topik ki zot in gannnen, e ou pa anmenn keksoz.

E Loter Mosyon in dir nou, e sa pwen ki mon pou re met devan Lasanble pou zot reflesir lo la dan *break*, se ki son Mosyon i en refleksyon lo fitir pei.

I oule ki i sisit en deba lo fason pep i anvi ganny gouvènen dan lavenir, ki mannyer nou partisip dan sosyete, dan nou la demokrasi e in dir i en refleksyon lo lavenir lo kalite Sesel sosyete pep Seselwa e Gouvènmman ki nou le.

Se sa ki son Mosyon i lo la, mon nou pou pran *break* la, e nou pou retournen 11er kar. Mersi.

(BREAK)

MR DEPUTY SPEAKER

Bonzour tou dimoun, e *welcome back*. Nou pe kontinyen avek deba lo Mosyon prezante par Onorab Johan Loze. E koman bann Manm i konnen laklos

Lasanble pa pe fonksyonnen an se moman.

So, ler nou pou donn en ler pou nou re zwenn zis asire zot la sa ler, pou nou pa pli tarde prosen enterven an ki lo lalis Onorab Woodcock.

Onorab Woodcock, e parey mon ti dir tyek zot ler nou pe respekte letan *maximum* 15 minit akòz lakantite Manm pou nou kapab fini sa Mosyon ler ki nou merit fini, mersi.

HON WAVEL WOODCOCK

Mersi Mr Speaker. Mr Speaker, sa Mosyon ki devan nou pe demann Gouvernman nou Gouvernman nou administrasyon pou travay avek lonnekte, senserite, e lentegrite pou sof gard e protez patrimwann Sesel dan son antyerte Mr Speaker, pou benefisye nou zanfan dan le fitir.

Sofgard, e protez patrimwann Sesel Mr Speaker. Premyerman kwa ki nou apel nou patrimwann? Ki si sa nou patrimwann? I annan bann Manm ki'n koze avan mon.

In eksplik en pe ki si sa nou patrimwann, nou leritaz, nou kiltir, nou listwar, nou tradisyon, nou dimoun, nou kreolite, nou fason viv, nou langaz bann sit istorik nou ladans, nou peizaz, nou bann *natural landscapes*, nou bote natirel, nou zil, nou pei.

E pli enportan Mr Speaker, se nou menm nou dimoun Seselwa. Kot en zenerasyon i pas tou sa bann keksoz avek en lot zenerasyon.

Mr Speaker, le kestyon ki mon bezwen demande la bomaten se ki vre bi, e ki vre lentansyon sa Mosyon bomaten?

Bokou bann enterven an ki'n koze avan mon en kantite zot pa'n al preski ditou lo Mosyon. Zot annan en senp Mr Speaker, zot annan en senp Lobzektif la bomaten Mr Speaker, mon a dir ou akòz zot anmenn sa Mosyon.

Sa Mosyon i zis en leskiz pou zot lev bokou bann size *polemic* pou zot ganny *mileage* politik. Akòz Mr Speaker, a plizyer repriz zot bann *PNQ* in *fail* in fize dan Mardi bomaten.

Zis parey sa *PNQ Nyala* yer ki zot in sey anmenn kan zot loter zot ki ti peye an 2019 pou pey sa *Nyala* ki ozordi nou Gouvernman in erit en lot lepokase ankor.

PNQ Zwe de Zil ankor ki zot in anmenn ki dayer zot ti pe swete i *fail* Mr Speaker, la ozordi ou vwar zot vini avek en Mosyon ki Mr Speaker, i pa avek bon.

Mr Speaker, *Beach Soccer World Cup* Mr Speaker, ki zot ti anmenn kestyon lo *Beach Soccer World Cup* ki zot ti anvi i *fail* ki'n en sikse Mr Speaker, zot ti anmenn en

PNQ ankor ki'n fize Mr Speaker.

Zot ti anmenn *PNQ* lo Assumption ki selman 5 poursan later pe ganny *lease* pou fer proze lotel Mr Speaker.

Kan zot menm zot, zot ti anvi vann nou zil avek Lenn pou fer baz militer, ki Sesel pa ti pou benefisye pou en sou Mr Speaker.

Lentansyon sa mosyon se senpleman pou fer politik bonmarse avek detrwa size ki zot krwar i pou donn zot pwen politik deor - *mileage* politik.

Mr Speaker, si nou asize nou get dan listwar nou pou vwar kantite zil kantite propriyete Mr Speaker, ki *SPPF*, *US* in vann ouswa in *lease* avek etranze.

En kantite etranze, en kantite *business* lakonpannyen in *lease* later Sesel anba Ladministrasyon *US* pou fer lotel, e osi anba Ladministrasyon *LDS* i annan bann later ki'n ganny *lease* avek bann etranze, nou apel sa *foreign direct investment* ki'n benefisye nou pei Mr Speaker, plizyer lakonpannyen plizyer dimoun in aste later Sesel pou fer bann lotel ki Seselwa pe travay ladan ki pe kontribye direkteman dan lekonomi nou pei.

Me in osi annan bokou labi anba *US* Mr Speaker, *lease* nou zil pou R 1, parey

Ste Anne vann plizyer nou bann zil parey Assumption, Daros, Felisite, e lezot.

In annan bokou labi dan nou later ki nou patrimwann nasyonal Mr Speaker, nou later i nou patrimwann Mr Speaker, labi nou tou nou konnen kan ti komanse.

Deswit kan zot ti antre o pouvwar Mr Speaker, atraver koudeta zot ti komans atraver *Cosproh* kot zot ti sezi later bann dimoun ki pa siport zot.

Sezi later bann ki pa ti avek zot, e parti politik ozordi ki annan plis later se zot menm *United Seychelles* Mr Speaker, ki'n pran bokou later Mr Speaker 46 bout later ant 96 ziska 2017.

69 mil met kare later plis ki 17 arpan later. E konbyen zot in peye Mr Speaker? R5.7 milyon ki dan rapor Oditer Zeneral. R5.7 milyon pou 69 mil met kare later plis ki 17 arpan, e napa okenn rapor evalyasyon sa bann later. E ozordi zot pe vann sa bann later pou 7 milyon, 15 milyon, 20 milyon i annan en bout zot pe rod plis ki R100 milyon Mr Speaker.

La o bor nou kot *JJ Spirit* la mannyer i apele la akote nou la? Espace zot in vann sepa konbyen milyon Mr Speaker, 20 milyon? 100 milyon Mr Speaker, ou kapab krwar?

La ozordi zot pe koz ou nou patrimwann bann later ki nou ti kapab partaze donn Seselwa fer proze lakaz Mr Speaker, ki ti pou benefisye plizyer nou zabitan.

Enkli Payanke Onorab Gill, in koz lo, lo later nou leritaz bann proze lakaz, wi proze lakaz in ganny fer proze lakaz nou pou kontinyen fer Mr Speaker.

Me, Moulinyen, Payanke kot ti anna bann *gym* ki deservi bann zenn ek bann *Housing Estate* Moulinyen, ki zot in fer? *US* in vann pou ankor milyon Mr Speaker.

Eski zot napa lentere sa pep aker? Pa nou patrimwann tousala? Sa bann later nou patrimwann ti kapab ganny *allocate* avek plizyer Seselwa.

Zot annan zot Minis Mr Speaker, ki'n pran 40 ekek bout later Mr Speaker, ki anba lenvestigasyon ozordi. Pa nou patrimwann tousala Mr Speaker?

Later ek lakaz parey mon'n dir tou Gouvernman i bezwen fer, nou Gouvernman in fer e nou Gouvernman pou kontinyen fer apre *LDS* pou kontinyen fer apre Septanm 2027.

Nou pli gro patrimwann pli enportan Mr Speaker, se nou pep eski zot ti ganny sof garde anba Ladministrasyon *US* Mr Speaker? Bokou

soufrans viktimizasyon ek nou pa ek nou.

Perdi zot lavi, fors an egzil, nou dimoun i nou patrimwann nou bezwen respe zot. Eski zot ti ganny respekte anba *US* Mr Speaker?

Sa Mosyon in al dan tou direksyon ziska laz pansyon Mr Speaker, en lot topik ki zot kontan koz lo la, zot in al lo la.

Menm si Prezidan Faure ek son Minis sa letan ansyen Minis Lalande, Minis Lalande ti anonse ki zot pou bezwen ogmant zot laz pansyon.

E la ler in ogmante ozordi, zot vini zot zwe bon boug avek nou, me pa zot ladministrasyon ki ti la? Mr Speaker, fodre pa zanmen bliye ki sak fwa ti Prezidan lanniverser far France Albert Rene zot ti donn R50.

Nou ki nou fer? Nou met presyon pou ogmant laz pansyon, e nou fek ankor la an Avril nou'n donn ankor 7poursan logmantasyon lo pansyon.

Lo size vann zil Mr Speaker, parey mon'n koz lo la depi bomaten lanfaz in ganny met bokou, e sa i enn zot vre lentansyon lo size Lasonpsyon Mr Speaker.

Annou pa bliye ki zot Prezidan, ex Prezidan Faure, ti al zwe sitar Lenn pou Prezidan Modi, Modi ou rapel? Pou li vann nou zil Lasonpsyon ti *deal* ti fini ganny fer.

Si pa *LDS* si pa nou ki ti met nou lipye ater ti dir non, nou pa pou vann nou zil pou fer baz militer.

La ozordi zot vin lager avek nou aköz 5 poursan pou nou fer proze lotel lo Lasonpsyon ki dayer in ganny arive lo plizyer zil, e lo later Sesel Mahe, lo nou bann gran zil.

Mahe, Praslin, La Digue kantite proze lotel in ganny fer ki pe benefisye nou pei ozordi, sa i montre bann ipokrizi ki nou vwar *US* i toultan anmenn zot sey fer dan sa Lasanble.

US ozordi Mr Speaker, zot anvi pran kredi pou tou keksoz tou sikse Ladministrasyon *LDS*, me selman zanmen zot pare pou pran kredi tou bann atosite ban move keksoz ki zot in fer.

Koman en keksoz i ganny fer pe bouz lo sey pran kredi *Beach Soccer World Cup* ti zot vizyon, ti zot nide zot ki ti pou fer tousala.

La ozordi, zot vini ek en Mosyon pou lager avek nou pou bann keksoz ki zot in fer bokou pli *worse* ki nou, nou'n bezwen korize parey size *Ile Long* sa *lease*, ki nou ti bezwen kase ozordi pou nou kapab koman en pei benefisye avek nou zil *Ile Long*.

Sak proze ki komanse ouswa konplete Sesel dan bann distrik sete zot vizyon, zot nide, zot vizyon, vizyon 20

an, 30 an, 40 an bann vizyon 2,000 zanmen Mr Speaker, ki ozordi nou Gouvernman in pran aker.

Nou'n travay lo la, nou'n fer promes, nou pe delivre. E sa nou'n fer nou'n fer li dan mwens ki 5 an, e dan ankor 5 an zis anmase ankor 5 an, 5 an kot nou napa *COVID* ki plis ki sa Ladministrasyon *LDS* i kapab fer ankor?

Lopital La Digue i en ki zot ri fer petisyon Mr Speaker, la ozordi pe pran kredi i dir sa ti son vizyon, sa ti vizyon ti vizyon *US* vizyon, vizyon Mr Herminie.

Mr Herminie, *VTS* tousala konbyen letan zot in promet sa 15 an, 20 an, *Carnegie* tou bann fasad ki ti pe tonm an rin ozordi *NIHSS*, Libreri Nasyonal, lalis i long Mr Speaker, pou montre ki nou en Gouvernman responsab ki'n vini nou'n met prop, nou'n aranz bokou bann keksoz ki ti pe tonm dan bann leta deplorab.

Bokou sa bann batiman nou patrimwann Mr Speaker, kwa ki Gouvernman in fer pou sof gard nou patrimwann? Remet sa pei lo son lipye kot tou Seselwa i kapab ganny en lasyet manze ozordi.

Kot nou kof i vid Mr Speaker, nou'n re ranpli Mr Speaker, nou pei ti en kales kase ler nou ti erite nou'n netway koripsyon dan tou

bann biro Gouvernman, lalis i long bann landrwa kot ti anna koripsyon dan bann diferan biro Gouvernman.

SBSA, Linyon, menm dan simityer zot ti pe vole *ASP* partou depi dan *NDA* ou rapel, tou bann koripsyon ki ti pe arive ki nou Gouvernman in vini in netway koripsyon pou fer sir ki benefis, ki larzan pe pep Seselwa i ganny zere dan en fason ki byen e ki al pou benefis lepep Seselwa.

Mr Speaker, ki *LDS* in fer? Nou'n *improve* kredibilite Sesel lo nivo enternasyonal. Nou pa pe ganny apele voler, nou ganny *trust*, *IMF* pou donn nou larzan bann pei pare pou pret nou larzan e pare pou donn nou *grant*.

Akoz larzan pa ganny disparet i pa sorti dan en kont Sesel pou al dan en kont etranze Mr Speaker. *Beach Soccer World Cup* get konfyans ki *FIFA* in met dan nou ki ozordi nou'n vwar en *World Cup* en mervay Mr Speaker, kot nou vwar sa lanbyans kreol, nou sanson nou bann patrimwann.

Nou bann sanson in ganny valorize in ganny *portrait* partou dan lemonn, zot in vwar nou labote, labote nou pei Sesel ler zot pe get sa *arena* Mr Speaker. Tousala se sa ki nou Ladministrasyon *LDS* in fer. se pa sikse sa?

Sa se pa bann fason ki nou pe prezerv e promot nou patrimwann o nivo enternasyonal Mr Speaker? Koup gaspiyaz Mr Speaker, ozordi tou dimoun i bezwen travay - sa bann zafer asize se zot viv lo *welfare* zis lo *welfare* pou 5 an, 6 an, 10 an dimoun lo *welfare* Mr Speaker.

URS en program ki bokou bann zenn ti is la parey Onorab Loze, ti dir ler *URS* ti la bann zenn ti ganny anvoye pou al netway bin *site* Mr Speaker, koumsa zot ti valoriz nou zenn Mr Speaker, ki zot la asize, me ozordi nou Gouvernman pe met lanfay pou *re skill* nou bann zenn.

Ed zot ganny en lanplwa travay fer sir ki tou nou bann zanfay i al lekol, i al etidye sa ki al etidye aletranze zot ganny kouver zot *allowances*, e tou sa bann keksoz i bann benefis ki nou Gouvernman in kontinyen donner.

Mr Speaker, en ta keksoz ki zot ti dir nou pou aret fer; *LDS* pou aret fer lakaz, avyon pou aret apoze, Seselwa pou mor lafen, Seselwa pou *struggle*, nou pei pa pou bouz devan nanryen pa pou ganny fer nou pou *fail* dan tou *level*, *US* pa ti dir sa?

Be ki'n arive ozordi? Nou vwar totalman le kontray Mr Speaker, ou vwar nou ozordi pe re pey nou bann det, bann det plis ki 30 an Mr Speaker.

Nou vwar *IMF* pe *praise* Sesel pou bon zesyon nou lekonomi, nou vwar kot Sesel ti sov nou *International Airline Air Seychelles* Mr Speaker, ki ti'n faid Mr Speaker, ki ti'n antre dan ladministrasyon, Nou'n sov nou *Airline* en lot nou patrimwann nasyonal Mr Speaker.

Ozordi *Corruption Perception Index* Sesel ozordi get nivo nou'n arive ozordi nou par devan tou pei Lafrik, nou pe bat menm bann pli gran pei dan lemonn parey Lanmerik, Langleter.

Lenvestisman ki nou'n fer dan nou lapas tradisyonnel en lot nou patrimwann ozordi Mr Speaker, sa kantite proze ki pe ganny fer dan tou bann distrik ki bann peser artizanal pe benefisyé Mr Speaker.

Lalit kont drog Mr Speaker ; fodre pa bliye anba *watch US 6 mil addict* ti annan dan nou pei Mr Speaker, 6 mil *addict* Mr Speaker, e fodre pa zanmen bliye pou dir ti annan Manm dan sa Lasanble Nasyonal Onorab Audrey, ti vin defann en *Escobar* - Nasim dan sa Lasanble Nasyonal annou pa bliye Mr Speaker.

Mr Speaker, mon pe set pas i a fer son *point of order* apre. Mr Speaker, i annan en *miss* i anna en persepsyon ki Onorab Audrey, in sey pase ozordi in sey anbet sa pep deor la ki mon bezwen korize.

In dir koumsa pou dir Onorab Goerges, Onorab Georges osi in deza ganny zis 4 vot i pe konpar li avek Onorab Georges, i ti *win* eleksyon par zis 4 vot eskiz mwan.

Onorab Georges, dan letan difisil ti antre Les Mamelles avek 4 vot, me i pa'n sorti lo sa 4 vot pou li desann Mr Speaker. In sorti lo 4 vot dernyen eleksyon i *win* par 350 vot, i sorti 4 vot pou ariv 350 ozordi.

Onorab Audrey Vidot, ler i ti ganny i ti ganny elekte li i ti ganny elekte an 2016 par 262 vot, an 2016 e an 2020 in desann sorti 262 pou vin 5 vot ki lepep Roche Caiman ti pe dir li Mr Speaker?

So, ou pa kapab konpar ou avek Onorab *Leader of Government Business*, ou pa lo menm nivo, ou pa menm kategori.

So, kwa ki nou Gouvernman pe fer dan lefitir pou sof gard nou patrimwann? Anpes sa bann voler retourn ankor Mr Speaker, anpes zot donn bal dan nou later ankor parey zot ti fer anpes zot bat nou latet, anpes sa bann bandi sa bann atoufer Mr Speaker, vin fer sa pep soufer ankor.

Ki nou Gouvernman pe fer Mr Speaker? Envestir dan plis fasilite ki pou devlop nou pei. Nou pe kontinyen prezerv

nou lanvironnman nou lanmer semenn pase nou fek pas enn *Fisheries and Aquaculture Bill*, 2025 ki pou sof gard nou lanmer osi.

Nou'n zisteman resaman nou fek ouver en *Sant Coral Restoration Farm* Mr Speaker, *Vallée de Mai* ozordi dan lepase pa ti pe kontribye nanryen lo Praslin ozordi ou vwar *Valle de Maie* pe kontribye dan lasante pe fer *sponsor* dan lasante, pe investir dan lekol pe investir dan lanvironnman pe investir dan *fire brigade* bann lekipman anka dife.

Nou Gouvernman pe asire ki nou zenn i ganny sa bon ledikasyon parey nou ti fer apre *COVID*, 2 *batch* zenn ti al etidye aletranze.

Proze lekol pe ganny fer partou lo Mahe, Praslin, La Digue en lot proze lekol zot pe gannyen. Goute pou nou zanfàn nou bann pti patrimwann Mr Speaker, zot pe ganny goutte ozordi.

Nou pe kontinyen repar tou bann Sant Kominoter partou lo Mahe, Praslin, La Digue nou pas benefis Mr Speaker, lo nou pep anmezir ki nou lekonomi i aranze.

2023 nou ti ganny 10 pòrsan, sa lannen an Avril nou donn ankò 7 pòrsan ki fer 17 pòrsan ki nou'n donner Mr Speaker, pandan mwens ki 5 an Mr Speaker,

pandan sa bann letan ki nou'n la menm si sa pei in fer fas avek en kriz ekonomik, nou'n fer bokou plis ki ladministrasyon avan in fer, nou'n fer bokou plis avek mwens.

MR DEPUTY SPEAKER

Mon ti dir 15 minit, *your 15 minutes is now.*

HON WAVEL WOODCOCK

Pres pou fini en. Mr Speaker, en kantite nou Gouvernman in fer ozordi nou moutya i en partenarya enternasyonal Mr Speaker, e fotespere nou war nou bann lezot ladans nou bann lezot tradisyon i ganny sa promosyon aletranze.

Pou konklir Mr Speaker, si vreman Mosyon ti annan lentere sof gard nou leritaz nou patrimwann mon ti a siporte Mr Speaker. Me sa Mosyon pa'n vin avek bon lentansyon, bi se pou fer politik bonmarse avek vant dimoun par bann move dimoun Mr Speaker, pe demann nou Gouvernman pou travay avek lonnekte ki dayer nou Gouvernman deza pe fer Mr Speaker.

Nou deza pe travay avek lentegrite Mr Speaker, nou pa pe vol sa pep, nou pe zer larzan Lepep Seselwa byen e nou pou kontinyen prezerv dwa nou pep e nou bann patrimwann nasyonal, avek sa

de mo mon dir ou mersi Mr Speaker.

MR DEPUTY SPEAKER

Mersi Onorab. Si mon kapab fer en pledwari from the Chair, Madanm Clerk, posibilite nou met en *TV* la avek en *run down clock*. Mon ti al en *training* en fwa Malezi, zot ti fer en *fake Parliament* e nou ti servi sa.

Sov mon avek bann Manm pou dir zot, zot letan in arive, zis pou met en *TV* la avek en *run down clock* ki nou operate from the phone *Bluetooth* konnekte marse normal. Onorab Vidot, ou annan en *point of order*.

HON AUDREY VIDOT

Mersi Mr Speaker. Mon annan en *point of order 49*. Anba *order 49*, mon le demann ou pou demann avek Onorab Woodcock, pou *retract* sa alegasyon ki'n fer kont mwan.

I pa fer premye fwa Onorab, i fer sa i pe *impute improper motive* lo mon koman en Manm lo sa size drog. Mersi Mr Speaker.

MR DEPUTY SPEAKER

Mersi Onorab. Onorab, in dir en kantite keksoz li i ti pe koz vit i annan ki mon'n sey sezi egzaktaman ki'n dir egzaktaman?

HON AUDREY VIDOT

Onorab, in fer en alegasyon kont mon koman en Manm Elekte dan sa distrik, mon distrik konmkwa ki mwan mon *involve* mon soutir drog mon'n deza anmenn keksoz dan Lasanble.

Kot mon ti anmenn en let pou mwan zis pou demann Gouvernman pou kestyon lo serten size, pa siport okenn dimoun konsernan droger ti ava byen Onorab, i *retract*.

MR DEPUTY SPEAKER

Ok. Mon konpran ou. Onorab, lefe ki in mansyonn ou annan en keksoz pou dir ou ti pe *impute* poudir i annan konneksyon avek trafiker drog?

HON WAVEL WOODCOCK

Non-Mr... Wi, Mr Speaker. Annefe i ti anmenn kestyon lo Nasim ki ou rapel ti ganny fer kit Sesel aköz bann zafer drog non? Sa ki mon ti pe fer referans avek, i lo rikord.

MR DEPUTY SPEAKER

Wi, me sa ki i pe dir devan Lasanble se ki i napa, i napa okenn konneksyon avek okenn trafiker. So, si ou ti kapab zis *retract* sa pou nou retourn lo-

HON WAVEL WOODCOCK

Mon *retract* ki mon'n dir *involve Escobar* Nasim.

MR DEPUTY SPEAKER

Mersi. prosen enterven an lo mon lalis, mon lapriyer i reste *Order 59, content of speech*. E nou konn byen Mosyon ki pe dir nou, Onorab Romain. *15 minutes please, thank you.*

HON GEORGES ROMAIN

Mersi Mr Speaker. Bonzour tou Manm koleg Onorab, e tou dimoun a lekout. Mon ti a kontan pran laparol pou fer serten klarifikasyon lo sa Mosyon anmennen par Parti Lopozisyon, isi dan sa Lasanble, Onorab Loze.

Premyerman mon anvi met lanfaz lo en pwen kle, Gouvernman LDS depi ki'n vin o pouvwar an 2020, in toultan travay pou asire ki lentere nou pep e son bann sitwayen i toultan vin an premye.

Priorite pou sa Gouvernman LDS in toultan pou fer sir ki pei i al an avan, e ki nou pei i toultan devlope dan en fason ki dan lentere nou pep.

Alors Mr Speaker, mon santi ki nou pa neseserman bezwen en Mosyon parey sa enn ki devan nou ozordi pou demontre ki nou Gouvernman i travay avek lonnekte, senserite, lentegrite akòz Mr Speaker, nou deza pe fer li.

E i annan plizyer levidans pou demontre sa, pou mwan i sanble ki Lopozisyon in bliy en kantite ki ti pase

anba zot ladministrasyon pou 43 an.

I paret ki swa zot pe zwe bliye, oubyen zot pe esey vin konfiz pep Seselwa e fer zot krwar LDS ki pe mal travay, e alors zot ki bezwen vin donn nou leson.

Mr Speaker, larealite i la levidans lepase i la, e sete anba zot prop ladministrasyon ki bann move pratik ti renye sete leer zot ti o pouvwar ki keksoz ti ganny fer an kasyet.

Keksoz ti an dezord, ti napa la transparans e nou ti vwar ki koripsyon ti'n anvair nou pei. E annou pa bliye Mr Speaker, ki zot ti pe deza vann Sesel bout par bout.

Enkli zot menm koman en parti politik ki'n pran plizyer bout later ki pou sa pep, e ozordi pe revann pou 2 milyon e de milyon.

E pe fer gro profi lo byen pep Seselwa, sa bann kare later i ti'n kapab bann morso later ki ti'n kapab ganny devlope pou byennet nou pep pou plizyer bann devlopman.

Tel parey fer lakaz pou nou pou nou zabitan e lezot lenfrastruktir ki ti'n kapab benefisye sa bann kominote.

Annou pa bliye Mr Speaker, sa i osi enkli *Maison du Peuple* ki ozordi zot pe fer dominer avek, e pe dir ki sa i pou zot e zot pa pou rann.

Eski sa pa ti en kado sorti kot Gouvernman Alzeri

pou pep Seselwa? Ki mannyer ozordi i pou en parti politik? Sanmenm sa kalite parti politik ki anvi retourn o pouvwar pou zot kontinyen abiz lo byen pep Seselwa.

E la ozordi zot annan kouraz pou vin dir nou ki fodre nou fer keksoz ek lentegrite, senserite e pou benefisye nou fitir zenerasyon.

Mr Speaker, sey dir ou kote nou zenerasyon in benefisye ler zot in pran sa ta kare later pep Seselwa e zot pe vann ozordi? E pare mon'n dir pe fer bann gro profi pou zot parti politik.

Mr Speaker, annou pa bliye ki Sesel ti ganny li \$50 milyon pou sa later La Misère sa ti pou pep Seselwa.

Savedir ou kapab konsider li koman enn nou patrimwann, en keksoz ki pei in gannyen. Eski *US* i kapab dir nou kote ki Seselwa in benefisye ler sa \$50 milyon ti disparet anba zot *watch*?

E si nou apel a sa letan kan sa larzan ti disparet nou pei ti dan en gran bezwen, e sa larzan ti'n kapab anmenn bokou benefis pou nou popilasyon.

Eski sa disparisyon in ganny fer dan senserite, pou lentere nou pep? Eski zot ti pe mazin sa a sa letan? Sey eksplik nou ki mannyer Seselwa in benefisye ler zot in vann nou zil ek Mr Silva enkli

930 ek ta later lo Coetivy an Oktob 2008.

Mr Speaker, ler zot ti fer *deal* Ste Anne eski negosyasyon pou *lease* sa zil pou R1 i ti fer dan en lentere pep Seselwa?

Eski sa letan zot ti pe reazir pou met pep Seselwa an premye? Eski ler zot in vann nou zil nou fitir zenerasyon in benefisye? Eski sa menm eski sa menm travay ki zot ti fer ek lonnekte ek senserite?

Eski sa i demontre lentegrite dan sa ki zot ti pe fer? Eski zot ti pe donn bon legzanp? Ki la ozordi zot pe vin met sa Mosyon devan nou konmsi nou pe fer parey zot.

Mr Speaker, en lot pwen ki petet zot pa mazin Mr Speaker, konbyen *passport* ki in vann pou zot prop byennet, e byennet zot bann dalon?

Eski nou nasyonalite pa ti nou patrimwann? Eski zot pa ti vwar valer pou protez nou idantite a sa letan? Mr Speaker, sanmenm sa ki ou apel en vre lipokrizi.

E i enportan pou fer pep Seselwa konnen ki *LDS* pa'n zanmen vann okenn *passport* depi ki ler in vin o pouvwar an 2020.

O kontrer Mr Speaker, letan Gouvernman *LDS* in vin o pouvwar an 2020, sete la ki nou'n al dekouver sa bann manboulouk ki zot ti pe fer.

E dir granmersi *LDS* ki'n vin o pouvwar lizye Seselwa, e la in ouver lizyer Seselwa e de la nou kapab komans aranz keksoz.

Mr Speaker, pandan sa 4 an ki Gouvernman *LDS* in o pouvwar, nou'n kapab demontre nou kapabilite pou diriz sa pei, e remet sa pei debout avek en direksyon kler e koman en Seselwa.

Ozordi mon debout fyer pou lakonplisman ki Gouvernman *LDS* in nobou atenn pandan sa pti git letan. Sanmenm sa ki nou dir ki nou kit li lanmenm, e *there's no turning back*.

(APPLAUSE)

HON GEORGES ROMAIN

Mr Speaker, nou zefor in ganny rekonnet osi lo nivo enternasyonal. lannen pase mon krwar ki tou Seselwa ti fyer pou aprann ki Sesel ti'n amelyor son pozisyon lo *Mo Ibrahim Index* dapre rapor 2024.

Pou bonn Gouvernans dan Lafrik, annefe parey ti'n ganny dir nou'n sorti premye dan Lafrik parmi 54 pei pou lannen 2023, e annefe Mr Speaker, Sesel in ganny rekonnet koman enn sa pei ki'n fer plis amelyorasyon dan bonn Gouvernans.

Mr Speaker, sa i pa montre ki nou fer bokou

progre lo lafason ki nou pe fer keksoz dan sa pei?

En lot pwen enportan se *Transparency International 2024 Corruption Perception Index* ki Sesel in akonpli en score 72 lo 100.

E sa in fer ki Sesel i parmi bann pei ki'n *perform* pli byen dan *Sub Sahara Africa* e 18enm globalman. Eski sa i pa montre ki Gouvernman *LDS* i konpetan?

Sirtou ler nou vwar nou bann, nou vwar nou koman en pti pei ki par devan bokou bann lezot gran pei enkli Lanmerik ?

Eski sa pa i montre nou progre koman en pei ler Gouvernman *LDS* pe fer keksoz dan latransparans. La tou resaman Lafrans in retir Sesel lo *blacklist* pou bann pei non korporativ pou zis ziristriksyon *tax*.

Sa devlopman Mr Speaker, i demontre langazman ki Sesel i annan pou latransparans konformite e koperasyon dan zefor *tax* enternasyonal.

Mr Speaker, ozordi anba Gouvernman *LDS* Sesel i annan stabilite, e nou ranforsi bonn Gouvernans e tou keksoz pe ganny fer dan latransparans.

E nou pe fer sir ki napa okenn labi dan sistenm. Se sa rezon ki nou koman bann

Manm *LDS* nou vwar ki sa Mosyon pa fer okenn sans.

Akoz i pa reflekte larealite ozordi, e pa reflekte sa travay ki nou Gouvernman pe fer pou met Sesel lo en bon semen.

LDS pe kontinyen travay dan lentere Seselwa pou sekirite e devlopman pei, pou mwan sa Mosyon i *valid* i mank laverite e konprenezon lo keksoz ki'n deza pase.

Alors mwan pa pe donn okenn sipor pou en tel Mosyon. Mr Speaker, avan mon terminen mon ti a kontan zis fer resorti ki en Manm lot kote in fer resorti ki Seselwa pe plere anba Gouvernman *LDS*.

E mon, mon annan sa pou mon dir li, Gouvernman *LDS* pa'n zanmen fer okenn Seselwa plere. O kontrer anba ansyen Gouvernman bokou, bokou Seselwa in plere.

E sa nou konnen aköz zot in plere, i annan ki'n perdi zot fanmir, i annan ki'n parey nou dir in ganny disparet, viktimizasyon ou pa ganny travay Mr Speaker, tro bokou pou dir.

Be anba Gouvernman *LDS* nou pa'n zanmen tande okenn Seselwa in disparet, okenn Seselwa in ganny touye.

Si ou pa travay i pa Gouvernman *LDS* ki anpes ou travay, sa i ou Mr Speaker. En lot keksoz Mr Speaker, mon'n

tande lot kote latap osi in fer resorti ki nou bezwen protez nou bann vye batiman.

Mr Speaker, dir mwan lekel Gouvernman ki pe protez nou bann batiman dan nou pei, se pa lot ki Gouvernman *LDS*.

E Mr Speaker, mon pa pou nonmen aköz i annan tro bokou pou nonmen. E alors Mr Speaker, mon anvi dir ek Loter Mosyon in dir ki i pe demann Gouvernman aktyel ensi ki lezot Gouvernman dan le fitir ki zot travay avek lonnekte, senserite, ek lentegrite.

Mon le dir li ki *LDS* pe deza fer sa, e sa fitir Gouvernman pou reste *LDS* aköz napa en lot ankor Mr Speaker, aköz nou'n fini dir nou pe kit li lanmenm. Mersi Mr Speaker.

(APPLAUSE)

MR DEPUTY SPEAKER

Mersi Onorab. Onorab Loze, ou annan en *point of order*.

HON JOHAN LOZE

Yes, Mr Speaker. *Sorry* pou *disturb* travay Lasanble, mon zis oule koriz en mis apreansyon.

Mr Speaker, Onorab dan son deliberasyon in dir koumsa konmkwa kwa ki Sesel ti ganny \$50 milyon pou sa later La Misère.

Timeline sa de keksoz i annan en bon pe lannen separe ek kanmarad, mon krwar in fer en fot en fot senser *genuine*.

Selman i bon Lasanble nou koriz bann keksoz koumsa ler i leve. Mersi Mr Speaker.

MR DEPUTY SPEAKER

Mersi pou ou klarifikasyon Onorab. Onorab Samynadin, *you are next on the list*.

HON KELLY SAMYNADIN

Mersi Mr Speaker. Bonzour Mr Speaker, tou mon bann koleg Onorab, e tou dimoun a lekout.

Mr Speaker, mon pou aport mon kontribisyon ozordi an eksprim an mon dezapwentman lo sa Mosyon. Non, pa akòz mon kont lonnekte, senserite ek lentegrite.

Okenn sitwayen patriyotik pou kapab konteste sa bann valer, me mon pe opoz sa Mosyon senpleman akòz i ineseser, *vague* e potansyelman danzere dan son bann enplikasyon.

Premyerman e primordyalman Mr Speaker, sa Mosyon pe demann Gouvènmman pou fer sa ki i deza legalman e moralman mandate pou fer.

Konstitisyon Sesel, nou bann Lalwa nasyonal ensi ki

manda sak departman Gouvènmman i deza rekomande ki nou sofgard nou patrimwann.

Ki byensir nou kiltir, nou lanvironnman, ek nou leritaz pou benefis nou bann fitir zenerasyon. Pou nou pas sa Mosyon i pou pretann ki sa bann lobligasyon pa deza an plas, oubyen pa pe ganny akonpli. Sa mon krwar pe anvoy en move mesaz avek Lepep Seselwa.

Dezyenmman Mr Speaker, bann term parey lonnekte, senserite, ek lentegrite etandonnen zot valer pozitiv zot fortman sibzektif.

E difisil pou mezire, an aprouvan sa Mosyon eski nou pe etabli en platform pou bann fitir lakizasyon? Ek *witch-hunt* politik anba pretans ki lonnekte ek lentegrite en dimoun i pa depan lo standar en lot dimoun.

Eski nou pe ouver laport pou ki sak aksyon politik i ganny zize, non pa par son legalite oubyen lefikasite, me par sir zwenn en standar moral ki idealist e anbigi ?

De plis Mr Speaker, sa Mosyon pa pe ofer okenn propozisyon konkret okenn rezilta mezirab, e okenn mekanizm latransparans.

Kwa egzaktaman ki i pe sanze? Ki nouvo Polisi ki i pe propoze? Ki benefis pratik ki

pe anmennen pou nou pep? Nou pa kapab pas bann Mosyon senpleman akòz i swadizan fer *look good*, oubyen *feel good*. Nou bezwen pas bann Mosyon ki *do good*, ki fer byen.

Mr Speaker, annou pa bliye ki pou vreman sof gard nou patrimwann nou bezwen annan kouraz pou azir. Pa zis fer *statements*. Nou bezwen pare pou pran bann desizyon difisil ki enkli bann size tel ki litalizasyon later, devlopman *tourism*, ek diversifikasyon ekonomik.

Bann desizyon ki pou parfwa kontroversyel e pa iniverselman ganny vwar koman senser, oubyen popiler.

Me ki neanmwèn dan lentere nasyonal long term. Si nou vreman serye an sa ki konsern proteksyon nou patrimwann, annou anmenn devan bann propozisyon lezislasyon pratik.

Sirveyans sever e plan aksyon ki kler, non pa bann afirmasyon ki *vague* letan nou pe koz lo en tel Mosyon ki pe demann aksyon pou lavenir i enportan ki nou zet en koudey lo lepase.

Mr Speaker, pandan ki sa Mosyon devan nou pe demann Gouvènmàn aktyel ek le fitir pou azir avek lonnekte, senserite ek lentegrite nou pa devret

permet bann tel mo ganny servi koman en *smoke screen*.

Nou bezwen konfront sa laverite enkonfortab lefe ki sa bann valer in tro frekaman ganny abiz lo la par Gouvènmàn lepase.

E bann sikatris sa bann, e bann sikatris sa bann aksyon i ankor *vivid* ozordi, e pandan ki se en Manm parti ansyen Gouvènmàn ki'n anmenn sa Mosyon permet mon pou sit detrwa legzanp konkret Mr Speaker.

Ki petet in kapab sap son lespri ensi ki sa ki pou son bann kolek. Premyèman se disparisyon en serten sonm larzan ki mon pa pou nonm son non, ki mon pa pou nonmen konbyen.

Akòz sa *case* i Ankour, ki ti ganny donnen an *form grant* par en pei zanmi. Zis pou note ki sa bann letan mon ti ankor en adolesan pe lekòl.

E mwan ki ti pe depan lo en manman tousel, mon ti vwar li kot i *struggle* pou fer de bout zwenn. Seselwa ti ganny demande pou ser sang zis akòz en bann ti deside pou ranpli zot pos dan plas partaz sa larises avek Lepep Seselwa.

Mr Speaker, sa larzan pa'n zanmen ganny rikorde dan okenn kont piblik ofisyel, e okenn latras pa'n ganny trouve dan okenn rapò Oditer Zeneral, oubyen dan Bidze nasyonal.

Sete plizyer lannen apre avek bokou presyon piblik osi byen ki presyon Lopozisyon a sa letan ki skandal ti vin o kler, avek bann lenvestigasyon ki ti ganny lanse par Komisyon Anti-Koripsyon.

Ziska ozordi Mr Speaker, Lepep Seselwa pa'n zanmen ganny en leksplikasyon detaye lo ki mannyer e kote sa larzan in disparet.

Sa Mr Speaker, i pa lentegrite, me desepsyon. En lot legzanp Mr Speaker, se bann transfer e apropiyasyon later ilegal.

Anba ladministrasyon oparavan later Leta ti souvan ganny transfer avek bann endividi ki ti annan li en direk avek bann elit politik, parfwa a bann pri devalye. Sa ti primordyalman bann kare trouve lo lakot, i ti re ganny vann pli tar pou fer bann profi masiv, oubyen zot pa ti ganny devlope pou bann gen spekilativ.

Antretan bann Seselwa ordiner ti trimouse pou akse later, pou lozman oubyen pou lagrikiltir. Rapor *TRNUC* in ekspoz plizyer ka kot later in ganny pran par fors avek konpansasyon minim, ou byen ditou.

Sa bann tel aksyon ti vol Lepep Seselwa zot leritaz legal. Trwazyenmman Mr Speaker, i an sa ki konsern labi dan bann lentere priz Leta, ensi ki

fon piblik plizyer bann lakonpannyen e taktik ti ganny servi koman bann veikil *sponsorship* politik, *sponsorship* politik.

Bann fon pa ti ganny byen zere kontra ti ganny donnen san okenn prosedir ofisyel, e bokou pozisyon ti ganny ranpli atraver *nepotism* plito ki merit, ki ozordi i pa len ka ozordi avek Gouvernman aktyel, bann lakonpannyen parey *Air Seychelles* ki ti pe fer pert ti pe *drain* kof Leta, pandan ki bann o zofisye ti pe tous bann gro saler ek benefis. Lepep ti sibir, ti sibir kou pandan ki bann ki ti annan konneksyon ti byen pase.

Mr Speaker, pou plizyer deseni rezim oparavan ti fer restriksyon lo laliberte medya, sipresyon lavwa Lopozisyon e kontrol akse lenformasyon piblik.

Bann oponan politik ti sibir ar selman forse an egzil, oubyen soufer silans. Bokou sitwayen ti ganny refize zot sans pou fer bann desizyon enformen, aköz laverite ti ganny kasyet par deryer propagann leta.

Ki si sa lonnekte Mr Speaker, letan laverite li menm i ganny sansire? E letan nou pe koz lo akse avek lenformasyon piblik atraver ou Mr Speaker, Onorab Larsen, i bezwen fer Lasanble konnen

pou ki rezon ki i pa pe ganny akse avek lenformasyon.

Dapre en *email* date le 25 Mars swivan konsiltasyon ki DA Au Cap, Ms Sabrina Assary ti fer apre ki Onorab Larsen, ti ekrir en let *PS Local Government* Mr Kevin Prine.

An sa ki konsern akse avek serten lenformasyon Msye Perine, ti reponn konm swivan *“Dear DA Au Cap, the same principle I mentioned to DA Cascade also applies to Au Cap.*

As far as we are aware, Au Cap has one elected MNA MS. Kelly Samynadin. I believe that Honourable Larsen, may obtain the information she requires from the relevant Authorities, such as the Ministry responsible for Housing and Seychelles Infrastructure Agency which oversee such projects.

Disclosing a publicly registered case to someone who is not part of the district authority may offend the applicants.

Please note, that we will not be sharing any information with her.

Should further clarification be needed, please let me know, or they may contact me directly and I will gladly explain.

Thank you and best regards Mr Kevin Perine.

Sa ki Onorab Larsen, i bezwen konpran Mr Speaker, se ki Au Cap i annan li en sel MNA Elekte ziska le 27 Septanm 2025.

Stay in your lane, e esper ou tour!

Mr Speaker, a plizyer repriz bann Minsi ek O Zofisye Gouvernman ti ganny enplike dan Koripsyon, me personn pa ti ganny prosekite. lenvestigasyon ti ganny bloke, levidans ti ganny antere, e *whistleblowers* ti fer fas avek retalyasyon.

Sesel ti'n vin renonmen koman en landrwa kot bann ki ti pwisan ti par lao Lalwa. Sa kiltir enpenite ti trai konfyans piblik sirtou dan bann lenstitisyon etatik.

Mr Speaker, rezon ki mon'n liste sa bann legzanp, set aköz letan ki nou pe demann lonnekte, senserite, ek lentegrite avek Gouvernman aktyel ensi ki sa ki pou le fitir annou premyerman rekonnet bann aksyon lepase, kont nou patrimwann ki laplipar pa ankor fini ganny korize, e ki'n mark sa nasyon ziska ozordi. Annou asire ki sa bann prensip pa zis bann parol.

Me plito fondasyon bann vre reform, la transparans ek lazistis, si non nou riske permète ki sa Mosyon i vin en zes senbolik, ki napa okenn

siginifikasyon, e ki aveg ek listwar.

Mr Speaker, kontrerman a ladministrasyon lepase ki'n tro frekaman azir deryer rido sa Gouvernman aktyel in pran plizyer mezir konkret e vizib pou retabli konfyans piblik.

E diriz avek bann valer fondamantal parey Mosyon pe demande ki byensir lonnekte, senserite ek lentegrite. E la ankor dan sa lenstans, mon pou masyonn serten legzanp. Gouvernman in ranforsi Komisyon Anti-Koripsyon Sesel avek plis resours, zouti legal ek lendependans pou fer lanket dan bann krim finansyel o nivo ; bann lenvestigasyon ki *on-going*, ki enkli sa *case* en serten sonm disparet ki mon'n masyonnen pli boner, i demontre en komitman otantik anver latransparans, irespektiv lekel ki dan Gouvernman.

An sa ki konsern latransparans dan sekter piblik, bann lenstitisyon Gouvernman kle in adopte bann *Open Data Policies* kot zot pibliy bann data finansyel, detay *procurement* ek Bidze nasyonal online pou akse piblik. Rapor Oditer Zeneral i aprezan pli byen ganny diskite e aksyonnen avek bann mezir korektiv ki pe ganny enplimante.

Mr Speaker, Gouvernman in entrodwir e amann serten Lalwa ki viz ver amelyorasyon dan latransparans e rediksyon dan koripsyon ki enkli *Public Procurement Act*, *Anti-Corruption Act* e draft en *Whistleblower Protection Bill*. Sa bann reform pe etabli bann standar kler ek mekanizm pou pini bann lofans e protez bann ki ekspoz zot.

Mr Speaker, menm si *TRNUC* ti ganny etabli anba ansyen ladministrasyon, Gouvernman aktyel in siport son konplesyon ek lenplimantasyon son bann rekomandasyon. Son lobzektif i gerizon nasyonal ek lazistis non pa revanz e sa i reflekte leadership senser ki fonde lo laverite ek latransparans. I egalman enportan pou note ki sa ladministrasyon aktyel in fini sorti dan sa lepok patronaz politik. O kontrer, nou pe focus lo bann lapwentman baze lo merit dan servis piblik.

Bann Minis avek bann servant piblik i ganny ekspekte pou deklar zot byen e comply avek bann regilasyon konfli lentere. Lentonasyon zesyon politik in sanze, limilite ek servis in ranplas larogans ek lanrissiman personnel.

Mr Speaker, atraver bann konsiltasyon kominoter, dyalog ek miting piblik,

Gouvernman in demontre en langazman sener pou ekout konsern bann sitwayen e reponn avek latransparans. Sa lapros i mark en lepa delavan ver en leadership ki santre otour son sitwayen.

An konklizyon Mr Speaker, lonnekte, senerite ek lentregrite pa zis bann slogan vid pou Gouvernman LDS. Zot plito bann prensip fondamantal ki vivan atraver bann reform ki nou'n met en lenplimantasyon, atraver latransparans ensi ki en nouvo kiltir politik ki nou'n adopte.

E letan ki nou konnen ki okenn Gouvernman i parfe, sa ki enportan se kouraz pou konfront lepase, larout direk e kler dan leprezan e batir konfyans pou le fitir. Alors Mr Speaker, dezormen mon pa pou siporte sa Mosyon sinon mon pou pe montre ki mon konfize dan prensip ki mon parti i debout lo la. Mersi.

MR DEPUTY SPEAKER

Mersi Onorab. Mon pou envit prosen entervenans, Onorab Roucou ki prosen lo lalis.

HON MICHEL ROUCOU

Mersi Mr Speaker. Bonzour tou dimoun. Bonzour tou zabitan Mont Fleuri. Bonzour tou dimoun ki pe ekout nou. Mr Speaker, ozordi Mosyon anmennen par Onorab Loze i

pe demann nou, i pe koz en pe lo nou patrimwann pou protez li, li menm li.

Mr Speaker, annefe ozordi Sesel nou pa kapab viv nou konmsi nou en pei ki pe viv elwanye avek tou sa ki pe arive dan lemonn. E ler ou get otour lemonn avek bann lager ki pe arive, bann keksoz ki pe arive. E larestan pei li menm li, e tousala i annan en lenpak lo nou pti pei Sesel. E ozordi ler nou koz lo larz pansyon ki pe monte, e war poudir bokou pei pli pwisan ki nou ki zot pe zer zot prop mineral tou bann lezot keksoz ankor, ki zot war poudir zot pe bezwen, zot war sa nesaser kot zot pe fer laz pansyon monte li menm li. Ki sa demen i ava ede kot pou benefis son zenerasyon.

E nou Sesel ozordi nou pa kapab war nou dan en pozisyon kot nou pe sey vini pou nou anbet nou pep, pou fer krwar poudir nenport ki ler nou sot deryer dan zarden nou annan en pye larzan. I non.

Avek bann keksoz ki pe pase, e osi sa i annan en lenpak lo nou Sesel e nou war avek bann keksoz ki pe arive dan bann lezot pei, kot nou Sesel nou osi nou bezwen swiv. Kot sa demen i kapab benefis lezot zenerasyon ki pou vini.

E bomaten nou'n war poudir ti annan Lekol Belonie la, e nou, nou bezwen kapab

edik nou bann pep, edik nou bann zenn poudir demen dan le fitir nou swete ki keksoz i ava kapab amelyore kot demen Sesel i pa war li pe ganny afekte.

E nou Sesel Mr Speaker, nou depan bokou lo bann keksoz ki enporte ozordi, diri, delwil, laplipar keksoz. E nou, nou pa kapab fer krwar avek pep la deor poudir keksoz ki pe pase deor li menm li i pa pou afekte nou.

Mr Speaker, en lot pwen ankor ki'n tous lo la mon'n ganny sans avek komite ki koz lo bann zafer manze, zil li menm li.

Mon'n ganny sans pou mwan vizit Lasonpsyon avek sa Komite, kot laba nou'n kapab vwar kwa egzakteman, aköz i annan en pe konfizyon lo kote zil aköz persepsyon ki ti pe donner deor se ki Gouvernman pe vann zil antye. E nou ozordi ki nou war Mr Speaker? i zis en bout ki'n ganny *lease* ki pou fer lotel ki pou benefis aköz i pou anmenn lanplwa pou nou pep.

I pou anmenn benefis lo kote finans li menm li. E ler ou pe gete Mr Speaker, i napa naryen ki'n ganny vann parey in ganny dir oparavan. E mwan mon demann mon lekor en kestyon. Depi ler Gouvernman *LDS* in vin o pouvwar Mr Speaker, oli zil ki Onorab pou Proporsyonnel

pou *LDS*, pou *US* in dir ki Gouvernman in vann?

Mon pa pe war Mr Speaker. Kontrer ki nou'n war Gouvernman pe fer? Gouvernman *LDS* ki la ozordi i pe sey koriz sa bann keksoz ki'n arive dan lepase. Parey nou war *Ile Longue* Mr Speaker, ti annan en *lease* ki ti'n donner avek en lakonpannyen pou li devlope pou plizyer lannen i pa'n ganny devlope.

E ozordi Gouvernman, aköz pei pa ti pe benefisye naryen avek. e Gouvernman ozordi in vini in bezwen koriz kot pou anmenn en devlopman ki pou anmenn en benefis pou pei li menm. Ste Anne, Ste Anne i en lot zil ki in ganny *lease* pou R1 Mr Speaker. E ozordi Gouvernman li menm li Gouvernman *LDS* i bezwen vwar fason pou li kapab koriz sa bann keksoz ki ansyen Gouvernman in fer. Ki demen pei li menm li i a kapab benefisye avek.

Mr Speaker, ozordi koze i koz bokou lo nou bann zil ki mannyer i pou anmenn sa resours lo kote plante, lo kote lagrikiltir. Me mazorite bann zil ki nou war ozordi i bann zil prive. Aköz i annan bokou ladan ki Gouvernman avan, zo tin pran zot in vann.

E nou, nou Gouvernman ozordi pe rod fason pou kapab

koriz sa bann keksoz. E osi Mr Speaker, ki mon kapab koz en pti pe ler nou pe koz lo kote nou bann patrimwann. Me zis parey mon pe get dan mon distrik ozordi nou war poudir Kan Tobrouk li menm li, en gran mazorite bout later in ganny pran par en serten Minis - ansyen Minis ki ozordi li i pe van par bout Mr Speaker.

E sa ti kapab ede ozordi pou li donn sa lalis dimoun, zabitan Mont Fleuri ki pe esper en bout later. E la koman i ankor boner Mr Speaker, petet mon a fer en lapel avek sa ansyen Minis rann Gouvernman e nou ava asiste zabitan Mont Fleuri, kot Onorab ki'n anmenn Mosyon ozordi i *CC Member US*!

Mr Speaker, e mwan koman *MNA Elekte* pou Mont Fleuri nou'n war bokou devlopman dan mon distrik, lagrandisman semen, lakaz *Corgat Estate* ki pe kontinyen. I annan 32 *unit* pe al ganny fer la, ki pou benefis zabitan. An plis *Corgat Estate* pou vin sa landrwa modern li menm li aköz pou annan bann profesyonnel osi pou antre ki pou la.

I pou annan en nouvo klinik Mr Speaker. E tousala i pou benefis nou zabitan e benefis bann dimoun ki dan nou rezyon. E ozordi Mr Speaker, si vreman

Gouvernman avan, Gouvernman *US* ti anvi *sort out* sa problem trafik dan mon distrik Mr Speaker.

Zot ti vann en bout later avek en lekol prive zot. Aköz zot pa ti tir en bout ladan? Ki ozordi dan plas nou ti pou war nou Gouvernman *LDS* pou al negosye pou kapab ganny en pti bout pou agrandi semen pou *sort out* sa problem trafik, i ti a kapab amelyore.

War ozordi nou war nou pe bezwen lyez ek lanbasad pou nou kapab ganny en pti bout, sa ki'n met retar en pti pe. Aköz nou bezwen koz ek Lanbasad Libyen pou nou kapab ganny en bout Mr Speaker, pou nou kapab ganny en pti bout pou sa. E proze in fini *tender*.

Koman nou ganny permisyon proze i demare. E sa pou benefisye pou tir en pe sa problem trafik, ki *US* mon war li in koz lo la lo son papye ler i ti vin *blitz* Mont Fleuri Mr Speaker.

E Mr Speaker, *NIHSS* ozordi i ti'n ganny abandonnen. Me ozordi mon war bann zoli dimoun, bann zoli nou bann zenn ki pe aprann ozordi demen i dan en lanplwa, pou antre dan en profesyon lasante Mr Speaker. E i bokou pli pre pou zot, e i ti'n ganny abandonnen i ti zis la anrim Mr Speaker. E

tousala i nou bann patrimwann sa Mr Speaker.

E ozordi nou war Gouvernman li menm li i pe met zefor pou li kapab fer sir i mentenir bann lenfrastruktir ki'n ganny abandonnen. Annou get *Independence House* Mr Speaker. Ozordi nou Gouvernman ki'n war li nesaser pou kapab fer serten *major renovations* lo la. Mr Speaker, si ou ti war sa *building*. Menm ou ti war dimoun ler ti pase ti menm met lo *Facebook*, aköz son leta ki i ti ladan. E ozordi nou Gouvernman i war li nesaser pou nou kot...

Mr Speaker Zarden Botanik, bann trik ki'n ganny arive laba apre ki nou ti tande dife ti ganny mete aköz bokou larzan ti ganny perdi. E tousala i anba Ansyen Gouvernman Mr Speaker. E ozordi sa bann larzan ti kapab ede pou nou donn nou bann trwazyenm az en pli o logmantasyon Mr Speaker.

Pou Mrs Victor, laba dan Baba Estate Plaisance tande Mr Speaker. Pou Mrs Mena tande *Corgat Estate* poudir bann larzan ki'n perdi dan lepase ki nou ti kapab servi. Ozordi letan nou pe koz lo laz pansyon ogmante fodre pa ki nou bat latet nou bann vyeyar. Aköz keksoz laba deor Mr Speaker, bokou pei ki pli pwisan ki nou ozordi zot osi

zot pe fer laz pansyon monte Mr Speaker.

E i menm annan pei ki'n mont ziska 70an. Annou get pti Moris o bor nou la Mr Speaker nou vwazen. Zot osi tou Mr Speaker, in re vwar son laz fer ogmante laz pansyon. E ozordi nou Sesel nou pa kapab reste eparnye avek sa Mr Speaker, ou war? E mwan mon santi poudir se ki sa Mosyon ki Onorab Loze in anmennen, mon konnen poudir taler i pou dir mwan de pti mo - sa i normal i abitye, mon santi poudir sa Mosyon ti kapab fer pli byen.

Ozordi Gouvernman i annan bokou keksoz pozitiv ki in fer Mr Speaker. E ler nou fer blitz, nou ganny *welcome* devan laport dimoun o pret sa ki zot, zot pe dir. Dimoun i *welcome* nou, dimoun i koz ek nou, ou war? Dimoun i apresye ki Gouvernman pe fer. Dimoun i dir nou fran kot i mal dimoun i dir nou Mr Speaker. Kot i byen dimoun i dir ek nou zot apresye nou dan nou vizit, zot *welcome* nou.

Mr Speaker, zis pou 4an sa ki nou Gouvernman ozordi in fer ozordi dan plas annan en baz militer Lasonpsyon Mr Speaker, nou pe anmenn en keksoz ki pou anmenn lanplwa pou nou pep i pou anmenn lanplwa. Mon konn bokou zenn la deor ki zot pe reve zot osi zot a kapab ganny

en plas travay lo enn nou bann zil dan bann letablisman touristik Mr Speaker. E nou, nou Gouvernman pe fer sanmenm.

Mr Speaker, napa personn dan sa Gouvernman ki pe vann okenn zil. Fodre nou arete bat latet sa pep, pou fer krwar. Mr Speaker, ozordi ler mon monte pou mwan al Cascade mon war bokou lakour. Kontrer in pli zoli ki avan, Onorab Monthy in pouse pou bann case Mr Speaker. Ou war? E Onorab Monthy i Onorab Elekte pou distrik Cascade zis pou zabitan Cascade konnen Mr Speaker. Onorab Monthy in al lo en misyon, ou war? E travay ki Onorab Monthy in komanse pe kontinyen. Ozordi ou war bokou lakour ou pas Providence ou war bann biznes pe reouver Mr Speaker.

Dimoun pa pe konplent pe asize ek en plakar, dimoun pe bouze zot war lavi pe bouze. E Gouvernman li menm li in fer sir ki bann ki napa en lasirans zot in ganny larzan pou zot kapab *renovate*. Kontrer mon war zot in kraze pe fer pli zoli ankor Mr Speaker. Me nou, nou pe dir ek Gouvernman kontinyen sa bon travay - kontinyen sa bon travay lo sa semen pozitivite.

Kontinyen edik sa pep ki mannier demen zot pou *stand* lo zot lipye aköz Gouvernman

Mr Speaker pe montre sa pep ki mannier zot pou travay pou zot ganny zot dipen. Pa pou zot asize lo *welfare* Mr Speaker, pou zot depan lo la.

Me demen Gouvernman i tonbe, be sa pep pou tonbe nou bezwen annan en pep ki for; en pep ki kapab depan lo son lekor Mr Speaker. E mwan mon poudir bravo Gouvernman avek Onorab Monthy pou sa travay ki zot in fer dan Cascade.

E nou lo sa kote latab nou pou kontinyen donn sa sipor zabitan Cascade. E nou, nou pe demann zot bann ki pa ankor ganny led parey Onorab Tamboo in dir Mr Speaker, pou zot vin devan. Onorab Monthy in eksplike pou nenport ki plizyer rezon ki i annan ki pa ankor ganny asiste aköz zot ki petet i annan serten kondisyon zot pe sey met devan.

Me selman Gouvernman avek Onorab Monthy pe travay Cascade. R1 milyon Mr Speaker, Gouvernman in mete pou ed bann zabitan Cascade. Mon annan en ser cascade mwan zour ti ariv sa lensidan Mr Speaker, li premye dimoun lev mwan poudir mwan in ariv sa lensidan. Be li osi in ganny asiste Mr Speaker, parey tou lezot zabitan Cascade. Kontrer i ti dir mwan dir mersi Onorab Monthy pou li.

Mr Speak, ozordi dan sa Sesel i napa 2 group dimoun; i annan en sel group dimoun. E Gouvernman pe travay pou tou dimoun parey nou lo sa kote latab nou fer. E nou, nou pe get sa pep nou pe met sa pei devan Mr Speaker, nou pe mazin larelev. Nou pa kapab ozordi si pei ozordi i fer en pti benefis nou donn bal ladan. Kontrer nou pas avek nou pep parey nou'n war poudir lo kote *fuel SEYPEC* in fer Mr Speaker kot tou dimoun i benefisye, *ok* Mr Speaker.

E Mr Speaker, mwan mon pa pou donn mon sipor sa Mosyon aköz mon war ki travay ki Gouvernman bokou Lepep Seselwa i war sa travay ki Gouvernman li menm li in fer dan sa dernyen 4an pe al lo 5an la. E Gouvernman ler i ti pas kot zabitan Cascade, i pa ti swazir lekel ki pou donn *plywood* li. I ti donn tou sa ki bezwen. Mersi Mr Speaker.

MR DEPUTY SPEAKER

Mersi Onorab Roucou. Nou pou donn en dernyen Manm laparol van midi edmi. Onorab Uranie *you are next on the list*. Tyek ler e i mon lentansyon rann *SBC* son lantenn midi edmi pou li fer son nouvel. Mersi.

HON ROCKY URANIE

Mersi Mr Speaker. Bonzour tou koleg Onorab. En bonzour

spesyal pou tou zabitan Zil Pros ki a lekout. Mon krwar zabitan zil Pros ki a lekout atraver ou Mr Speaker, in tann Onorab Roucou ki ti vin La Digue ek *LDS* pou fer *blitz*.

Alor, Onorab Roucou ou ti pase ler bannla ti met konsern devan ou, zafer zot bezwen *call* lanbilans atraver Mahe, ou ti lev ou telefonn ou ti dir ou a rezourd sa. Dapre ou ti koz ek Dokter Louange lanmenm la, ou'n dir zot tou keksoz in rezourd pa bezwen *call* lanbilans par Mahe. Me ziska la, menm Minis ti vin la devan lanbilans ou bezwen *call* par Mahe.

(comments off-mic)

HON ROCKY URANIE

E nou, nou... sanmenm... sa i en fason sanmenm sa Mosyon in vini Mr Speaker. Sanmenm sa Mosyon in vini pou fer zot koz ek lonnekte aret anbet dimoun. Ek sa i dir Dokter Louange... ek sa i dir Dokter Louange ki'n koz avek i dir li tou keksoz i ok in fini rezourd. Pov Dokter Louange! *Ok?*

En lot madanm kot i pase sa madanm aköz difikilte politik coral field ki zot fer. Pas kot sa madanm, sa madanm pe dir li i pe ganny difikilte pou ganny *coral fill* aköz sa in dir ek sa madanm Onorab Uranie i ganny larzan atraver Bidze pou aste *coral fill* pou donn li.

Sa madanm i dir mwan... wi... mon pase. Sanmenm sa Mosyon in vini nou bezwen annan lonnekte, senserite, ek lentegrite Onorab Roucou. Mersi.

Ankor aköz en rezon sa Mosyon in vini Mr Speaker, ankor nou'n tann dir ki kominikasyon in sorti. *MNA* Proporsyonnel pou Au Cap *MNA* Larsen e *MNA* Proporsyonnel Onorab Tamboo 2 distrik in ganny nonmen Au Cap ek Cascade pa pou ganny lenformasyon avek *Local Government*. Me selman i annan lezot *MNA* Proporsyonnel dan *LDS* laba, zot, zot tou zot gannyen.

Nou annan Onorab Bistoquet, Onorab Doyace Porice, Onorab Bijoux tousala zot gannyen. I montre ou aköz nou bezwen anmenn sa Mosyon pou fer sir ki nou annan latransparans, lonnekte, lentegrite. Sa i bann rezon aköz nou bezwen anmenn sa bann Mosyon. Mr Speaker, Sesel en group zil granitik e osi koralyen dan Losean Endyen e bokou diversite lafonn e laflor.

Ki tre enteresan en mervay ki bokou viziter i reve pou vin vizite. Donnen nou pwen stratejik da losean, i annan pei ou menm endividi ki pa zis anvizit nou zoli pei, me zot osi anvizite, aste e menm pran serten kontrol lo

nou. I vre ki dan lepase ti napa dimoun Sesel. Nou ti ganny kolonyalize par Franse e pli tar Angle.

Bokou nou ti desandans lesklav e en minorite ti bann desandans ki dan bann term kreol nou ti apel zot bann met, bann gran blan aköz nwar ki ti fer lesklavaz. Pou plizyer lannen, bokou nou gran paran in sibir pou konstri e batir nou pei. Bokou in eskente isi menm lo Mahe, Praslin, La Digue, Silhouette, plizyer zil e byensir pa bliy nou bann zil elwanye.

Vwayaz lo lanmer dan bato lavwal pou ariv lo bann zil sirtou bann elwanye pa ti fasil ditou. Sa ti pran plizyer zour, semenn e menm mwan. Leksplwatasyon ti bokou, eksplwatasyon i vin avek martir ek soufrans. Zonm ti napa swa me pou sibir. Labolisyon lesklavaz ti en komansman me pa en finisyon. Devlopman dousman, dousman ti komans antre, popilasyon ti grandi, zonm ti komans travay pou ganny en pti *cash* pou anmenn se li.

Bokou fanm ti travay nennenn pou ganny en bouse manze, e ti osi annan labi anver zot. Seselwa ordiner pa ti an kontrol son prop lavi. Nou ti ganny kontrole par en lot. *Fast forward* dan bann lannen 1960 an montan

politik Sesel ti pran en nouvo lelan. Ziska nou ti ganny nou lendepandans, la nou ti sorti anba komann angle e vin en pei souvren. Vedir nou pran kontrol total nou pei, e nou ki deside ki mannyer pou dirize. E ki nou anvi pou nou zil e nou dimoun pou anmenn en nouvo Sesel.

Nou'n vwar nou Sesel devlope rapidman avek nouvo linisyativ lendistri ki'n kre bokou biznes, kre larises e byensir lanplwa. Zonm ti vin o sant devlopman. Zonm ti'n pran kontrol son lavi son souvrennte. E zonm ti'n kapab pran desizyon pou diriz son lekor, son fanmir dan direksyon kot i oule ale.

Sesel i nou pei, en bizou byen formen par lanatir. En leritaz en patrimwann natirel. Nou briy tre for menm lo lasenn enternasyonal. bokou vizibilite e lizye i lo nou. Tou sa ki annan larzan i oule en bout nou pei ki apel Sesel. Ki swa endividi oubyen pei byen devlope, zot osi zot oule en plas lo nou zoli Sesel.

I annan pei i oule nou pou rezon zero politik aköz stratezikman dapre konpran nou byen plase dan losean. E zot oule etabli zot lo nou zil pou ganny serten kontrol enn lo nou e menm lo lezot. Bann endividi ki annan larzan, zot, zot oule vin fer *playground*, mon servi sa parol fer

playground aköz sa i parol *ex Leader* Lopozisyon ki Ozordi Prezidan Wavel Ramkalawan ti kontan servi.

Zot annan eksklizivite, montre zot pwisans finansyel, aste nou zil, eksplwate, fer zot biznes, agrandi plis zot larises menm si zot bann aktivite i kapab annan en lefe negativ lo nou patrimwann. Pou zot sa pa naryen, demen si zafer i sal dan nou lanvironnman zot, zot kapab pran zot semen ale les nou patrimwann ganny afekte.

Dimoun i elekte en Gouvernman, e zot ekspekte ki sa Gouvernman i travay avek lonnekte, senserite, e byensir lentegrite. En Gouvernman ki koz laverite ek son pep pa parey sa enn ki nou annan ozordi. Zis koz mansonz pou kouver mansonz, i pa oule pran responsabilite pou keksoz mal pou keksoz ki zot mal fer. Me plito kontinyen met blanm lo Gouvernman avan pou kouver zot inefikasite. Zis parey sa problemn *Nyala*.

Atraver ou Mr Speaker, Onorab Kelly in dir ki son Gouvernman i en Gouvernman serye in fer miting dan bann distrik. Me ki in bliye ki son Prezidan ti dir. Ti donn dimoun lenpresyon ki li si i perdi eleksyon i pou sorti parey ros dan fles. E avan soley leve i pou ariv se li. Me ki nou war apre, sa boug ek son

mazorite i sanz Lalwa i dir donn li 1 mwan apre eleksyon pou li sorti *State House*.

Aprezan ki mon'n ganny en konpran aköz. I bezwen aprann dray sa *Nyala* pou tir li *State House* ziske kot li. Oli senserite dan parol, oli lonnekte, oli lentegrite? Nou'n koz bokou lo latransparans, nou'n koz bokou lo rann kont, nou'n koz bokou lo retir koripsyon. Eski ou ki pe ekout mwan laba deor. Eski i annan vre latransparans dan lafason ki Gouvernman *LDS* i fer keksoz? Byensir larepons i non. zanmen napa en kontrovers e dekoneksyon dan sa ki zot fer.

Nou Seselwa nou bezwen met politik de kote kot i konsern nou patrimwann. Nou bezwen zwenn nou tou ansanm ek determinasyon pou protez sa ki nou apel nou patrimwann si vre nou kontan Sesel. Se pou sa rezon mon oule ki bann *LDS* i zwenn nou si vre zot kontan Sesel pou vot an faver sa Mosyon.

Annou met sa pep ki ti elekte nou avan tou. Me laba nou konpran aköz zot pa pou siporte petet. I sagrinan ler ou antann enn zot *ex MNA LDS* ki dir zot ganny forse pou sir let *resignation* sirtou si zot pa swiv *party line*, i fer lapenn vre. Zis zot bezwen dir wi e fer sa ki egzekitiv i dir zot.

Mon bann frer, sote dan sa bato *LDS* lapliferans i bokou laba. I annan en *MNA* ki tou keksoz i garanti pou li laba. Vin zwenn ansanm avek nou pou sof gard e protez nou souvrennte. Protez nou patrimwann e mazin nou fitir zenerasyon. Mwan koman en endividi mon pa kapab vann nou zil oubyen fer kado etranze nou zil. Me en Gouvernman i kapab parey nou'n war ki'n arive la pandan sa dernyen 4an edmi.

Menm group dimoun ki ti dan Lopozisyon ki ti kri for aret vann nou zil ke etranze pou ede protez patrimwann. Ozordi nou war zot ki pe fer li. *LDS* ti kontan fer leokri, ozordi napa enn zot ki annan kouraz pou anvi konnen ki pe vreman pe pase dan sa *saga* Lasonpsyon.

Yer *VP* in vin la anndan parey son labitid, e say tou kestyon. Olye anmennen pou reponn kestyon pou montre lonnekte, pou montre senserite e pou osi montre ki son Gouvernman i annan lentegrite i kapab pran responsabilite, i kasyet deryer ledò Gouvernman avan.

I dir nou manz bannann, nou'n anvoy lapo lo zot. Me ler mon gete *LDS* dan on konfizyon in plis bannann, olye manze in pran bannann in anvoy lo nou e zot in manz lapo. Prezan tou siporter pe

vin kot nou *US* akòz *LDS* in tou kas kase, in retourn *SNP*.

Tou sa ki pe ekout mwan ozordi, nou'n erit plizyer keksoz enportan ki'n fer nou vin en nasyon. I nou drwa pou reste e viv trankilman dan nou sosyete...

(Interruption)

MR DEPUTY SPEAKER

Hold on, mon i enform ou pou tyek letan. Me ou pa'n fer akòz ou'n sot ou...

HON ROCKY URANIE

San ki nou laport i bezwen ganny defonse oubyen lakaz anvole ek leksplasyon parey sa ka kot *CCCL*. Seselwa i ankor pe esper sa rapor. Mwan la mon pou felisit Onorab Tamboo, en fanm for ki pe kontinyen lager pou fer tande lavwa zabitan Cascade.

(APPLAUSE)

HON ROCKY URANIE

Silvouple annou annan lonnekte aret kasyet keksoz. Montre ki zot sener e zot annan lentegrite. Les annan en bon lanket endepandan pou montre latransparans. En Gouvernman i bezwen apiye e anpar son pep an premye. Fer sir ki nou pep i konfortab dan fason viv. Fer sir ki lanouritir i annan ase pou konsonmasyon nou pep.

Fer sir ki nou kapab, ki nou lavi, ki kou lavi i abondab. E ki nou pep i annan pouvwar pou aste. Get en pri dizef fermal pou paran. Ozordi kou lavi in tre o sirtou lo mon Zil La Digue san en rekour. Mr Speaker, ozordi pou satisfere lide *run* pei parey en biznes an menm tan ki zot pe *rule border* zot tanpi so nou pos i defonse.

Nou zanfàn, nou trezor se zot ki nou fitir zenerasyon. Se zot ki pe soufer ozordi. Yer nou'n koz bokou lo labi zanfàn, be dir mwan ki mannyer i apele ler sa menm lenstitisyon ki sipoze ede protez nou bann zanfàn i dormi lo *file* lasistans. I annan plis ki 3 mwan *file* zanfàn pa ankor ganny aprouve, ni R1 pou ed sa paran, sipòrt sa zanfàn ni en larzan pa ankor antre dan kont kantmenm zot in promet.

Mr Speaker, mwan fransman mon pou toutan sipòrt sa Mosyon. En Mosyon ki pe dir ki dezòrmen tou Gouvernman irespektiv depi Gouvernman aktyel ensi ki tou lezot Gouvernman dan lefitir i travay avek lonnekte, senerite, e lentegrite pou sof gard e protez patrimwann Sesel dan son antyerte pou benefis nou bann fitir zenerasyon. Mersi Mr Speaker.

(APPLAUSE)

MR DEPUTY SPEAKER

Mersi Onorab. Nou pou *adjourn* la pou nou rebran travay aköz i annan *ABC* 1er en kar. Donk, nou pou rezwenn 2er en kar. Parey mon'n dir napa laklos, 2er en kar mon pe debout kot laport pou mwan desann avek... be nou bezwen ganny retar avek serzan aköz nou pe esper zot. So, silvouple 2er en kar. Onorab, mon ti war ou lanmen anler.

HON ANNE BISTOQUET

Yes, *Mr Speaker*. Mon ti oule *raise en point of order* anba *Order 49 (1)*. Aköz Onorab Uranie in mansyonn mon non spesifikman *regarding* nou ganny lenformasyon sorti kot *PS Perine*, lenformasyon distrik. E mwan mon ti a voudre poudir ki sa i fo.

Parske mwan verbalman mon ti *call* *Mr Perine*, *PS Perine* mon ti pe rod lenformasyon e i ti enform mwan verbalman poudir Onorab Tamboo avek Onorab Larsen in vin rode, zot in refize e alor zot pe pran menm presedans pou tou *MNA Proporsyonnel* dan en distrik.

E si zot war mwan pe travay se savedir ki mwan mon en fanm determinen. E mwan mon asire poudir Roche Caiman le 27 Septanm pou dan *basket LDS*. Mersi.

(APPLAUSE)

MR DEPUTY SPEAKER

Mersi Onorab. Mon krwar sa *case i close*. Bann Lotorite Distrik atraver Minister Gouvernman Lokal i travay avek Manm ki elekte. So, nou *close sa case i leka koumsa*. Donk, nou rezwenn 2er en kar.

(BREAK)

MR DEPUTY SPEAKER

Bonn apre midi tou dimoun, *welcome back* pou kontinyasyon nou travay pou sa Merkrede e depi bomaten nou pe diskit en Mosyon ki lo *Order Paper*, avan ki nou kontinyen avek lalis mon ava zis repas lo Mosyon pou lentere piblik ki pe dir; -

“Lasanble Nasyonal Sesel, pe demande ki Gouvernman aktyel, ensi ki tou lezot Gouvernman dan le fitir, i travay avek lonnekte, senserite e lentegrite pou sofgard e protez patrimwann Sesel dan son antyerte pour benefis nou bann fitir zenerasyon”.

Mosyon ki dan non Manm Proporsyonnel Parti *United Seychelles*, Onorab Johan Loze e prosennman lo mon lalis se Onorab Desheila

Bastienne, direktiv i reste 15 minit sak dimoun. Mersi.

HON DESHEILA BASTIENNE

Mersi Mr Speaker. Bonn apre mid Mr Speaker, bonn apre midi tou dimoun a lekout.

Mr Speaker, letan mon'n ekout loter Mosyon koz lo sa Mosyon mon pe sey konpran ki loter Mosyon pa'n tro azour avek sityasyon nou pei e son resers, ouswa son memwar pa azour ditou ki vreman in arive ek nou pei pandan sa 43 an, an aryer kot i konsern lonnekte, senserite anver patrimwann nou pei.

Mr Speaker, pou sa laz ki mon annan ozordi mon annan bokou souvenir ki'n arive dan nou pei e mon annan plezir partaz en pe osi atraver ou Mr Speaker, avek Onorab Tamboo lo lonnekte ek senserite patrimwann nou pei.

Ozordi sa Mosyon napa son vre relevans, akòz son bann Manm pe zis koz lo zot lekòr vizavi eleksyon 2025. Zot in komans zot *PPB* byen boner atraver sa Mosyon. Sa ki'n koz lo leksplasyon *CCCL*, me bliye bonm kot nou radyo Sesel ek *Reef Hotel* dan sak vakwa. Ti kot nou patrimwann sa.

Sa ki'n koz lo laz pansyon, malgre ozordi annan pei ki pli devan e pli ris ki Sesel laz pansyon in ariv 67 an. Sa ki plere lo ki zot in fer dan zot distrik, akòz zot pe rod zis

mileage politik atraver sa Mosyon.

Mr Speaker, fran sans sa Mosyon pa pe ganny koz lo la, akòz zot konnen ki zot in fer dan lepase lo size nou leritaz, nou patrimwann. Mr Speaker, mon premye- nou premye patrimwann nou leritaz ki nou ti perdi se nou laliberte pou viv ere e lib depi 1977.

Letan loter Mosyon pe sant leloz, "Annou travay avek lonnekte, senserite, lentegrite pou sofgard e protez patrimwann Sesel dan son antyerte pour benefis nou bann fitir zenerasyon," eski i pare pou dir laverite akòz en tel Mosyon ozordi? Ki son bi deryer sa Mosyon?

Wi, byen dir in tandè ki Gouvèrnman *LDS* in dir i pou propoz en lamannman Konstitisyonnel pou sofgard nou bann zil ki nou patrimwann, zot antre avek sa propozisyon koman en Mosyon pou Seselwa krwar ki sa ti zot plan.

Mr Speaker, wi, i enportan ki nou fitir zenerasyon i dekouver e apresye leritaz ek patrimwann son pei, kot son lonbri i ganny antere, me sa zenerasyon ozordi la ki nou dir zot? Ki nou pe sey met dan zot lespri? Ki zot, zot ti inosan sa lepok, zot pa ti la, parey zot abitye dir?

Ouswa bliy sa ki'n arive anba zot *watch*, parey zot pe

dir ozordi annou aret koz lo lepase, annou pran li koman sa ki'n arive, in arive annou les pase, annou rekomanse.

Mr Speaker, sa kalite *mindset* ki US i annan pa pe marse avek Lepep Seselwa *anymore*. Seselwa i war zot dan kler. zenn i war zot dan kler. Zot fer zot ta salte, Gouvernman LDS i a vin netwaye, gaspiy tou sa ki zot in kapab, rin tou sa ki zot in kapab e nou, nou a vin repare. I normal.

Mr Speaker, mwan mon krwar ki avan ki US i vin met lord dan lakaz zot-, dan nou lakaz, vin dikte avek nou Gouvernman dizour ki mannyer pou fer, i pou osi byen ki zot aksepte ki dezord ti tro bokou anba zot responsabilite, tro bokou anba zot *watch*, tou sa ki ti bon in gate, tou sa ki zot ti met zot lanmen ek zot lizye lo la ti ariv a son lafen ek perdi dan son antyerte.

Mr Speaker, atraver ou, letan mon tann Onorab Churchill Gill dir “tro bokou letan nou'n war bokou faver,” eski Onorab Gill pe refer lo sa bann gro, gro faver ki'n ganny fer anba son Gouvernman SPPF, Lepep, US?

Letan Onorab Gill i koz lo Polisi ki an plas, fodre aranze pou reponn nou bezwen ki nou pe fer fas avek, be depi ka sa Polisi i an plas? Depi Oktob

2020? Mr Speaker, atraver ou, Onorab Gill in dir ankor, les listwar rikord tou sa ki nou fer. Eski listwar i komans Oktob 2020?

Mr Speaker, be listwar lontan pe rikord tou sa ki'n ganny fer dan sa pei Sesel.

Mr Speaker, Sesel i en zoli pei, ranpli avek diferan listwar, kiltir ek bote natirel. Nou lasazes pa ti zis dan later me dan nou lavil li menm. Dan nou tradisyon ki nou ti erite, langaz ki nou koze, lanvironnman ki nou ti pe sipoze prezeve ou menm konserve ek tou son leritaz ki nou ti sipoze depi later e later, kontinyen garde pou nou zenerasyon ki pe kontinyen vini.

Mr Speaker, nou devwar sakre se ki pou fer sir ki Sesel i reste an sekirite dan son totalite. Prezerv nou pei pa ti en opsyon me en nesesite e ti nou lobligasyon, ti devwar nenport Gouvernman pou prezerv li a tou pri, aköz i ti form par lavi sak endividi dan son prop fason.

Mr Speaker, loter Mosyon pe demann Gouvernman swa ozordi, swa sa ki pou vini, letan son trou i ava arive pou fer aksyon desiziv pou travay avek lonnekte, protez e sofgard nou lidantite.

Mon ti a kontan konnen atraver loter Mosyon, si sa i

senpleman en lapros politik pou sey prepar zot pou 2025, ouswa prezan ki i a pe realize ki sa ki ti'n devret touzour ganny akeyir koman en lobligasyon e responsabilite ki ti'n devret anbrase depi byen, byen, byen e byen lontan menm apre letan ki *Grande Bretagne* anba Larenn Elizabeth II, ti donn Sesel son lendependans e i ti met sa pei avek son antyerte dan lanmen Seselwa.

Me ler enn ki ti pli voras ti deside zis 11 mwan apre fer en koudeta, pran tou, pran nou zoli pei avek zarm e versman disan, lala kote tou ti komans al mal. Mr Speaker, dousman, dousman nou ti war laswaf larzan, zil ti komans vann enn par enn anba latib.

Kouzin, Daros, Felicite, sa ti'n ganny partaze tel ki Sainte Anne ti form par nou patrimwann Sesel sa. Rezerv ti komans vann bout par bout, sa ki ti pran son bout anba son prop lotorite, patrimwann Sesel tousala, montanny ti komans vann bout par bout, ti ankor patrimwann Sesel menm sa, lotel ki ti komans vann.

E ozordi ler ou fer en pti pronmnad dan diferan parti nou pei nou war zis bann leskelet an ros ki debout, ou zanfand, ou pti zanfand nenk i demann ou kisisa sa? Ti en lakaz sa? Tou zot labote in

disparet, *Mahe Beach, Reef Hotel*, zoli lotel ki ti akey *Miss World*.

Zoli lotel kot Seselwa ti zwenn pou detann, kot zot ti fer zot maryaz ek plizyer parti, nou zenerasyon konmela ni tann koz lo la zot pa tand e zot pa pou zanmen dekouver sa bann zoli memwar ki zot paran ek gran paran in eksperyans dan sa bann landrwa ki alors en zour i ti form par nou leritaz, nou patrimwann.

Akoz ozordi zot konn zis en sel landrwa kot ou pou bezwen al met ou non lo lalis omwen 1 an davans. E tou dimoun i konn *fame Maison Du Peuple*.

Mr Speaker, i osi enportan pou nou met devan nou zenerasyon kote nou ti komanse, par lekel e ki kantite ki nou'n perdi, ki nou fitir zenerasyon pa pou zanmen konnen kote e si i ti egziste. Me zot pou zis tann kekfwa, kekfwa koz lo la ki alors en zour i ti deza pou Sesel e i ti deza pou Seselwa.

Mr Speaker, nou tradisyon, nou leritaz in devret a tou pri ganny prezeve e nourri pour ki i reste sa lyen solid ant nou pase ek nou lavenir.

Atraver sa Mosyon ozordi, mon ti a kontan konnen lekel ki'n neglig sa responsabilite pou proteze,

pou konserve, pou nourri e fer tou pou gard nou patrimwann dan son antyerte? Ki ozordi nou pa ti pou annan en tel Mosyon isi devan sa Lasanble dan zar pe montre landrwa lo sa Gouvernman aktyel pou vann nou leritaz, detri tou nou bann bote ek nou bann bon souvenir.

Lekel ki'n detri nou lidantite atraver vann nou patrimwann pli presye ankor, E sa se nou *passport*. Tousala pa'n ganny sofgarde, pa'n ganny proteze, avek ki ti komanse? Depi konbyen letan pase tousala ti pe arive? Eski sa letan i ti *ok*?

Mr Speaker, pou sitwayen Seselwa, tousala pa'n zanmen *ok*, Seselwa in plere pou son zil, kot peser ziska ozordi napa landrwa pase ni lapas dan serten lanvironnman dan nou prop lanmer aköz i nepli pou Seselwa.

Seselwa in plere pou son rezerv, kot bokou pye dibwa ranpli avek valer in ganny koupe pou fer gro sato. Latet montanny ki ti debout byen ver anba nou lesyel ti ganny defrise e debout avek en gran sikatris. Nou bann zoli lotel kot bokou bann bon souvenir ti'n grave, lakaz, propriyete, biznes, *passport*, kart idantite tousala se nou leritaz, tousala i form par nou patrimwann ek nou lidantite.

Seselwa in sibir sa ki ti oze koze ti'n mal fini. Mr Speaker, mon pa pe vot pou sa Mosyon aköz mwan mon'n donn ase legzanp kwa ki'n fini ale e ki pa pou retournen menm ki sa Mosyon i dan nou Lasanble ozordi. Gouvernman *LDS* in erit sa pei avek tou son sikatris, avek tou sa ki in perdi deza. Sa ki'n vann, ganny partaze e donneren pou faver.

Me sa ki'n konsol nou se ki gran mersi Prezidan Ramkalawan ti lager pou sov Lasonpsyon pou anpes li ganny vann pou vin en Baz Militer. Ozordi Lasonpsyon i reste pou Seselwa kot zis en kar sa zil in ganny *lease* pou fer en devlopman lotel lo la anba en *lease*. Mersi Gouvernman *LDS* pou ariv a tan pou kapab negosye lo serten zil kot ou kapab fer li ou'n fer e in retourn pou Seselwa.

Mr Speaker, i osi bon note ki nou Gouvernman pe fer en travay formidab pou protez nou lanvironnman pou sov nou bann aki, nou bann zil. Nou Gouvernman in met ladans moutya lo nivo enternasyonal, nou patrimwann tousala. Sov nou avyon ki anvol anba non nou pei *Air Seychelles*, tir li dan sa gro det ki zot ti'n kit li ladan.

Mr Speaker, nou Gouvernman pe fer tou pou meyer ledikasyon, meyer

lasante, besman lo pri lavi, plis vol aeryen dan nou pei e protez nou bann striktir tradisyonnèl pou ki fitir zenerasyon i benefisye dan tou son totalite. E ankò mon repete ki nou Gouvènman in vin ouvertman kot in dir i pou propoz en lamannman Konstitisyonnel pou sofgard nou bann zil.

Wi, mon pa pe siport sa Mosyon akòz zot pe senpleman rod *mileage* politik. Dan sa Mosyon napa okenn vre lentansyon travay avek lonnekte ek senserite pou sofgard nou patrimwann. Non Mr Speaker, pa li ditou, mon pa war li ditou sa enn. Mersi.

(APPLAUSE)

MR DEPUTY SPEAKER

Mersi Onorab. Prosen entervenàn lo lalis i Onorab Loizeau.

HON NORBERT LOIZEAU

Mersi Mr Speaker. Bonzour tou Manm, tou dimoun a lekout.

Mr Speaker, ankò en fwa i en plezir, mon panse ki mon enn parmi bann Manm en pti pe pli vye dan Lasanble e mon enn ki sorti dan en fanmir politik kot mon'n ganny sans pas atraver tou le 3 Gouvènman ki'n deza o pouvwar Sesel. E mon santi ki mon enn osi ki kapab koz lo

tou sa ki'n arive anba diferan Gouvènman, ki'n arive ek nou patrimwann ki nou pe koz lo la ozordi?

E ozordi mon kapab dir Mr Speaker, ki nou patrimwann ozordi pe ganny proteze e ler mon get Mosyon tou sa ki Mosyon pe demande nou ozordi nou pe fer. I pe koz lo lonnekte e nou mon santi ki nou en Gouvènman ki pe fer en ta keksoz ek lonnekte ek senserite avek lentegrite, e dimoun i war Mr Speaker, akòz tou keksoz i *accountable*. Sak sou ki nou anmase nou fer sir i annan *accountability* ki ganny fer pou fer sir ki i ganny fer pou benefis pep Seselwa.

Mr Speaker, dan deba ozordi nou pe koz bokou lo patrimwann. I annan ki'n koz lo leksplozyon, i annan diskour ti nepli lo patrimwann me plito diskour ti lo leksplozyon. Kan mwan, dan mon parkour lavi en ta leksplozyon i arive dan Sesel pandan letan ki zot ti dan Lopoziyon dan lannen 64 Onorab Desheila in koz en pe lo la, e menm ler zot in vin o pouvwar.

Mr Speaker, kot ti annan leksplozyon e la i fer mon mazin koudeta, pli gro leksplozyon se koudeta 77 Mr Speaker. Kot en group dimoun ti vol pei, ti vol patrimwann. Pli gran vole nou patrimwann ti ganny vole an 77 kot personn

pa ti ganny dir naryen, pa ti kapab dir naryen akoz zot ti konnen ki pou arive si ou pou koze.

E anba sa vizyon ki Onorab Vidot in koz lo la, sa vizyon ki Mr Rene ti annan ler in akonte Mr Speaker, ler Roche Caiman ti ganny ouver, kot son manman ti ganny sans ganny en lakaz Mr Speaker, mon konn son manman, *nice* madanm mon konn li tre byen, byen zantiy. Zot ti ganny zot lakaz wi e parmi tou lezot bann, sa bann letan ou ti bezwen siport Gouvernman pou ou kapab ganny sa bann keksoz.

Mr Speaker, me sa ki tris ler zot, zot ti pe ganny sa bann lakaz zot ti pe byen pase, Mary Dookley en madanm dan mon distrik, li sa bann letan, letan zot ti pe rezouir tou zot patrimwann ki zot ki Onorab Vidot in dir li i ti pe plere dan lafreyer dan son lakaz akoz, son msye Pierre li, i ti'n ganny anfermen dan prizon akoz i pa ti kontan sistenm, i ti pe lager ki nou patrimwann i ganny retournen ki sa ki ti'n ganny vole an 77 e li i ti a pe plere Mr Speaker.

Bokou ti ganny sere. Sa letan Mr Speaker, ler sa bann group dimoun ki ti pe rezouir nou patrimwann Mr Speaker, bokou ti pe pler an silans, si ou pa ti kontan ki pe fer Mr Speaker, ou ti koze sa bann

letan ler, par egzantp Onorab Vidot zot ti pe rezouir zot propriyete Mr Speaker, serten dimoun zot ti pe ganny anfermen dan kaso, bate e menm ganny trouve dan en rigol anba en pon Sans Soucis.

Bokou dimoun Bel Air in eksperyans sa Mr Speaker. Sa bann letan pou lapenn nou pe lager pou nou retourn nou patrimwann ki ti'n ganny vole, an 77 Mr Speaker, sa bann letan 'ek nou pa ek nou' ti'n pran son laform dan Sesel.

E ozordi sa bann menm dimoun pe fer krwar ki ozordi sa bann keksoz pe arive Sesel. Nou patrimwann pe ganny vole, tou keksoz pa pe mars byen, e Mr Speaker, nou'n vwar dan sa Mosyon la i annan 3 valer, lonnekte, senserite ek lentegrite.

Mr Speaker, sa i 3 valer enportan e mwan mon anvi demann en keksoz avek bann Manm lot kote latab, Mr Speaker i annan 4 zot pa'n fer zot deklarasyon *asset*. Eski zot onnet? Ozordi nou vin ek en Mosyon lonnekte, senserite, lentegrite. E dapre konpran i enkli loter Mosyon, eski zot onnet? Oli lonnekte?

Mr Speaker, ler nou vin avek en Mosyon lonnekte nou a bezwen montre onnet. Koman en Manm Lasanble ou ganny demande pou fer serten keksoz ou bezwen fer. Mon ti a kontan- sa voyaz nou'n fek

ganny sa, fek vini yer sa deklarasyon *asset*, mwan mon'n fini anpli pou mwan mon pe mazine ki sa 4 Manm...

MR DEPUTY SPEAKER

Onorab, annou *move on* lo la aköz ou pe al kont *Order 59 (5)* ki dir ou pa bezwen koz lo *conduct* en Manm *unless* i dan en Mosyon. So, annou evit skandal, *move on*.

HON NORBERT LOIZEAU

Mr Speaker, mon *retract*, eskiz mwan Onorab Loze si mon nonm ou non, eskiz mwan Mr Speaker.

Selman vi nou pe koz lo lonnekte Mr Speaker, eski sa i onnet lo nou bann Manm ki sipoze donn legzanp, eski sa en keksoz onnet ki nou'n fer pa fer nou deklarasyon? Sa mon pwen ki mon ti anvi sorti mwan pou mon i malonnet. Ler nou donn legzanp nou bezwen swiv. Montre dimoun ki nou en legzanp.

Mr Speaker, nou lo nou kote tou keksoz ki nou'n fer nou'n fer li drwat tou sa ki nou'n fer nou'n fer li drwat e ozordi Mr Speaker, mon kapab konpran aköz *US* dan zot vizit zot pe dir ek dimoun zot anvi ganny elekte pou zot vin koriz zot fot lepase.

Be ler zot i pase zot in dir zot bezwen retir Norbert, aköz zot bezwen entre pou zot vin

koriz fot lepase, lekel sa fot lepase Mr Speaker, eski ki sa ki pe demande dan Mosyon la? Aköz tou sa ki dan sa Mosyon Mr Speaker, nou pe fer. Mon pa war naryen ki nou pa pe fer dan sa Mosyon.

Loter Mosyon Mr Speaker, in koz lo annou fer sa bon refleksyon. Eski- mon kontan en zoli refleksyon ki in fer me selman tou sa bann keksoz pe ganny fer e nou, nou'n fer bann refleksyon. Par egzanp Mr Speaker, premye refleksyon ki nou'n fer ler nou'n antre dan Gouvernman se ki nou'n war ki Gouvernman *US* in fer Sesel vin en *welfare state*.

E sa i danzere pou en pti pei ki pe devlope kot ankouraz dimoun pa fer naryen, asize dan distrik vey zaksyon, raporte ek parti e zot, zot pou ganny tou Mr Speaker.

E ki nou'n fer, nou'n aboli *URS*, ou apel Mr Speaker, kot dimoun zis pe asize pe ganny peye lo lasyer Seselwa? E menm ozordi toultan mon dir i annan menm non, i ankor kot lanplwa pou zot vin sers zot larzan, me selman sa bann dimoun pa egziste - i annan milyon kot lanplwa pou espere.

Mr Speaker, lo kote anrisir, nou'n fer bokou nou'n anrisir nou lekonmi. E ler nou fer li Mr Speaker, nou fer li an retour ki nou ganny en

keksoz pou Lepep Seselwa, nou pa fer li parey loter Mosyon in dir kot nou donn sa dimoun en gato maryaz pou li koupe ler i ganny son maryaz Mr Speaker. Non, nou fer sir ki tou sou, tou keksoz ki nou fer nou fer li byen.

Kot ki konsern nou patrimwann Mr Speaker, nou fer sir ki tou keksoz i anliny. E la zis mazine Mr Speaker, byento dan nou Lasanble i pou annan en lamannman Konstitisyonnel an relasyon avek sa. Kot nou pou fer sir ki nou patrimwann i ganny proteze, byento i pou ariv dan Lasanble.

Mr Speaker, ozordi nou'n tann bokou koz lo Lasonpsyon, swa ozordi nou'n prefere ki Lasonpsyon i annan en devlopman touristik ki ganny fer laba Mr Speaker, laba e tousala kantmenm nou pe koz lo la, Lopozisyon pe koz mal lo la in ganny fer dan laklerte.

Ti vin devan nou Lasanble kot bann *tender* ti ganny fer e en devloper zis enn ki ti vini e li in gannyan e sa devlopman pe bouze, nou, nou ti fer li dan laklerte. Mr Speaker, me par kont, dan letan avan, Lasonpsyon ti en landrwa ki ti pe ganny gete avek en lizye ganny en keksoz, donnen ganny en keksoz.

Mr Speaker, mwan en Zofisye IDC in dir mwan

personnelman, apard baz militer sa nou koz apre, Ti annan en konpannyen petrol ki US, Gouvernman SPPF, SPUP ti pe al donn Lasonpsyon pou met tou zot bann tenk petrol aköz *high seas* i lanmenm la obor e pou pli fasil pou bann *tanker* vini zis konekte pran zot petrol, ale distribye,

Mr Speaker, en zofisye gran mersi IDC Mr Speaker, IDC ti met lipye ater ti dir non, aköz Aldabra i la obor i pa pou bon si i arive ki i annan delwil ki *spill* lo lanmer i pou afekte Aldabra.

Mr Speaker, gran mersi IDC atraver CEO sa letan Mr Savy ki zot pa kontan li konmela, ki US pa kontan, zot ti met lipye ater Mr Speaker, e sa pa ti arive. Sa enn ki nou konnen Mr Speaker.

Mr Speaker ozordi, ozordi bann keksoz i pas anba, anba Baz Limiter nou konnen lekel ki ti siny paye, dapre konpran en lot zofisye ki pe aspire pou vin Prezidan ki ti siny dokiman pour ki Lasonpsyon i ganny fer en Baz Militer lo la Mr Speaker.

E tousala bann keksoz kot nou patrimwann ti pe ganny vann e nou, nou pa ti konnen e sa letan ler nou ti dan Lopozisyon nou ki ti lager pou fer sir ki sa bann Baz Militer pa fer nou, e nou pou fer sir anba Gouvernman LDS

napa okenn Baz Militer ki pou fer lo Lasonpsyon malgre serten parti petet in ganny ofer lakaz, 2mil lakaz, 40 dan en mwan par serten pei pou ganny sa Mr Speaker, nou pa pou gannyen- nou pa pou fer.

Mr Speaker, ozordi nou patrimwann in ganny vann dan diferan mannyer, nou *passport* ti annan en moman si ou annan larzan ou en etranze ki annan larzan ki antre Sesel ou ganny en *passport*, ou menm ganny en non Krejcir ti ganny *passport* i ti ganny en non, Jules Savy. Ozordi in *end up* laba. En keksoz valer Mr Speaker, ki nou ti pe donner.

E pa bliye Mr Speaker, mon rapel dan katriyenm Lasanble, mon rapel kot en msye ti vini ti ganny *passport* Siva *Ambassador-at-large* e nou, nou ti lager nou ti dir non plito donn nou Mr Mancham e zot, zot ti dir non, zot ti donn sa msye, ki ti arive? Sa msye in aste tou propriyete, tou nou patrimwann sa msye in aste.

E ler nou ti pe vizit Coetivy Mr Speaker, ti annan en morso nou pe vizite e sa dimoun ki ti lo sa *buggy* ek nou i dir nou la nou pa pou kapab ale aköz la later sa msye, gran morso Coetivy pa pe devlope, ki en lot investiser ti kapab vin fer lotel lo la tousala in ganny vann e tousala ti nou patrimwann.

Mr Speaker, sa koze patrimwann si nou koz lo la pou annan tro bokou pou dir. I annan in koz lo Sainte Anne pou R1, ozordi i annan dimoun in fer milyon, *lease* avek en lot dimoun, *lease* ek kot ozordi lekel ki la, *Club Med*.

E zot, zot pe asize pe anmas larzan Mr Speaker, Zil Anonim, kot serten zanfann serten Prezidan ti gannyen apre vann avek en etranze mon'n tann en Manm in dir ki benefis i anmennen pou Sesel? Mr Speaker, be ki benefis sa ki nou'n koz lo la i anmennen pou Sesel? Mr Speaker, Seselwa pa'n ganny naryen.

E mon anvi demande, zot pe koz, i annan pe koz lo nou pe vann nou patrimwann, Mr Speaker, personn pa'n nonm enn nou patrimwann ki zot in nonmen. E mwan mon anvi dir ki nou Gouvernman nou, nou pa pe vann naryen e nou, nou pou fer keksoz drwat, dan lentere tou Seselwa.

Ozordi Mr Speaker, i annan en ta keksoz -(mon konnen mon letan pe fini ti reste 2 minit lo Onorab Desheila mon a pran atraver ou Mr Speaker, permet mwan donn mon zis 2 minit lo Desheila ma pran)-

Mr Speaker, Pale Kalifa lekel ki ti donner? Lekel ki ti vann? Kot in ariv en bann kalite mangrouy kot larzan

delo malpropte ki bann Onorab William e lezot in servi, in bwar, ki ganny partaze a lafen zis 250 mil, zis 250 mil ki'n donner. Mr Speaker, tousala nou patrimwann.

E ozordi tou nou patrimwann pe ganny proteze Mr Speaker. Nou bann *trails* dan Bel Air tou nou bann *trails* pe eksepte Cascade Onorab Tamboo li ki pa'n netway tou *trail*, si i ganny eleksyon 2 mil zanmen dimoun Cascade pe esper ou pou vin netway tou sa *trail* ki annan cascade ki Onorab Monthy pa'n netwaye aköz ou Onorab *Trail*.

Mr Speaker, mon- aköz li i kontan sa bann zafer *trail* li, Mr Speaker. An terminan mon anvi dir avek Lepep Seselwa pei i dan bon lanmen, tou sa bann keksoz ki pe dir atraver sa Mosyon la in deza pe ganny arive.

E pou kontinyen arive e sa lot Gouvernman a lavenir ki'n ganny koz lo la se *LDS* sa ziska 2030, apre nou a gete ankor ki pli devan nou pou ale, aköz Seselwa i kontan ki nou pe fer. Seselwa i apresye ki nou pe fer e Seselwa pe dir *no turning back*. Mersi Mr Speaker.

(APPLAUSE)

MR DEPUTY SPEAKER

Mersi Onorab. Prosen enterven an lo lalis se Onorab Andy Labonte.

HON ANDY LABONTE

Mersi Mr Speaker. Bonn apre midi Mr Speaker, tou koleg Onorab e tou dimoun ki a lekout spesyalman tou zabitan Larivyer Anglez ki vremen kontan zot *MNA* ki zot in elekte.

Mr Speaker, Mosyon anmenn par Onorab Loze pe demann laprouvasyon Lasanble dan son totalite pou siport li, fer pase en mesaz avek Gouvernman aktyel e bann Gouvernman dan le fitir pou fer 3 keksoz Mr Speaker; -

Travay avek lonnekte, travay avek senserite, travay avek lentegrite, avek bi, pou sofgard e protez patrimwann Sesel dan son antyerte pou benefis nou bann fitir zenerasyon.

Mr Speaker, sa Mosyon li menm napa okenn personnelman avek li, aköz napa problem avek? Le mwan eksplike Mr Speaker, lonnekte i vedir karakteristik sa ki konnen ti e pou travay onnet i vedir karakteristik ki viv an konformite avek Lalwa drwat e fran.

Travay avek senserite, i egal avek lonnekte ek lwayote, savedir kalite en dimoun ki senser lwayal, fidel e pa trair. Travay avek lentegrite, ki egal

totalite, leta en keksoz ki reste entak ki pa sanze, i vedir la priyorite vedir karakteristik sa ki pir.

Mr Speaker, pou sofgard e priye patrimwann Sesel dan son antyerte pou benefis nou bann fitir zenerasyon; Tou sa ki sa Mosyon pe demande i bon, me selman Mr Speaker, en keksoz ki mon apresye se ki finalman Onorab Loze in rekonnet ki pandan sa 43 an ki *SPUP*, *SPPF*, Parti Lepep, *US* ti pouvwar zot pa'n zanmen obzerv sa 3 valer ki tou bann Manm ki'n koze lo sa lot kote zot in fer sorti e zot in konfirman ki i vreman enportan pou en Gouvernman ki pe diriz en pei.

Me Gouvernman avan i montre ou ki zot in *fail* lo tou sa bann valer ki li ozordi Onorab Loze pe vin met devan nou. Me i malere Mr Speaker, ki ozordi *US* zot Kandida Prezidansyel ki Dr Patrick Herminie pa pe obzerv sa bann tel bon valer ki apel lonnekte, senserite e lentegrite.

E la mon pou met lo rikord Mr Speaker, ki menm mwan zot in sey vyol mon lonnekte, mon senserite e menm mon lentegrite koman en Manm Elekte, me sa i en lot topik. Me les mwan eksplik serten keksoz Mr Speaker, ler Dr Patrick Herminie i pran desizyon pou li vann V8336 ek V8337, en morso later ek en

batiman ki annan en valer vreman enportan pep Seselwa e sirtou zabitan Larivyer Anglez ki'n deza elekte li 3 fwa, sa i apel ki in vyol lonnekte zabitan Larivyer Anglez.

E sa i en landrwa kot nou bann zenn ti detann, nou bann kominote trwazyenm az ti servi lo en baz kotidyen pou fer bann rankont e defoule. I en landrwa kot plizyer nou bann zabitan in selebre zot maryaz e i vreman annan en valer ki vreman enportan e i apel protez nou patrimwann.

E menm Mr Kadril ki en peser ki'n viv la toulezour i dir li koman en zabitan ki'n la i en landrwa, i en batiman kot zabitan pep Seselwa zot menm zot in ede pou investir pou fer sir ki sa *building* in ariv parey i ti ete aköz en letan i ti ganny servi pou li stok diri dan bann letan lontan ki mwan mon pa konnen me li i konnen. Savedir i montre ou poudir i annan en valer vreman enportan.

Alor, Mr Speaker, atraver ou mon ti a kontan dir avek Onorab Loze retourn avek sa Mosyon dan ou kan laba *Maison Du Peuple*, kot ankor *Maison Du Peuple* i en landrwa ki apel pou pep Seselwa, aköz *Maison Du Peuple* i en kado ki'n ganny donnen pou Sesel, savedir i apel en patrimwann Sesel.

I ti ganny donnen pa pou US me pou pep Seselwa. Alor, mon konsey Onorab Loze retourn *Maison Du Peuple* dir avek ou dirizan, ou Dokter ki pe deside pou li vin Prezidan rann Seselwa sa ki apel pou li avan *then* apre ou Mosyon i a vin kot nou.

Apre mon ti a swete ki menm Onorab Loze ou ti ava al dir avek li aköz in refize, in refize pou li retourn sa sant - ankor enn fwa mon pou kontinyen ensiste lo la aköz i enportan pou nou zabitan Larivyer Anglez.

Aküz mwan mon'n annan en dyalog avek li lo la partikilyerman ki i ti dir i pa pou vann ki finalman in vann. E ozordi enn zot gran sipoter i dir mon dir avek zot, zot in vann sant kot zot ti fer rankont e nou ti fer rankont ozordi ler zot anvi fer zot miting politik zot demann pret leköl pou zot al fer zot miting ladan kan nou ti annan en landrwa kot nou ti kapab fer bann tel kalite aktivite. I montre poudir zot pa senser e vreman ipokrit.

Mr Speaker, e la Dr Herminie yer nou ganny lenformasyon ankor in mont anler Ma Joie kot serten dimoun, serten in ganny R1500, serten R1000, serten R500, ki ankor zabitan i dir avek li eski se larzan ki'n ganny vann sa sant ki ou pe donnen? Be vin onnet avek zot

fer zot konnen. Aköz zabitan in dir ek li zot pou pran son larzan me selman zot pa pou vot pou li.

Dezyenmman Mr Speaker, mon annan en lot sit vreman enportan dan Larivyer Anglez, sa se *La Bastille*, i annan en valer ki vreman istorik i osi enn nou patrimwann Sesel. E zot, zot in les li tonm an rin, ki ti anba zot *watch* zot in pas sa avek serten mon pa konnen si zot bann dalon *whatsoever*.

Naryen pa'n ganny materyalize ozordi nou war poudir sa landrwa i zis en landrwa ki'n ganny anvair malgre nou pe sey toudsort fason Gouvernman aktyel ankor enn fwa toultan nou pe nou'n war nou pe dil avek bann ka ki zot, zot in mal dirize zis parey sa Mosyon sa kestyön ki Onorab Pillay yer ti anmenn dan Lasanble in fize avek li konsernan *Nyala*, ki ankor zot fot ki zot fer apre zot rod en fason pou retourn lo nou.

I montre ou poudir US Mr Speaker, zot napa direksyon e zot in fini bite. Mr Speaker, parey mon'n dir napa naryen mal avek sa Mosyon, me Onorab Loze i bezwen rekonnet ki sa ki diferan ant *LDS* avek *US* se ki an 2020 nou *moto* lo nou *manifesto* ti kler 'Sesel Pou Tou Son Zanzan' sa i vedir nou zenerasyon yer nou

zenerasyon ozordi e nou zenerasyon le fitir Mr Speaker.

I montre ou ki *US* pe vin aprann travay avek *LDS*. Zot konn zot fot ki zot in fer, parey zot in pas dan distrik zot pe demann pardon, pardon met konfyans dan li e dimoun Larivyer Anglez ankor in dir li, “Non, mersi Mr Herminie aköz ou'n vol nou konfyans”.

La prezan nou ki'n vini nou pe netway semen nou pe retir tou zot bann koripsyon ki zot i fer, viktimizasyon ki ti egziste, partou kote nou'n elimin tou zot bann forfe, zot anvi fer pep Seselwa krwar ki se *US* ki pe envant sa 3 vokabiler ‘lonnekte, senserite e lentegrite.’

Mr Speaker, *LDS* in deza pe fer tou sa ki Onorab Loze pe demande dan sa Mosyon. Alor pep Seselwa pe dir *no turning back* e kit li lanmenm aköz sa pei depi 2020 pe ganny gouvnen avek lonnekte, senserite ek lentegrite.

E dan nou *manifesto* Mr Speaker, sa *slogan* ‘Sesel Pou Tou Son Zanzan’ ki menm met an valer plizyer lezot keksoz e lo paz 9 ankor Mr Speaker, ki mon pou refer lo la aköz sa e ki toultan zot dir poudir nou, nou pa pe met an valer lo paz 9 i koz lo protez lo souvrennte teritwar e sitwayennte. In ganny fer sorti lekel ki'n vann nou *passport*, pa Gouvernman

LDS se Gouvernman oparavan.

Mr Speaker, savedir nou'n prevwar tousala dan nou *manifesto*. E nou pou al pli lwen ankor, dan sa menm *manifesto* si nou la lo paz 20 i koz lo lapas, ki mannyer nou pou sofgard nou lanmer e nou teritwar, aköz Mr Speaker? Aköz i vremen enportan e i vremen ris.

E semenn pase nou fek vot en Prozedlwa ki koz lo *fisheries* e *aquaculture* ki menm zot lo sa kote zot in agree e zot in vote zot in donn sipor aköz zot war poudir sa Gouvernman pe delivre e zot in donn sipor.

Alor, i montre ou poudir Gouvernman aktyel pe delivre. E mon pa war aköz ki i en tel Mosyon i pe vini kan nou deza pe fer tou sa ki zot pe demande ladan. Mr Speaker, menm se Gouvernman *LDS* ki sa letan ler zot ti dan Lopoziyon dan zot mazorite zot ti pouse ki kiltir ek leritaz i ganny sorti anba en Minister ki i ganny mete separe aköz ankor? Pou nou protez nou patrimwann Mr Speaker.

Mr Speaker, parey mon'n dir rezon aköz mon pa pou kapab vot pou sa Mosyon i senp, mon napa naryen mal kont sa Mosyon mon apresye ki Onorab Loze in rekonnèt ki dan lepase son parti pa'n

promot sa bann tel valer e nou dan *LDS* ozordi nou pe fer li.

Me selman, i domaz i montre ou poudir zot pa onnet zot pe zis fer Seselwa kler ki plizyer mon koleg lo sa kote in fer resorti bann pwen aköz zot pe zis fer krwar pou dir zot bann sen, kan saler zot pa bann sen ditou e zot krwar poudir pep Seselwa pou met konfyans ankore dan zot e nou Seselwa zabitan Larivyer Anglez pe dir avek zot *no turning back* e nou pou kit *LDS* lanmenm.

Mr Speaker, avek sa de mo, mwan mon pou dir mon pa kapab siport sa tel Mosyon, aköz en keksoz ki nou deza pe fer mon pa war aköz ki li Onorab Loze i oule ki nou retourn *back* an aryer pou nou fer bann keksoz ki zot, zot pa ti fer. So retourn dan ou kan, met lord kot ou apre ou a vin dir nou ki pou fer. Mersi Mr Speaker.

MR DEPUTY SPEAKER

Mersi Onorab. Prosen entervenan lo lalis Onorab Aglae.

HON EGBERT AGLAE

Mersi Mr Speaker. Bonn apre midi tou Manm Onorab e tou bann dimoun ki enterese ek sa size lo sa Mosyon ki devan nou.

Mr Speaker, dernyen entervenan ki'n koze avan

mon pran laparol in dir ki sa Mosyon i bon. E selman mon pe kestyonn son senserite ek son lonnekte li menm? Mr Speaker, letan nou koman en Manm Parlman nou'n pret serman dan nou *Oath of Allegiance* nou'n dir poudir nou pou prezerv nou Konstitisyon e ki nou pou sofgard li.

E dan *preamble* nou Konstitisyon Mr Speaker, i annan 4 premye laliny li enteres mwan i koz lo "*grateful to the almighty God that we inhabit one of the most beautiful countries in the world*". "We", i reste parmi dan enn bann pli zoli zil isi dan Sesel koman en pei.

Dezyenm parti *preamble* i koz lo "*ever mindful of its uniqueness and fragility of the Seychelles*". Wi, Sesel i frazil e tou kou nou koz lo bann konsekans frazilite nou sosyoekonomik sirtou.

Trwazyenm i koz lo ki nou konsyan, "*conscious of our colonial history before becoming an independent republic*". Wi, nou annan en lepase kot nou ti tonm anba kolonizasyon e ozordi nou en repiblik endepandan.

Mr Speaker, mon'n tous sa 3 pwen aköz ozordi mon war en Lasanble sirtou atraver *LDS* ki pa'n sezi sa ki sa Mosyon pe anmennen par Onorab Loze pe demande. Wi,

Onorab Loze i enn bann reprezantan *MNA* lo kote *US* ki souvandfwa zot in war li koman en Onorab petet konsyansye mon kapab dir.

Me selman Onorab e mon kapab dir petet zot pa kontan li osi, me Onorab in fer li son devwar koman en Manm Parlman pou anmenn en Mosyon ki pe regard lavenir pei. Regard le fitir parey in dir dan son Mosyon avek lonnekte, senserite, lentegrite e pou sofgard e protez patrimwann Sesel dan son antyerte.

Mosyon en Mosyon ki pe regard ver lavenir. Be ki nou, nou'n war? I annan 9an pase depi ler 2016 mon'n vin dan sa Lasanble koman en Manm Elekte 9an pase ziska ozordi i fer 9 an, *LDS* in vin avek en politik 43an pase. Zot in vin avek *TRNUC*, zot in rod bann diferan size ki'n arive dan lepase kot zot in fer politik avek.

Mon napa problem ek sa mwan, i ti zot devwar parey zot ti dir pou al klere ek tors 12 batri, napa problem ek sa mwan. Be mon kestyon e sa ki lazenes pe demande ozordi, kan eski *LDS* pou *move on* pou anmenn sa pei koman en nasyon inifye e get lavenir dan plas kontinyen retourn dan lepase ki plizyer pa ti ankor ne, pa konnen ki ti pase e ki zot pe anmenn en kalite politik

ki pou mwan lemonn pe kit deryer pe ale e nou pe war lo nivo Lafrik ki pe arive.

Zot pe *move on* ver lavenir e pe pran desten dan zot lanmen, se sa ki Mosyon pe demande pran nou desten protez sa ki nou annan pou fitir zenerasyon pep Seselwa.

LDS you are failing ek ou 43 an pase ki ou kontinyen dir e repete ou krwar poudir tou sa, kantmenm ou pou repete e kontinyen repete i pou ariv en moman letan e pe ariv sa moman letan kot pep Seselwa pe dir ou be mon'n fatigue tande sa mwan, *what's new?* Kwa ki ou pe vin fer kwa ki ou pe anmenn? E se sa ki Mosyon pe demande.

Mr Speaker, lonnekte, senserite e lentegrite i 3 mo ki enportan. Me dan gouvrenans nou bezwen konnen kwa ki nou, nou annan e kwa ki nou, nou kapab partaze avek lemonn eksteryer, par egzanp, nou'n koz lo bann pei *UAE* e loter Mosyon in koz lo son *sovereign wealth* me osi bokou plizyer pei *UAE* zot annan sa larises delwil e zot partaz ek lemonn menm si ou pe peye zot partaz ek lemonn.

E ou pa war ozordi kot bann pei *UAE* kot ou pou ale ou pou al aste en bout later lo en *stamp free hole* non, zot *lease* ou, sa Mosyon pe anmenn en refleksyon lo

lafason ki nou fer ek sa pti gin ki reste nou e ki nou annan.

Lepase ti annan en konteks, parey plizyer pei in pas dan kolonizasyon e in al dan lendepandans. E dan letan kolonizasyon i annan bann legzizans eksplwatasyon ki arive ki ou pa kapab kontrole ou, parey letan Angle, Franse ti vini nou ti annan nou bann plantasyon lavannir, koko, lezot eksetera ki zot ti eksplwate Sesel.

Menm si nou, nou bann desandans ti Seselwa nou ti napa kontrol lo la pa ti kapab anpese sa ti en sours lekonomi sa letan. Be letan nou pe regard dan konteks sirtou ki pe arive ki nivo Lafrik, plizyer zot bann resours mineral ti ganny eksplwate pou benefis sa bann kolonizater.

Ti zot patrimwann sa. Zot pa'n zanmen *enjoy* li zot, e mon kontan ki i annan sa *stands* ozordi koman en Lafrik ki pe sanze son *mindset* lo sa size pe dir non, nou met en *full stop* la in ler pou arete. Ou pa kapab ou en pei pou annan en pli gro min lor, selman ou menm ou napa en rezerv lor ou, ou kanmarad ki annan.

Nou'n war sa, mon pa an vi nonm non pei mwan, aköz dimoun i ekout nou. Be nou koman en pei nou, ek sa ki reste nou la ozordi nou'n met lanmen pou *uphold the constitution of Seychelles*, nou

pa war poudir sa Mosyon nou pe demann sa? Pou kapab regard lo lavenir en diskisyon ki nou pe fer la.

Ki mannyer nou sofgard sa ki nou annan baze lo legzizans devlopman, wi nou pou bezwen annan devlopman be selman nou bezwen konnen kwa ki nou donnen letan nou pe fer devlopman.

Mr Speaker, letan mon get mon pei li menm, tou kou mon fer referans i annan 2 sit, Sesel lo Mahe ki ankor mon kapab dir bann sit istorik e osi bann sit ki annan bann potansyel e la mon pe refer avek Cap Ternay e osi i annan sa parti Intendance Grand Police. Kot son laverdir ek son biodiversite i ankor dan en leta mon kapab dir entak.

Konmsi nou pa reflesir poudir nou riske perdi sa 2 sit koman en pei si nou fer bann aksyon ouswa nou *allow* serten devlopman ki demen nou fitir zenerasyon pa pou konnen ki mannyer i ti ete sa letan ozordi.

E se sa ki nou pe rod proteksyon pou sofgard sa bann patrimwann parey nou annan plizyer zil osi ki enportan dan son laspe ekoloji e ki anmenn valer se sa ki fer Sesel li menm e bokou bann lorganizasyon enternasyonal e pei i regard nou pou sa aköz nou'n proteze pandan plizyer sa lannen ki'n

vini, plizyer deseni e nou'n menn pas Lalwa pou anmenn ki sa bann patrimwann ki nou'n erite i reste dan son antyerte.

Be ki nou pe war? Ki tandans ki nou pe war? Se sa ki'n anmenn sa opsyon aköz nou pe war bann tandans kot sa bann keksoz i riske ganny sakrifye lo non devlopman e lo non ekonomik. Si nou ti fer dan leparse parey mon dir letan nou ti anba kolonizasyon ti annan nesesite ki zot ti bezwen fer serten eksplwatasyon ekonomik.

Be eski la nou annan nesesite pou nou kontiny al avek sa laliny leksplwatasyon pou sakrifye serten parti nou patrimwann lo non larzan ekonomik. Nou'n modernize nou'n avanse dan sa lemonn, i annan dan diferan sours ekonomik e *income* ki nou kapab antre ladan.

E letan ou pe regarde sa bann kalite devlopman i benefis zis serten group dimoun pa neseserman pep Seselwa menm si zot a dir kontribye *tax*. Parfwa ki sa bann *tax* i minim e plizyer sa bann larzan pa antre dan kof Sesel i reste la par deor dan kwen.

Mr Speaker, sa refleksyon ki nou pe anmenn i enportan nou koman en parti ki pou vin dan

Gouvernman apre le 27 Septanm.

(APPLAUSE)

HON EGBERT AGLAE

Mon pe dir ek nou bann zenn poudir nou pe met en *full stop* avek kot i konsern pran nou bann aki e patrimwann zis pou donnen lo non devlopman ouswa lo non ekonomik.

Zot pou bezwen vwar e zot zanfani ki pou swiv pou dir non kapab gard serten nou leritaz, nou tradisyon nou fason fer nou kiltirel ki anglob tou i reste, nou pe perdi plizyer sa bann aki.

Mr Speaker, mon pran bann legzanp senp e taler en Onorab in koz lo letan zot in pran sa Departman Kiltirel zot in met li lo en *own*, lo son lekor. Be in pa'n marse e i pa pe marse. Letan i ti ankor anba son Minister i ti annan plis lenpak i ti pe fer en diferans, zot pa pe war sa zot.

Kantite lenvestisman ozordi ki'n ganny mete ladan pou sofgard? Parfwa bokou etranze i vin koze ou pe rod sa ki nou Seselwa nou, nou keksoz ki nou fer, nou tradisyon nou kiltir lot ki preske in egzistans pou al montre en touris ozordi. E abor nou, nou annan nou frer Moris i *value* son tradisyon i *value* son kiltir plis ki nou.

Nou, nou bezwen rod fason e se sa ki Mosyon pe demande ki mannyer nou bezwen re asiz lo en latap pou vwar ki mannyer nou kapab sof gard sa bann keksoz, sa ki'n pase in pase, 43 an in pase i pa pou retournen ou pa kapab efas listwar nou, in arive sa. Be la nou le regarde ki mannyer nou dir be gete la in ariv moman letan pou nou regard tousala e arete. Sa ki Mosyon pe demande e sa ki mwan mon pe siporte.

Zot in koz lo *US* pran kredi lo sikse atraver ou Mr Speaker, Onorab Samynadin osi in demande *what success*, in koze in dir pa fer sans i dan vag. *Seriously?*

Nou ki'n pran kredi lo travay *LDS*? 4an ki zot in la nou'n pran kredi lo zot? Annou serye. Si zot get obor zot dan Sesel, get toultour nou sa ta devlopman ki'n ganny fer in dan nou letan sa. Nou *tax payers money yes*, tou sa devlopman batiman, lenfrastruktir nou'n fer sa ki zot pe fer *maintenance* lo la, nou ki ti'n fer.

Yes, sanmenm sa nou pe dir *tax payers money savedir tax tax payers money savedir* parey zot ti dir nou'n vol larzan- savedir nou pa'n vol tou larzan parey zot in dir.

(comments off-mic)

HON EGBERT AGLAE

Nou'n anmenn devlopman, nou'n anmenn devlopman dan sa pei.

(comments off-mic)

HON EGBERT AGLAE

Mr Speaker, i reste mwan zis en minit pou koze, mon pou konklir an di-z-an sa; en Gouvernman i bezwen fer e pran bann aksyon ki pou enspir son pep, lenspirasyon i sanmenm sa moter ki met lenerzi dan son pep pou li kapab leve bomaten dir mon pe al kontribye ver devlopman mon pei.

Ozordi pa egziste, nou bann zenn dan en sans pa pe ganny regarde, napa en plan konkret, napa en direksyon kot zot pe ale. Akoz, tou i annan pou fer avek vizyon e laspirasyon dan sa pei, e nou dan *US* nou, nou pe dir zot poudir nou pou redonn Seselwa sa dinyite, nou pou redonn Seselwa sa laspirasyon, nou ou redonn Seselwa son lazwa de viv apre le 27 Septanm.

(APPLAUSE)

HON EGBERT AGLAE

E ki zot kapab kont lo *United Seychelles*. Mersi.

MR DEPUTY SPEAKER

Mersi Onorab. Prosen entervenan lo lalis Onorab Sathya Naidu.

HON SATHYA NAIDU

Mersi Mr Speaker. Atraver *beach soccer* nou'n war lazwa de viv parmi nou pep, e *beach soccer world cup* in ganny fer pandan nou ladministrasyon, kot nou ladministrasyon malgre serten defi nou'n demontre avek lemonn poudir ler le moman in arive pou nou fer le lesansyel nou vin devan.

E nou fer tou sa ki posibil pou fer sir ki nou paviyon dan nenport ki lemonn ki tou sa bann dimoun pe regard sa spektak i konnen kote eski Sesel i sitye e zot in nobou kapab osi realize poudir nou'n annan en lekip formidab ki'n reprezant nou pei avek lafyerte.

E pou mwan lo lafason ki bann zwer ti pe sant Lim Nasyonal, i montre latasman ki zot annan ver zot pei, e mon dir mersi pou sa bon performans ki zot, zot in mete e mon osi dir mersi Lepep Seselwa, lo lafason ki zot in akey sa tournwa foutbol ki'n fer ki atraver sa ladministrasyon nou'n demontre poudir nou lo en bon semen.

Ler Onorab Loze ti'n prezant son Mosyon mon ti pe poz serten kestyon, ki bi sa Mosyon? Mon ti pe demande ki

bi son Mosyon, aköz lo lafason ki i ti pe ale ou bezwen premyerman poz en kestyon. Aköz ki i pe koz lo sa Gouvernman aktyel, lefitir i bezwen annan lonnekte, senserite, lentegrite tou bann bon keksoz ki sa Gouvernman i dwatet annan en, dapre li.

Me selman i sorti dan sa menm Gouvernman ki'n la dan lepase, sa 43 an ki zot, ki zot oule efase e an menm tan ler zot pe prezant zot parti politik koman en *New United Seychelles* zot a pep viv lo ideoloji Albert Rene.

Be ki mannyer eski zot nouvo? Ozordi nou vwar en parti dan Lopozisyon ki pe *struggle* pou retrouv zot lidantite. Zot pe *struggle* pou zot kapab konnen ki mannyer eski zot kapab bouz sa pei de lavan, zot napa vreman nide pou zot kapab avanse, apard relye lo bann mansonz pou zot kapab avans okenn pwen politik avek lespwar poudir ki dimoun krwar dan zot.

Les mwan fer resorti poudir ki wi, Onorab Loze si son bann koleg lo lot kote latab ti'n reste lo size ki li ti pe sey avanse. Mon'n war ki'n tous lo labi zanfana wi, i en size ki relevan ozordi dan nou sosyete.

Zisteman yer, Onorab Anne Bistoquet koman en Manm ki sorti lo nou kote parti in met devan en kestyon pou

demann Minis ki pe ganny fer. E sa size ki la i pa zis anba nou ladministrasyon dan sa 4 an ki nou'n erit en sityasyon koumsa, nou tou nou konnen poudir ki malerezman lo lafason ki nou sosyete in avanse malgre bokou progre in osi annan defi.

E alors ou ti pe espekte bann Manm lo lot kote latib ti pou'n sezi pwen ki Onorab Loze pe fer, me eski i annan okenn lezot Manm lo lot kote latib ki'n fer mansyon sa size e zot in tret sa avek en nivo senserite lonnekte e tou larestan keksoz ki zot a pe sey rod dan sa Mosyon? Zot pa'n fer Mr Speaker.

Alors nou, nou konnen poudir ou en defi e nou ladministrasyon pe sey fer tou sa ki posib malgre sa pake lobstak ki nou pe rankontre, pou nou kapab anmenn ouswa avans en sosyete ki nou, nou oule vwar ki tou Seselwa pe prospere e pe avanse de lavan.

Zisteman i ti'n osi koz lo lozman; konmsi ti pe sey fer Seselwa rapel poudir se gras a sa ladministrasyon ki in donn lozman.

Non, zisteman Onorab Aglae a bokou repriz in dir *taxpayers money*, *taxpayers money* wi, ti atraver *taxpayers money* ki lozman in ganny konstrir, me selman nou tou nou konnen poudir ki lo

lafason alokasyon bann lakaz ti pe ganny fer dan lepase i pa ti pe met okenn lanfaz lo responsabilite personnel ki en aplikan ki dwatet annan.

Pa dan tou ka ti pe mars koumsa, ti plito eski ou siport nou parti wi ou non e alor si ou pa siport sa parti ou pa ti pou ganny lozman. Ozordi i pa mars koumsa. Wi, i annan lakaz abordab ki baze lo en *subsidized rate*, me selman i annan ne prosedir ki transparan kler e ki met lanfaz lo responsabilite personnel.

Wi, i en lenfrastriktir ouswa en fasilite ki zot, zot in etabli zis parey en kantite lezot lenfrastriktir ki zot in etabli atraver pei selman nou'n war poudir ki lo lafason ki zot ti pe zer sa striktir gouvrenans partou dan tou sa bann keksoz ki zot ti pe fer la, kantmenm ti annan serten lobzektif ki ti byen la, i ti'n annan koripsyon dan tou keksoz sa ki zot ti fer i ti'n annan koripsyon.

Later, eski i annan en Minis ozordi ki annan senkantenn morso later e sa i a pe mars dan lasosyete ozordi koman en lanz?

Anba nou ladministrasyon napa okenn Minis ki pe fer sa selman dan zot letan zot ti fer, zot parti politik in abiz zot pozisyon koman parti o pouvwar pou akimil sepa konbyen later kare

later lo zot lekor koman sa parti politik, e ozordi zot i fer tou sa ki posib pou sey vann pou zot kapab ranpli sa kof lavwa pou zot kapab itiliz sa larzan pou aste vot.

E i enportan ler nou pe koz lo lonnekte, senserite e lentegrite, ler nou pe koz lo partisipasyon eleksyon, i enportan pou voter osi realize poudir ki zot pa pou kapab valoriz zot vot pou en keksoz materyel kour term an retour. Valoriz sa vizyon ki sa dimoun ki pe debout dan sa eleksyon pe met devan avek Lepep Seselwa; valoriz son lobzektif ki li i annan pou ou koman sa elektora.

Annou pa bezwen retourn dan bann tandans lepase, annou realize poudir ki si i annan nide e bann ideoloji ki favoriz ou avek ou fanmir se plito sa kandida ki dwatet pe gannyen. E annou pa les avan kandida anbet nou ler zot pe vin fer bann promes tel ki pansyon, pansyon zot pou retournen me selman nou pe war *trend* global partou dan bann lezot pei dan larezyon e bann pwisans tel ki Lanmerik, Lanmerik pe fer li monte pou ariv 67 an.

Lanmerik pe fer li monte e mou bezwen konnen i annan bann rezon par dernyen aköz zot pe fer sa, zisteman parey dan ka *actuary* an relasyon avek Fon Pansyon nou ti'n war

en rapor nou ti war Prezidan Faure avek ansyen Minis Lousteau Lalanne ki ti'n vin devan poudir ki i pou bezwen ganny revwar en serten pwen.

Me selman anba sa ladministrasyon tou keksoz ti ganny fer a en serten pwen, me selman zot ti napa sa kouraz pou enplimant bann desizyon ki pa neseserman popilis.

Me selman desizyon ki dan lentere Lepep Seselwa i ti ganny fer anba nou ladministrasyon pou nou kapab asire ki nou Fon Pansyon i reste soutenab, nou Fon Pansyon pa *collapse*. E nou tou nou konnen poudir nou tou nou konnen poudir ozordi nou lafors travayer i annan serten defi.

E alors nou konnen poudir lo laspe vizavi kontribisyon i pa pe ariv lo sa nivo ki i dwatet pe arive. E nou konnen poudir nou fitir zenerasyon si i pa *step up*, e nou, nou pe met tou bann lenfrastruktir an plas pou asire ki nou fitir zenerasyon i *step up* pou asire ki nou pou kapab gard sa laz ki'n ganny revwar.

Be zisteman lo sa size ki la, ler nou pe koz lo bann fason ki nou dwatet pe regard nou fitir zenerasyon nou ladministrasyon in fer tou sa ki posib atraver sistenm ledikasyon an plas pou garanti ki zot annan en fitir.

Akoz lo lafason ki politik ti pe ganny fer atraver Lopozisyon ki a serten pwen ti parti o pouvwar an 2020, zot, zot ti fer Seselwa krwar konmkwa napa en lavenir anba nou ladministrasyon. Me nou ladministrasyon pe met tou loportinite aporte nou bann zenn pou asire ki zot, zot kapab avans de lavan.

E byensir in annan serten Manm ki'n koz lo serten lenfrastriktir ki zot Gouvernman in met an plas. Me nou war bokou lenstans kot in annan move planifikasyon ki'n fer ki se nou Gouvernman ki'n bezwen antre pou fer le lesansyel pou nou kapab mentenir lenfrastriktir pou kapab asire ki nou pep i kapab rezouir benefis ki sak sa bann lenfrastriktir ki nou, nou pe met an plas pou zot kapab avans de lavan Mr Speaker.

Zisteman, ler nou pe regard lensidan tel ki le 7 Desanm mwan mon rapel lafason ki mon koleg Onorab Monthy e menm sa *Caucus* lo sa kote latap in vin devan pou donn sa sipor pou nou kapab fer sir ki bann Kaskadyen enkli tou bann dimoun ki'n ganny afekte Bel Ombre, Beau Vallon, Glacis e bann lezot distrik dan rezyon nor, nou ladministrasyon in fer en travay merveye.

E ozordi ler ou pas Providence ou eksplik en touris poudir ti annan en tek lensidan tel ki en leksplozyon zot, zot pa pou oule krwar, aköz nou'n nobou kapab fer sir ki Sesel espesyalman sa porsyon kot in ganny afekte in ganny restore anba nou *watch*. Kot nou'n asire ki si i annan okenn nesosite pou fer okenn prosedir vizavi bann lasistans ki'n ganny etabli par nou ladministrasyon, ki larzan in ganny byen zere Mr Speaker.

Zisteman, ler nou pe koz lo travay ki pe ganny fer vizavi nou pep Mr Speaker, i enportan ki ler nou pe retourn lo sa size tel ki en eleksyon, nou bezwen azir dan en fason kot nou pa pe vin ver nou rival pou kapab denigre zot, pou kapab asasin zot karakter, atraver bann diferan mwayen kot oule eksprim ou santiman, fer li byen, eksprim ou *doit des expression* parey i dwatet ganny fer, selman fer li dan en fason responsab.

Wi, an 2025 nou pe antre dan en prosesis elektoral e i enportan ki nou demontre en nivo matirite pou nou kapab asire ki Lepep Seselwa zot pou kapab pran par dan sa prosesis elektoral kot mon'n war en kantite dimoun en sel kou zot pe vin eksprim lentere pou anmenn Sesel de lavan.

Selman Lepep Seselwa i konn nou listwar tre byen e zot konnen poudir zot bezwen regard o profon vizavi azanda sak sa bann endividi ki pe vin devan ki oule promot en meyer Sesel. Eski se pa lot ki *LDS* ki pe fer li a sa moman aktyel? Eski nou pa'n tir nou pei ki ti lo son zenou atraver *COVID*, atraver sityasyon ekonomik ki vreman dir, difisil e nou'n nobou kapab fer sir ki nou'n retourn *back to normal*.

E ozordi in annan en Onorab ki'n poz kestyon lo stabilite e ki in dir konmkwa napa sekirite, napa stabilite, be ozordi ki mannyer eski in ariv travay e in nobou kapab prezant son diskour. Eski ler le moman ki nou'n komans ou zournen ou pa'n byen pase pou ou kapab ariv kot ou'n arive?

Eski travay vizavi pei ler nou pe koze vizavi pei an zeneral pou nou kapab asire ki i annan stabilite; ler nou pe regard la rezyon nou, ler nou'n arive nou'n vin dan gouvrenans bokou lager in arive otour nou. Enstabilite zeopolitik in annan bokou enstabilite zeopolitik otour Sesel, me selman Sesel kantmenm sa atraver bann bon desizyon ki'n ganny pran nou pe kit nou pei *on the right track*.

Ozordi Moris dimoun ler zot vwayaze zot kapab fer

bann konparezon, zot konnen poudir mannyer sityasyon ekonomik i ete Moris. E se pour sa rezon menm premye Minis Morisyen in fer referans avek Sesel koman en legzanp. E ozordi parey Onorab Romain in fer resorti tou bann lorganizasyon enternasyonal pe regard Sesel avek bann remark ki pozitiv.

Akoz nou nou'n fer en travay ekstraordiner. Wi, nou'n fer en travay ekstraordiner. Wi, i annan bokou defi ki nou, nou bezwen adrese e rezourd, me selman dan sa 4an edmi nou pa'n mal debourye avek sa kantite defi ki nou, nou'n erite. Tou nou bann distrik respektif nou'n montre poudir bann Onorab ozordi dan an Gouvrenman elekte atraver *LDS* i diferan avek bann ki ti la dan lepase.

Nou konnen ki mannyer bann *MNAs* dan lepase zot ti baz zot pozisyon, zot ti fer faver dalon avek zanmen ki e ler dimoun pe vin devan pe rod en lasistans, zot pa ti pe resevwar en lasistans. Ozordi atraver Sesel Pour Tou Son Zanafan, Nou prop siporter i kestyon nou lo sa slogan, lo prensip ideoloji, me ozordi en bon pe zot in nobou kapab rekonnet e apresye kantmenm i annan serten ki eksprim zot fristrasyon vizavi servis Gouvrenman ki zot oule ki avans bokou pli byen me

selman zot rekonnet poudir nou, nou pe reste atase avek nou prensip.

E tou bann lezot keksoz ki nou ladministrasyon pe bouz de lavan, se bann keksoz ki Onorab Ramkalawan in koz dan sa Lasanble e se lo ki ozordi koman Prezidan Larepiblik, en zonm ki'n dedye son labi en 30 ekek lannen e Bondye ki'n fer li vin nou Prezidan avek sa nivo leksperyans, lekspertiz e lasazes pou diriz Sesel.

En si ozordi nou annan *LGB* Onorab Bernard Georges, apre tou sa letan ki in lite pou li ariv dan sa sez, mwan mon tir mon sapo e mon rekonnet zefor tou bann diferan dimoun, bann akter ki'n fer zot bout pou nou anmenn nou parti kot i ete ozordi. E nou, nou pe dir otan ki nou travay dir kot i annan sa prensip lonnekte, senserite e lentegrite personn pa pou bar sa parti ki apel *LDS*.

Akoz nou ki pe prezant bann pli meyer nide, nou ki pe diriz Sesel a ler aktyel. Zot, zot a pe viv dan bann filozofi Albert Rene, bann filozofi lepase e nou pa pou kapab retourn an aryer, nou bezwen kontinyen avek *LDS*, aköz *LDS* i sel opsyon pou Sesel. Mersi Mr Speaker.

MR DEPUTY SPEAKER

Mersi Onorab. I 3er35, i reste nou selman 2 entervenans lo lalis avek *right of reply*. E si ban Manm pe koz 15 minit ki nou fe nou *break* nou retournen 4 er ouswa nou fer en sel ale nou fini? *Whip*, zot *Whip* pa la? Nou ale zot *ok*, nou fini *ok* so mon ava donn laparol Onorab Arissol.

HON SANDY ARISSOL

Mersi Mr Speaker. Bonn apre midi tou dimoun ki a lekout. Mr Speaker, mon ti a kontan komanse par felisit ou menm ou *as* Speaker aköz yer nou pa'n vwar ou e ozordi nou r ou la, *welcome back* kontrè.

(APPLAUSE)

HON SANDY ARISSOL

Parske letan nou pe koz patrimwann ou osi ou en laspe nou patrimwann koman en Speaker, ki nou, nou'n elekte nou'n met la zisteman pou fer sa travay.

Akoz mon rapel ti annan en komanter poudir si ler ou vin la anler lot kote pa pou war personn, be mon kontan dan sa laspe senserite ki nou pe koz lo la, ou la anler e *US* pe fer zot travay parey nou, nou pe fer pour nou.

Mon ti a kontan osi felisit Onorab Tamboo, parske in deklare poudir in fini ganny eleksyon Cascade e mon ti a kontan dir li felisitasyon pour

koman nouvo Manm Elekte pou distrik Cascade pou sa travay ki'n in fer. E nou swet li tou debon dan son letan ki i fer son travay laba Cascade dan son manda. Felisitasyon pou son manda ki in gannnen san ki'n in ganny en vot.

Mr Speaker, mon anvi dir avek Onorab Aglae mon kontan ki i admet poudir zot pa'n vot tou, me zot in vol zis en pe e zot in kit en pe pou Lepep Seselwa. E sa i bezwen al dan rikord parske nou pe koz senserite, lonnekte, patrimwann, protez e sofgard.

Me omwen li, parey i ti fer dernyen fwa an relasyon avek koudeta i ti admet en keksoz e la mon kontan in admet poudir zot pa'n vol tou, me omwen zot in kit en pe pou Lepep Seselwa.

Me Onorab Aglae i vini i dir ek nou toultan nou koz lo 43an zanmen nou bouz de lavan. Me sa ki Onorab Aglae pa dir nou, se zot, zot vini koman US zot movi avek per fondater ki ti la pou 43an, ler zot fer sa zot, zot bliye zot ki anmenn nou dan 43 an, prezan ler nou, nou vini nou reponn zot ofanse, pa koz lo 43an dir nou ki pe arive la, dir nou ki nou pe fer.

Selman ou tann bann Onorab Uranie i vini i koz lo lesklavaz, lesklavaz depi 1835 in aboli dan lemonn. Ozordi tou dimoun pe viv byen,

Onorab Uranie i vini i koz lo lesklavaz selman zot dir ek nou pa al dan lepase Mr Speaker.

Me sa ki enteresan Mosyon Onorab Loze, en Manm ki nou'n ganny dir par Onorab Aglae nou pa kontan li, nou kontan Onorab Loze nou.

Onorab Loze parey i deklar son lekor toultan i deklar son lekor i en chez touni, i deklar son lekor koman en gro mazanbik epe, i deklar son lekor koman- li dan Lasanble ki dir sa Mr Speaker, i dan *verbatim* sa - li ki dir, i deklar son lekor konmkwa son bann zannfan bann milyonner.

So, nou, nou kontan Onorab Loze koman sa Seselwa, koman sa Manm Proporsyonnel US ki vin fer son travay dan Lasanble Nasyonal, napa okenn landrwa ki'n ekrir nou pa kontan Onorab Loze, sa ki Onorab Aglae in dir sa i en keksoz ki pa egziste.

Me sa ki Onorab Aglae pa'n dir ek nou i annan sa madanm Port Glaud la, mon'n bliy son non ek son sinyatir la, konsernan nou later patrimwann ki in koz lo la, i pa'n koz lo la ditou sa, sa zafer '*prox*' la Port Glaud la, i pa'n koz lo la ditou an relasyon avek nou patrimwann ki Mosyon pe demande.

Mosyon i lir; - “Lasanble Nasyonal Sesel, pe demande ki Gouvernman aktyel, ensi ki tou lezot Gouvernman dan le fitir, i travay avek lonnekte, senserite e lentegrite pou sofgard e protez patrimwann Sesel dan son antyerte pour benefis nou bann fitir zenerasyon”.

Onorab loter Mosyon Onorab Loze in koz lo leritaz pozitiv, in koz lo leritaz negativ, Onorab Loze in koz lo leritaz lepase, in koz lo mers, labitid, manni enkilke dan nou pep. Mr Speaker, alor letan nou koz lo leritaz lepase, se sa ki mon bann Manm in fer ki zot in al en pe dan lepase, parske letan nou pe koz leritaz in- zot in osi anglob leritaz lepase.

Me kisisa ki dimoun i krwar i apel patrimwann? Eski patrimwann i nou pei? Laspe nou patrimwann i kwa? Nou kiltir, nou resanz, nou manze, nou later, nou zil, montanny, nou bann lans, semen nou bann moniman ki nou annan e lafason ki nou viv. Eski tousala i konpri nou patrimwann ki Mosyon pe demann nou pou sofgarde?

Be Mr Speaker, an vi ki zot pa kontan nou la 43 an pase, mon anvi nou fer en pti parkour 2020 ziska la. Zot a rapel poudir nou as LDS koman e Gouvernman ki ti ganny elekte, pa en

Gouvernman ki ti met bonm dan sak vakwa, pa en Gouvernman ki'n fer koudeta, apre nou ti al lo radyo Sesel di poudir en group dimoun in fer koudeta e Lepep Seselwa i anvi ki nou ki vin o pouvwar, non.

Nou'n esper tou sa lannen preski 35 an e nou'n fer li atraver bwat vote e Lepep Seselwa dan tou son gran mazorite i met nou la.

E tou bann ki'n met nou la zot swiv nou, zot get ki nou pe fer e mon anvi rasir tou bann ki'n siport nou e tou ban ki kontinyen swiv nou poudir le 28 Septanm 2025 se nou isi lo sa kote latab ki pou dan Lasanble Nasyonal an gran mazorite pou Lepep Seselwa.

E sa i kler sa, parske parey nou'n ganny dir dan bann *blitz* kot zot ale, ozordi mesaz in sanze, mesaz in sanze, zot mesaz se vot pou nou parske nou anvi vin fer pli byen, nou anvi vin koriz nou fot ki nou'n fer. Ki fot ki zot in fer? Zot pa kontan nou koz lo la dan Lasanble Nasyonal.

Akoz nou pou retourn dan 43 an pase, me zot devret mazine i annan en gro liv ki apel Rapor *TRNUC* ki koz lo tou bann atosite ki sa menm group dimoun ki vin pe demann pardon devan lakour bann dimoun pou bann dimoun re vot pou zot.

Me ki mwan mon anvi Mr Speaker, atraver sa Mosyon?

Ki mon ti a swete se protez mon pei? 2020 ler nou ti pran pei Mr Speaker, zot a rapel; nou ti dan *COVID*, *COVID*, dan nou 5an nou, 2an nou'n travay zis pou nou re stabiliz nou pei kont *COVID*. Ki nou'n fer Mr Speaker, 2 an? Re stabilite ekonomik dan nou pei.

Par reouver nou *airport*, asire ki tou bann biznes i retourn lo zot lipye, re ganny larzan, siport bann biznes ki pa ti pe fer byen ekonomikman. Dezyenmman ki nou'n fer?

Pandan sa 2 an sa, dan nou manda 5an sa, stabiliz nou bann popilasyon par vaksin- rod vaksen pou nou popilasyon, fer sir ki maksimonm dimoun i antre dan travay, dekouraz bann dimoun pou zot kale me kontribye anver nou pei; kontinyen asir nou bann dimoun aze ki tou zot benefis i la e nou'n donn zot en logmantasyon lo la.

Asir tou lasistans sosyal e *welfare* pour ki nou bann dimoun pli feb i kontinyen ganny asiste menm resours ti limite e pei ti pe fer fas avek enstabilite e en pandemik enternasyonal Mr Speaker.

Mwan mon krwar dan stabilite e progre. Se pour sa rezon mon siport mon Gouvernman depi 2020, pour ki tou sa in ganny fer avek

mwens resours dan en pti gin letan. Prezan annou get sa lot 2an, pou fer nou 4an, ki nou Gouvernman in fer, ler nou'n stabiliz pei, nou patrimwann, nou dimoun ki form parti sa patrimwann pou nou kontinyen viv dan nou pei.

Nou'n kontinyen sa lot 2an, nou'n kontinyen avek bann Proze Nasyonal, prepar bann keksoz sa bann gro *building* ki Onorab Aglae in *remind* nou se son Gouvernman ki ti fer atraver nou larzan *taxpayers money* ki zot in les pouri, les tonm an rin se nou ki'n vin repare pandan sa lespas 2an.

Nou ki'n kontiny bann 24/24 i ti'n kole 24/24 dan 24 pou 24, nou ki'n kontinyen fer avek sa pti gin larzan ki nou ti annan.

E pa bliye Mr Speaker, se *US* ki ti dir ek nou arete fer bann proze dan distrik, koup tou, nou ti dir non, avek ti resours ki nou ti annan, sa pti resours pou nou patrimwann annou sey partaz li, lo nivo nasyonal osi dan bann distrik.

Nou'n asire ki nou bann zenn Mr Speaker, ki form parti nou patrimwann, nou kiltir pou zot kontiny sa travay ki nou pe fer zot kontinyen ganny zot labours pou al aletranze. Nou'n fer sir nou'n kontinyen valoriz bann proze dan distrik, nou'n fer sir nou'n kontinyen

mentenir nou bann dimoun aze avek zot benefis.

Nou'n fer sir nou'n kontinyen donn nou bann zanfan dan lekol en goute, en *breakfast* pou naryen, nou'n asire ki nou'n revwar sa pti gin ki nou'n gannyen pandan 2an redistribye li avek atraver 10 poursan, 7poursan logmantasyon.

Nou'n asire ki personn pa ganny kit deryer me sa ki enportan Mr Speaker, pou sa ki pe ekout nou deor, dan sa patrimwann nou leritaz, nou mers, nou labitid ki Mosyon in koz lo la se ki ozordi tou zenn zot in ganny kite dan zot lanplwa. Zot lanplwa in stab e zot annan sekirite dan zot lanplwa.

Koman sa lot Gouvernman ki'n vini, nou pa'n pous personn dan zot lanplwa, sa ki'n anvi ale zot i ale. Ozordi sa zenn ki pe kout nou Mr Speaker, i konnen poudir anba *LDS* son louvraz i garanti aköz i kapab rod en *loan* in aste en pti transpor ki nou'n tann koz lo la Perseverance, in nobou kapab *apply* en *condominium*.

Savedir nou pe koz stabilite ek progre anba *LDS*. Sa ki mwan mon anvi pou patrimwann pou leritaz, pou sekirite, senserite, se sa senserite ki mwan mon krwar ladan.

Letan en Gouvernman i vini i pa viktimiz personn, ler en Gouvernman i vini i fer sir i gard tou patrimwann napa en zil ki ganny vann, napa en latet montanny ki'n ganny vann, napa en morso later ki ganny fer kado, nou pa vann *passport* avek etranze, se sa ki mwan mon krwar ladan stabilite e progre.

Me par kont, sa ki malonnet, se ki letan ou annan en group dimoun i e pe koz lo lonnekte, senserite, lentegrite parey Onorab Loizeau in dir, i an en group zot ki refize deklar zot *assets*, eski sa i lonnekte?

Letan sa menm group dimoun zot, zot in kapab ganny 40 morso later lo zot non, eski lo apel senserite? Letan zot monte zot dir si ou sey al kot nou program ou pou ganny vwar dan en rigol anba en pon. Eski sa i apel sofgard nou leritaz? Eski i apel sofgard nou patrimwann?

Eski mon ti a kontan ankor dan 5An, parey Mosyon pe dir lezot Gouvernman dan le fitir, eski mon ti a kontan en lot Gouvernman dan le fitir ler mon leve en zour bomaten mon war mon garson dan en rigol anba en pon, aköz i pa'n kontan sa parti?

Eski sa ki mon anvi pou mon pei Mr Speaker? Eski sa ki bann zenn deor ozordi zot anvi ou zot lavenir? Eski sa

manman ek sa papa, sa trwazyenm az ki pe ekout nou la apre midi se sa ki zot anvi pou sa prosen 5an, se ki se sa ki zot anvi pou sa prosen 10an? Kot nou retourn ankor dan sa menm lefase ki *US* pa kontan nou koz lo la.

Eski nou anvi enn nou zanfan i ganny vwar dan en rigol zis aköz son lopinyon politik Mr Speaker? Mon pa oule sa mwan. Sa ki mwan mon kont e sa ki mwan mon kontinyen protez mon leritaz, parske mwan mon krwar dan stabilite e progresse nou pei.

Letan sa menm group dimoun Mr Speaker, ki monte ki koz lo lentegrite, protez, lonnekte ek senserite, zot koman en group dimoun zot refize demann pardon Lepep Seselwa. Eski i apel lonnekte? Eski i apel senserite?

Me par kont, dan zot konvansyon ki nou vwar zot fer? Leve e aplodi per fondater, me per fondater ozordi nou tou nou konnen i annan en gro liv kont li, me sa menm group dimoun zot ki'n deklar zot lekör koman fek ne, zot anvi refer, zot anvi fer keksoz nouvo, e koriz zot fot Mr Speaker.

Se pour sa rezon sa Mosyon pa fer sans, parske sa pti group dimoun ki'n anmenn sa Mosyon zot menm zot pa pe onör bann mo ki zot in dir dan zot Mosyon.

Lonnekte, senserite, lentegrite, sofgard, protez nou patrimwann Sesel Mr Speaker, pou fitir zenerasyon. Mwan sa ki mon anvi pou fitir zenerasyon mon pei se en pei stab kot i annan progresse, kot personn pa ganny menase pou son lopinyon politik, kot nou tou nou a kapab sipört nou parti politik, annan nou relizyon e pou nou kapab sipört nou tim foutbol.

Me Lendi nou tou nou kapab travay dan menm latmosfer, en pti pe parey, parey *beach soccer* in anmenn nou dan nou pei. Se sa ki mwan mon krwar dan leritaz, se sa ki mwan mon krwar dan patrimwann, ler en pti pei parey nou, nou viv byen dan lape, stabilite e nou anmenn progresse pou nou pei.

Mr Speaker, se pour sa rezonn sa Mosyon pa fer sans ozordi parske tousala pe arive dan nou pei konpare avek sa Gouvernman ki ti la ki nou pa ganny drwa koz lo la aköz zot ofanse.

Se pour sa ozordi deor, tou latmosfer se kit li lanmenm e *no turning back* parske dimoun pa oule nou retourn ankor dan sa bann mers parey nou'n ganny dir bann labitid, bann manni touy dimoun, disparisyon, viktimiz ou, entimid ou e fer ou disparet.

Nou pa oule ankor sa e mwan mon pa oule ankor sa, se pour sa rezon Mr Speaker, sa Mosyon pa fer sans parske loter Mosyon ek sa group dimoun ki'n anmenn sa Mosyon zot napa tou sa bann ki zot i dir nou la, sa bann mo, mwan sa ki mon anvi se stabilite e progres pou mon pei.

Alor, mon pe demann tou dimoun i pe ekout nou pou zot gete sa ki pe arive dan zot pei ozordi swiv, analize, balanse, akòz poudir *US* pa kapab retoun o pouvwar ankor dan nou pei. Menm Onorab Audrey in vin fer son *PPB*, Onorab Audrey pa pou war ankor Roche Caiman Mr Speaker, sa i kler sa, i kler. E tou bann Manm *US* zot konn byen parske sa ki zot pe ganny dir laba deor.

Me par kont, lo non La Digue, mon ti a kontan mwan remersi, e mon osi mon annan zanmi e fanmir ki reste La Digue sa, mon ti a kontan remersye Gouvernman pou nou bann zeritye laba La Digue, leritaz nou bann mers labitid, lonnekte, senserite remersi nou Gouvernman pou ozordi dan en pei nou Gouvernman in asire ki 5 dimoun pe ganny en servis dyaliz.

Ou konnen ki en etranze i dir ek nou? Napa en landrwa dan lemonn ki pou fer sa, akòz zot pou vwar li pa rantab, pa

fezab e kout en kantite. Me nou Gouvernman pa'n mazin sa li Mr Speaker, in mazin sa 5 dimoun ki bezwen zot lasante La Digue. Menm ti annan en petisyon par zot Onorab Rocky Uranie pou sa lopital pa ganny fer.

E sa ozordi i pa form parti senserite sa Mr Speaker; i pa form parti fitir zenerasyon sa, ki mannyer ou blok en lopital, selman ou pe koz fitir zenerasyon? kote ou fitir zenerasyon i ale si i annan en problem lasante?

Mr Speaker, Mosyon pa kapab *stand*, parske sa bann dimoun pa pe onor sa ki zot in dir e letan nou fer referans avek bann keksoz ki'n pase, nou vwar poudir zot menm zot, zot pa serye. Mwan mon annan en lapel avek tou bann dimoun ki pe ekout nou ozordi Sesel nou stab, nou annan progres pei i lo bon semen nou'n asire ki tou dimoun sakenn dan son kous nou'n ede mannyer nou kapab ek sa pti git ki nou ti annan e nou'n fer li dan en peryod 2 an.

Akòz 2 an nou ti pe lager ek *COVID* i fer nou 4 an, e la nou'n ariv 4 an edmi e 2025 Mr Speaker, le 27 Septanm *LDS* nou pou fini fer sa lot bout sa se fini avek *US* enn fwa pour tou *then* nou a koz lo 43 an pase pou nou al bokou pli byen e fer bokou meyer.

Leokri deor se, *no turning back* e kit li lanmenm. Mr Speaker, mersi bokou pou donn mwan sa pti bout pou mwan koze. Mersi.

MR DEPUTY SPEAKER

Mersi Onorab. Dernyen entervenman ki lo lalis avan ki pou annan *right of reply* sa i *Leader of Government Business*, Onorab Georges.

HON BERNARD GEORGES

Mersi bokou Mr Speaker, bonn apre midi Mr Speaker, bonn apre midi tou bann Manm Onorab. Mersi pou donn mwan en loportinite pou koz lo sa Mosyon.

Mr Speaker, ler nou regard sa Mosyon i en tre bon Mosyon mon pa krwar ki sa Mosyon mannyer in ganny ekrir okenn dimoun i kapab annan okenn problemm avek, aköz i pe apel nou atraver en seri demann protez patrimwann Sesel dan son antyerte pou benefis nou bann fitir zenerasyon.

Napa en dimoun ki kapab dir ki sa Mosyon tel parey in ganny elabore dan- lo *Order Paper* i annan en problemm avek. Mon krwar tou dimoun ki senser, tou dimoun ki onnet i a bezwen aksepte ki sa set en swe ki parfetman normal e ki nou tou nou devret siporte.

E donk Mr Speaker, mon bezwen dir o komansman ki sa Mosyon i en Mosyon ki parfetman valab dan son lafason ki'n i ganny ekrir. I en Mosyon ki bon Mr Speaker, aköz nou teritwar ki se nou teritwar tanzib ou entanzib nou patrimwann tanzib oubyen entanzib i bezwen ganny proteze.

E i bezwen ganny proteze, non selman par Gouvernman ki sa Mosyon pe demande me par sak sitwayen Sesel aköz parey Lartik 40 nou Konstitisyon i fer nou konpran i devwar sakenn parmi nou pou protez nou patrimwann pou bann fitir zenerasyon ki pe vini.

E parey mon'n dir nou patrimwann i swa tanzib e sa se nou teritwar nou bann rezerv, pwason, banbara, nou bann zannimo kokodmer tou bann keksoz koumsa torti, nou lidantite koman en pep Seselwa ki annan en *passport* for, nou bann raspay ki kapab demen parey saponer *Madagascar* in en sours latizann pou *leukemia*, nou osi nou kapab annan en eksetera, eksetera.

E pou nou patrimwann entanzib, nou lanmizik nou manze, nou ladans, lefet ki Sesel i limero 1 dan plizyer domenn dan lemonn. Alor nou annan en patrimwann tanzib ki nou kapab perdi, aköz nou

vann li e nou annan en patrimwann entanzib ki nou kapab perdi akòz nou pa sofgard li.

Donk, okenn Mosyon ki demann proteksyon sa bann keksoz se en Mosyon ki merit nou sipor. Me malerezman Mr Speaker, malerezman nou'n vwar ki swa, swa sa ki pe koze pa'n konpran sa Mosyon oubyen sa ki'n anmenn sa Mosyon pa ti senser.

Mr Speaker, annou regard byen, swa Onorab Loze in anmenn sa Mosyon avek senserite e an bonn fwa e si in fer sa mon salye li, me son bann lezot koleg ki'n koz apre li in deside zet li anba bis. E sa zot pa'n fer en bon keksoz anver Onorab Loze.

Swa Onorab Loze pa'n anmenn sa Mosyon an bonn fwa avek senserite e in anmenn en Mosyon loulou anba lapo mouton, e dan sa ka Onorab Loze pa pe senser avek nou Lasanble.

I bezwen enn ant sa 2 keksoz Mr Speaker, akòz nou, nou'n prepar nou lekò pou vin koz lo en Mosyon patrimwann pou sipòrt en demann a pou protez nou patrimwann. Me se pa sa ki nou'n tande atraver nou bann Manm lo lot kote latab ki pran laparol.

Annefe, annefe segonder Mosyon pa'n tous sa Mosyon ditou, Onorab Vidot, Onorab

Vidot pa'n tous sa Mosyon ditou, ditou, ditou in fer mwan rapel en keksoz ki mon fyer ki mon deza rapòrt eleksyon par 4 vot e sa ti bann eleksyon pase, dernyen fwa non rapòrt li par 350 vot Mr Speaker, e la le 27 Septanm senkyenm manda Bernard Georges pe retourn dan Lasanble sa nou tou nou konnen.

(APPLAUSE)

HON BERNARD GEORGES

Donk Mr Speaker, akòz ki zot in swa *hijack* Mosyon Onorab Loze ki ti anvi koz lo proteksyon e prezerv nou patrimwann, akfer zot in fer sa? Oubyen akfer ki Onorab Loze in anmenn en Mosyon pou swadizan koz lo patrimwann e les son Mosyon ganny *hijack* Par son prop dimoun pou koz lo eleksyon, pou koz lo lafason ki zot pou ganny eleksyon pou koz lo lefe ki nou'n koz lo 43 an.

Akfer ki zot in anmenn politik dan en Mosyon ki napa naryen pou fer avek politik?

Alor nou bezwen demann sa keksyon Mr Speaker, e mwan mon annan en repons tre kler mwan, an mezir ki mon'n ekout zansla, an mezir ki mon ekout nou bann koleg Onorab lo lot kote latab, mon'n ariv a en sel realizasyon Mr Speaker, se ki zot in fini

war sa ki nou ti pe dir zot depi en pe letan. Zot in fini war ki defet pe vini le 27 Septanm e zot pa konnen ki pou fer.

E sel keksoz, e ankor enn fwa mon bezwen retourn lo segonder Mosyon tou sa ki in fer se gele akoz ki Roche Caiman i ki'n travay e li ki bezwen retourn dan Lasanble e sa napa naryen pou fer avek nou patrimwann Mr Speaker, napa naryen pou fer avek sa Mosyon, akoz ki zot in *hijack* Mosyon Onorab Loze e fer li vin en Mosyon politik?

E donk Mr Speaker, lefe ki zot, zot in fer li nou osi nou bezwen fer zot rapel serten fe. E lo nou kote latap nou'n fer egzakteman sa ozordi. Mr Speaker, nou pa kapab, nou pa kapab aksepte ki en parti politik ki in li menm li enn bann pli gro *culprit*, pou pa prezerv nou patrimwann, parey sa dimoun ki'n koz avan mwan in dir i vini ozordi i demann nou prezerv e protez nou patrimwann.

Ki mannyer nou kapab pran lesan Mr Speaker, avek sa menm Gouvernman ki li in les bann morso *Ile des Desroches* ganny vann avek milyonner pou zot fer *villa* laba? Ki mannyer nou kapab pran lesan avek sanmenm sa Gouvernman ki'n donn en *passport* Mr Shiva parey i ganny dir, ki li ozordi in vin pli

gro propriyeter endividyel Sesel?

E mwan mon kontan ler mon tann Onorab Uranie pe dir tre for, e mon ava sit li; - “mon pa kapab aksepte ki nou vann nou zil”. Mr Speaker, i annan 300 arpan lo zil Onorab Uranie ki enkli en bout Grand Anse, tou Petite Anse e tou lans Koko 300 arpan ki'n ganny vann zis avek Shiva ki pa'n fer naryen avek.

(comments off-mic)

HON BERNARD GEORGES

Ki mannyer zot kapab vin la pli gro propriyete ki i annan laba, pli gro ki *L'Union*, ki mannyer nou kapab annan en Manm vini dir mon “i pa kapab aksepte ki nou zil i ganny vann” ler anba son lanmen zil in ganny vann e o bor li bann zil satelit, bann zil satelit La Digue, Marianne pour ki? Marianne in ganny vann avek etranze, Pti Ser, Gran Ser.

Ki mannyer en dimoun Mr Speaker, mon pa'n arive konpran zot- apre in vin dir nou bannann ek lapo bannann. Be zot- ki mannyer ou kapab asiz La Digue e reflesir en fraz koumsa, san regard otour ou e war sa ki'n arive anba ou Gouvernman ki ou pe siporte ozordi e ou pe kriy tre for Mr Rene eksetera per fondater?

Be per fondater ki'n fer tousala, li ki'n komanse, e les mon dir enn nou bann pli gro keksoz ek patrimwann, enn bann pli keksoz pli for lo nou patrimwann lidantite Lepep seselwa, lannen prosen nou pou selebre 50 an lendepandans.

Lidantite nou pep 11 mwan apre ki'n nou ti pe sey konstrir en lidantite en pep endepandan, en zonm in deside ki i pou kas tousala i pou pran aköz i swaf pouvwar i pou pran pouvwar e li selon li i pou vin reform sa pep a son limaz.

Mr France Albert Rene zot per fondater. Sa Mr Speaker, nou napa patrimwann, nou patrimwann pli enportan zot pa'n les nou fer, zot in vini zot in dikte ki mannyer nou pou fer e apre zot in bezwen rann labar. Me *still* pandan 43 an zot in sey manipil sa pep Seselwa ozordi zot vin koz lo patrimwann? *Come on* Mr Speaker, annou onnet.

Four Seasons lekel ki'n donn later Arab pou vin fer Lotel *Four Seasons*? Nou oubyen zot? Cousine lekel ki'n vann Cousine avek etranze nou oubyen zot? Desroches ek St Joseph lekel ki'n vann Desroches ek St Joseph, nou oubyen zot?

Grand Police, Intendance, *Canopy* lekel ki'n

vann, nou oubyen zot? *Passport* lekel ki'n vann nou oubyen zot? *Espace* lekel ki'n vann nou oubyen zot? Port Launay, Port Glaud pou *Ephelia* lekel ki'n vann nou oubyen zot?

Mahe Beach lekel ki'n vann? E i pe asize la pa pe fer naryen nou oubyen zot? Patrimwann? Be Mr Speaker, annou pa bliye *Maison du Peuple*, *Maison du Peuple* patrimwann Lepep Seselwa son non i dir ou lekel ki'n pran zot ki'n pran, apre zot vin koz Lo patrimwann. Anou prezerv nou patrimwann. Mr Speaker, annou serye, annou serye dan sa pei e annou dir keksoz egzakteman mannyer zot ete.

E les mwan alor Mr Speaker, ozordi dir avek mon bann zanmi dan Lopoziyon e avek loter Mosyon, ou war, an mezir ki zot, zot pe koz politik lo patrimwann, an mezir ki zot, zot pran en Mosyon ki'n son konsepsyon set en bon konsepsyon e zot vir li zot fer li vin en Mosyon politik.

E mon ekspekte ki loter Mosyon ler i ava pran laparol apre mwan i ava dir i regrete ki son bann Manm in pran sa lapant aköz sete pa sa son lentansyon li i ti'n vin la avek en bon lentansyon e son bann Manm in pran son Mosyon in *hijack* in fer politik avek.

Me pandan letan ki zot, zot pe fer politik, ou konnen ki

nou, nou pe fer nou Mr Speaker? Zot konnen ki nou, nou pe fer ozordi pandan ki zot pe koz politik?

Mon a dir zot sa ki nou fer, premyerman e mon pa anvi koz lob Assomption pou bann rezon ki zot konnen, *SIF* pe siny en *MOU* avek sa devloper Lasonpsyon pa akòz nou kontan sa lotel, me akòz nou anvi prezerv Aldabra obor e nou bezwen fer sir ki sa ki arive kapab i protez nou teritwar.

(APPLAUSE)

HON BERNARD GEORGES

E an pasan mon a fer zot rapel ki Onorab Gill, mon konnen toultan ou koz lo *SIF* pa pe donn ase keksoz ki Praslin sa nou ava debat en lot zour.

Me *SIF* Mr Speaker, *SIF* in ganny fonde an 1979 avek en sel bi se ki ler Angle, ler *Royal Society* in rann Sesel Aldabra, Sesel ti napa larzan pou kontinyen *manage* e okip Aldabra dan en fason syantifik. E se pour sa rezon ki zot Gouvernman in deside nou ava pran Aldabra nou ava met avek Valee de Mai akòz Valee de Mai i fer larzan, e sa larzan ava kapab servi pou fer sa ki bann angle ti pe fer Aldabra.

Se zot ki ti fer sa, pa vin dir nou ozordi ki konmsi sa set en keksoz ki nou, nou fek fer e ki nou, pe pran tou larzan e

nou pe depans li dan en landrwa kot nou pa devret.

Alor premye keksoz Mr Speaker, *MOU SIF* pe sinyen. Dezyenm keksoz bomaten an mezir ki nou, nou pe la pe koze anler dan *Cabinet*, bann manm *SIF* ti pe anmenn en Lalwa pou reform Lalwa *SIF* pou fer sir ki i annan plis ledan, plis morde pour ki nou a kapab pli byen *manage* nou patrimwann.

(APPLAUSE)

HON BERNARD GEORGES

Ozordi menm e *Cabinet* in aprouv sa, e trwazyenm keksoz letan zot, zot pe koz politik lo patrimwann, ou konnen ki nou pe fer Mr Speaker? Ler ou'n war mon sorti la en pti kou ou konnen ki mon'n al fer?

I annan parey mon ti fer zot konpran lannen pase-semenn pase mon'n donn zot mon'n eksplik zot ki pe arive ek patrimwann nou pep, mon'n donn zot sa laliny an ekspektan ki zot ava reste lo patrimwann pa al dan politik.

E an mezir ki zot fek fer sa e la letan Onorab Sandy Arissol ti pe koze, mwan mon'n sorti akòz nou'n met en *consortium* ansanm e ozordi mon a kapab dir avek gran plezir Mr Speaker, ki nou'n kapab aste en seri mil *post card* e plis ki 300 portre datan

depi 1865 pour patrimwann
Sesel pou fer li retourn isi
Sesel.

(APPLAUSE)

HON BERNARD GEORGES

Se sa ki sa zonm ki ti ganny en
fwa mon ti ganny elekte
Mamelles avek 4 vot ti pe fer
an mezir ki zot, zot pe fer
politik isi. Alor Mr Speaker,
annou an konklizyon zot koze
zot, nou Mr Speaker, parey
nou'n dir sa Gouvernman *LDS*
an mezir ki zot, zot pe koze
nou, nou travay.

Alor mon bann zanmi les
mwan les zot avek en dernyen
swe. *Walk the talk* silvouple. Si
zot anvi, si zot anvi montre ki
zot senser lo sa Mosyon, pou
prezerv nou patrimwann, i
annan en keksoz zot devret fer
e mon envit Onorab Loze fer sa
an mezir ki pe koze dir avek sa
pep Seselwa mon'n anmenn sa
Mosyon pou demann avek
Gouvernman prezerv nou
patrimwann nou pou *walk the
talk*.

E premye keksoz nou
pou fer nou an tout senserite
US nou pou dir avek Lepep
Seselwa nou pe vin rann zot
Maison du Peuple aköz i apel
pou zot i zot patrimwann.

(APPLAUSE)

HON BERNARD GEORGES

Fer sa Onorab Loze si ou
kapab fer sa taler ler ou
reponn mon pa kapab aköz
pou bann lezot Manm Onorab
mwan mon ava vot an faver ou
Mosyon. Mersi bokou Mr
Speaker.

MR DEPUTY SPEAKER

Mersi. Onorab Georges ki ti
dernyen enterven an ki ti'n
endike bomaten i oule pran
laparol lo sa Mosyon avan ki
nou ti ferm lalis. E donk ler
ki'n arive aprezan se ler pou
drwa de repons, mon a donn
laparol loter Mosyon Onorab
Loze.

HON JOHAN LOZE

Mersi Mr Speaker. Mr
Speaker, ou avek mwan nou 2
dimoun ki'n samay en bon pe
dan sa Lasanble dan lepase.

E i annan en fwa mon
rapel mon ti dir koumsa ofet
TRNUC ki ti dan Lasanble mon
ti dir mon dezagreman avek
TRNUC se ki i pa'n al ase lwen
in komans 77 an montan ziske
91, 93 mon krwar, e nou en
nasyon 250 an nou'n annan
lesklavaz e nou pa pe ganny en
rekey lansanm nou listwar
dan son antyerte.

Mon rapel sa zour ou, ou
ti dir mwan be anmenn en
Mosyon, nou, nou a anmenn
nou Mosyon ou anmenn pou
ou. Ofet Mr Speaker, mon pa'n
zanmen adres sa size e mon
pa'n zanmen reponn sa

kestyon, akòz mon annan lentansyon anmenn en Mosyon si dan- apre eleksyon mon parti i fer mwan sa loner pou retourn mwan koman en Manm proporsyonnel dan Lasanble mon pou anmennen en Mosyon lo sa size.

E en Mosyon senp ki nou ava annan en rekey, Moris in fer pou li i pou al ansanm son listwar depi komansman ziska finisyon e probableman i ava ganny fer par Liniversite Sesel e a rekomande ki a ganny fer par Liniversite Sesel dan plas bann dimoun ki bann non akademisyen.

Rezon akòz mon pa kapab fer li e menm dan prosen Lasanble mon pa pou kapab fer, li, mon pa kapab fer li tan ki *TRNUC* pa rezourd. Nou pa pou kapab abòrd sa size debòrd pli byen tan ki sa enn ki dan nou lanmen la nou pa pe rezourd. Tou sa bann 43 an ki zot in dir la.

Mr Speaker, i annan en dokiman mwan ki'n fasil mwan, mon lir *thèse* Mr Tisha Stravens, e son *thèse universitaire* i zisteman lo sa bann prose rekonsilyasyon. E i annan en konsepsyon ki i leve dan son *thèse* e sa i pa neseseman *about* Sesel sa, i en *university thesis*, be selman i annan en konsepsyon ki li i leve dan son *thèse "revictimizing victims"*. Mon santi ki Sesel nou'n fer sa.

Mon santi ki Sesel nou'n fer sa, mon santi ki Sesel nou'n re viktimiz bann viktim. *Genuinely* nou'n annan viktim. Sa prose *TRNUC* in montre nou ki nou annan viktim, nou'n ouver tou zot boubou nou'n tir plaster lo la, nou'n met ovif nou'n zwe ladan e nou ankor pe zwe ladan, ozòrdi la nou'n tandè kot pe zwe ladan, pas disel, vid vineg, nou re viktimiz bann viktim.

Be sa prose napa en *finish*, i napa en *finish*, i napa en *closure* i zis en boubou ouver koumsanmenm *TRNUC*, i pa pe al okenn par, i napa en direksyon, zis la, son vre term Kreol se kenkenken i pe flote dan en nean. E mwan, menm si sa zour ou ti dir mwan mon krwar ou ti senser ou ti dir mon anmenn mon Mosyon, mon pa kapab anmenn en Mosyon pou mwan al revwar sa lot bout ki *TRNUC* pa'n fer.

Akòz an fezan sa, mon osi la mon pou al bles sa bann dimoun ki deza ganny blese e ki pe ganny re ganny blese ankor a sak fwa ki zot, zot fer sa ki zot fer ozòrdi. Se pour se la ki mwan mon pou dir, mwan mon Mosyon in koz bokou lo dimoun, e zot in menm donn nou sa leson ozòrdi ki nou dimoun i nou pli gran patrimwann.

Bon, apre eleksyon le 28 Septanm letan Parti *United Seychelles* i antre o pouvwar

nou pou anmenn en *closure* avek sa dosye *TRNUC* enn fwa pour tou.

(APPLAUSE)

HON JOHAN LOZE

Mr Speaker, ou tande? Pe gwaye i pe riy for laba.

Mr Speaker, sa dosye i nou bezwen anmenn li a lafen. I pou bezwen annan en lafen, mon pa garanti ki pou annan satisfaksyon pou tou dimoun be *at least* i ava annan negosyasyon e medyasyon aköz la napa naryen i annan *foute rien*. Zot pa pe fer naryen pou person lo sa size apard asize donn bal lo sor sa bann dimoun.

E i kler ki zot pe fer, *TRNUC* i zot *top 10* sa i zot *best of*. Wi in ganny zot be eleksyon, zot pe sey reganny en dezyenm eleksyon ankore lo viktim sa menm group dimoun ki zot in abandonnen. Zot in ganny en eleksyon lo ledwa sa bann dimoun apre zot konpletman abandonn sa bann dimoun e la zot in tir menm granmofonn zot pe zwe menm rikord avek nou.

E nou annan lodas Mr Speaker, sa ki son tonton ti Minis la defans ek lapolis pandan sa bann letan i vin montre ledwa anba nennen son prosen ki ti napa naryen a fer direkteman avek sa bann

keksoz. Ou prop tonton, ou vini ou vin pas ledwa anba nou nennen, be kwa sa? Aköz? I pa ti neser. Mon krwar kantite nou pa'n konpran.

E la Mr Speaker, mon oule remersi tou Manm ki'n koz lo sa Mosyon, tou Manm, *LDS* koman *United Seychelles*, mon remersi zot pou zot partisipasyon. Mon remersi zot ki zot in fer loner Mosyon e zot i koz lo la dan fason ki zot in koze.

Aküz kontrerman avek sa ki Onorab Georges pe dir nou la anndan pou nou fer politik, zot in fer politik mon rekonnet, mon aksepte aköz nou la pou fer sa. Be Mr Speaker, letan nou ka lo politik i annan en term Angle ki apel *the body politic*. *The body politic* si ou rod son definisyon se tou pep en nasyon son gouvrenans koman en kolektivite i form *the body politic*.

Politik, se nou tou a lafen dizour. E Mosyon lafason ki mon'n anmenn li in anglobaliz nou pep, nou nasyon, mon krwar i annan pa'n ekout mwan bomaten parske i annan in vini in dir koumsa poudir; -

“zot fer krwar poudir zot Gouvrenman ki ti pe donn lakaz” lot in vini in dir “tou Gouvrenman ki vini pou donn lakaz pa zis zot Gouvrenman ki pou donn lakaz” mon pa ti dir Gouvrenman mwan. Enn

in vini in dir “sa ladministrasyon avan in donn” mon pa dir sa mwan.

Mr Speaker, mon konnen ou'n ekout mwan atantivman ler mon'n koze taler, mon'n dir koumsa poudir sosyete Seselwa Lepep Seselwa in deside fer li koumsa, se sa ki mon ti dir, zot i pran tou sa ki mon'n dir koman mon pe fer politik e zot pa'n ekout mwan zot.

Mon pa'n dir Gouvernman US ti donn lakaz mwan, mon dir ki sa sosyete, sa pep nou'n fer li koumsa pandan plizyer lannen nou'n donn *subsidized housing* e nou'n aksepte li nou patrimwann aprezan.

Be mon pou *advise*, personnelman mon pou *advise* bann dimoun ki'n ganny *social housing* anba Gouvernman LDS ki in gannyen, in fini antre e i pe reste ladan, al dan lakaz ki US ti fer, get grander apre get pou zot, get grander lasanm apre get pou zot e zot a konpran.

Subsidy in redwir, gander lakaz in redwir, i annan en lerozyon dan lekspektasyon. Mon ganny dir, nou ganny dir poudir, nou'n ganny dir poudir sa zenn ki mon ti pe koz lo la Perseverance in nobou pran son *loan*, ganny son loto parey- Mr Speaker, lavi in dir la deor, sa zenn ki nou pe dir

in pran son *loan*, lavi i dir pou li, lavi i *tough* pou nou pep.

Quality of life sa Seselwa ordiner in degrade, i pa parey, menm si nou pou dir zot Gouvernman i isi, zot Gouvernman i laba. Sa *blitz* ki zot pe dir la, mwan mon apel sa debout lo peron, koz ek dimoun fer en konversasyon, be mwan sa debout lo peron la, dimoun lavi i *tough* pou zot, lavi i dir pou sa Seselwa.

E napa enn zot ler zot koze ki reflekte sa, be selman ou konnen ki mon'n kontan ozordi Mr Speaker, finalman apre ki zot in dir kof i vid, zot in dir kales kase, zot in dir donn bal dan sa gro Bidze, ou konnen ki arive ozordi?

Onorab Sandy Arissol en Manm ki mon respe bokou, i vini i dir nou koumsa “re stabiliz pei kont COVID”, i vire i konfirman, enstabilite e pandemik enternasyonal, ti napa COVID, ti napa kales kase ti annan COVID. COVID ki ti nou problem.

Be zot in koz mansonz pandan 4an edmi ek sa pep la ozordi laverite i sape, finalman a mon'n fer en bon keksoz mon anmenn en Mosyon ki laverite in kapab sape dan labous Onorab Sandy Arissol ki'n dir nou laverite ki ti problem. Ler ki zot Prezidan ti vin dir nou kales kase, COVID.

E mwan mon konpran ki ti arive mwan Prezidan ti pe zis

panik li, i ti'n panik pa konnen, pa konpran ki manner pou zer pei. Prezan in tay devan nennen ouver in dir nou kof i vid, *COVID*, kales kase, in erit en kales kase.

Mr Speaker, i annan depi 2001, nou pei ti annan sityasyon *foreign exchange* kot nou ti bezwen lenvestisman etranzer; 2008 nou ti antre dan en program makroekonomik e letan ou'n get sa bann peryod 2001, 2008 e 2001 an montan 2008 li menm nou'n annan en pe sa ki ou kapab dir bann zesyon ekonomik dirzans, nou ti bezwen bann lenvestisman, nou ti bezwen.

Be lekonomi in stabilize li apre, lekonomi in stabilize. Mwan ki mon ti pe dir mon, annou annan en konsiderasyon ki nou pa toultan dan zesyon lekonomi dirzans. Annou pa kontinyen kot nou bezwen lev en keksoz vann pou nou ganny en larzan.

Mr Speaker, Onorab Flory Larue i annan en parol i ti kontan dir li, “*IDC* avek tou son bann *Green* piti” be *IDC* avek son bann *green* piti zot in aprann fer tou sa bann 5 zetwal, Mr Savy ti dir nou dan son *interview* lotrozour ki *IDC* i en *development company*.

Be annou propoz en model Mr Speaker, nou bann zil ki reste nou, bann ki reste

la, dan plas en lenvestiser i vini, aköz *green* piti pa rod son lenvestisman, Finans dir *ICC* ki sa lot *Green* piti e zot *build* lo zot zil. Kre zot lakonpannyen, devlopman, zot *development company*, *build* zot lotel, fer menm model ki sa bann Arab pe fer, sa bann envestiser pe fer.

Rod en *management company* anmennen, sa lakonpannyen ki *own* sa lotel ki zot ki pou apel pou zot *IDC* ouswa pou *Green* piti i a pey *lease*, sa *hotel management company* i a pey *IDC* e son *owning company* son bann *shares*. *IDC* i a pey Gouvernman son *dividends*.

Nou nepli dan *emergency economic management*, nou stab, Onorab Sandy Arissol in dir nou stab. E sa ki mon pe dir la, i pa en keksoz ki mon pe koz kont *LDS*, i en nouvo direksyon ki nou devret pe pran dan plas konsider vann *assets*, nou fer nou devlopman, ki a vin pou nou.

Annou kontinyen avek sa model ki pous li ziske nou a kapab kolekte en groser poursantaz Bidze atraver nou bann lenvestisman kot evantyeleman sa pei letan taler nou ti pe dir zot annou pans pou 15 an, pans pou 30 an. Evantyeleman sa pei nou a kapab dir nou pe desann lo en *flat tax rate* pou nou biznes kot i ava kre sa klima pou donn en

logmantasyon pou travayer dan Sekter Prive.

Annou- nou pe mazin zis en fason la, mon krwar nou mazin fer zis sa ki tro fasil, nou pe annan en mantalite larivyer sivre kolin. Kwa ki anpes nou vin avek en nouvo model, en lot direksyon?

Be si pe anpes zot, zot pe ale zot, *LDS* pe ale, zot bezwen ale, napa swa zot pe ale, Seselwa pe al fout zot a laport. Senpleman aköz napa Seselwa ozordi ki son lavi i pli byen ki i ti ete ki an 2019. 2020 nou konnen ti annan *COVID*, napa seselwa ozordi ki kapab dir ou son lavi in *improve*, in meyer dan en fason signifinan konpare avek 2019.

E sa ta mansonz ki'n swiv, ozordi mon'n donn zot legzanp kot Onorab Sandy Arissol in demanti mansonz ki zon prop Prezidan in koze, son Minis Finans in koze, li ki'n met keksoz azour pou nou.

Be, ozordi nou pe viv dan sa monn Onorab Aglae taler in koz lo sa revolisyen ki pe pase Lafrik, e mon war en kantite Seselwa pe admir Prezidan Ibrahim Traoré, pe admir bann lezot revolisyoner Lafrik.

Be mon get sa bann dimoun lo kontinan bann keksoz ki Seselwa pe admire, be Prezidan Traoré pe donn son sitwayen ledikasyon iniversel, i pe donn zot lasante iniversel, i pe donn zot lozman

adekwa, en keksoz ki nou sosyete in fini fer. Nou'n fer, e parey Onorab Arissol pe dir nou'n stab lo la.

Ou vwar? Apre zot a vini zot a dir nou nenport ki Gouvernman ti pou fer. Be, lontan nou pe fer, lontan nou pe fer Mr Speaker. Mr Speaker, mwan personnelman poudir avek Onorab Georges mon'n napa okenn move lentansyon, mon ti dir boner mon'n anvi sisit en deba, mon'n anvi bann zenn Seselwa koze, diskite.

E enn bann rezon Mr Speaker, mon konnen ou pou agree avek mwan, se apre ki nou, nou'n fini fer sa ki nou'n fer la anndan, e nou, nou fer sa ki nou fer la anndan nou, e sa i parfetman normal aköz nou politisyen nou la nou fer politik.

Nou bezwen en lot keksoz pli gran ki nou ki reini nou pep, nou pep i bezwen en *stronger calling* ki sa ki nou, nou fer la anndan. Sa sarmaye, sa ise, bouse. E letan taler mon'n dir zot poudir *the body politic* i en kolektiv lansanm tou nou pep, be i bezwen annan bann lezot lavwa, bann lezot direksyon, i bezwen annan bann keksoz ki enspir nou pep par lao sa ki politisyen pe dir.

Aküz Mr Speaker, politisyen nou koz en ta zafer nou, zot in dir taler poudir nou

nou'n komans fer politik zot, zot in bezwen reponn, be lekel ki'n nonm Dr Herminie la anndan? Mon pe sey konpran aköz ki Dr Herminie i en dimoun ki pa en Manm Lasanble Nasyonal in ganny entrodwir dan deba Lasanble Nasyonal.

E apre nou dir mon koz ek Dr Herminie wi, ou'n koze ou'n plenneyen. Ou'n plenney ou sor, ler ou ti pe ganny bate laba, ou'n taye ou'n *call* li, ou'n gel ek li ou'n plenney avek li, la mon dir ozordi, la mon dir e fodre zot konnen sa laba lot kote.

Konbyen fwa ou'n asize ou'n *call* Dr Herminie dir Minis Hassan, *call* Minis Hassan dir li tir son rikord telefonn laba kot *Cable* montre zot, konbyen fwa ou'n *call* Dr Herminie pou ou gele, plenneyen. Zot pe bat ou laba lot kote, ou war?

Prezan ou a dir wi, mon'n koz ek Dokter, be akfer ou'n entrodwir non sa zonm dan sa deba, kan ou fatigue plenney avek li? Ou fatigue plenney ek li, prezan ou a vini ou a vin soz son non devan Lasanble, be ki kalite politik sa Mr Speaker, akfer ti nesaser?

I pa ti nesaser sa, ou konnen ou annan ou febles ou annan ou defo reste ou trankil. Tou fason ou pe ale ou osi, zot tou laba zot pe ale, Seselwa in fatigue avek zot. E rezon ki zot pe ale, zot pa oule konpran sor

sa pep. Sak fwa pou koz zot lo bezwen sa pep, zot koz donn bal, tandè Mr Speaker, gete lekel ki pe kriy baybay laba, aprann lir avek papiyon.

Mr Speaker, sak fwa pou koz ek zot lo sor sa pep zot dir ou donn bal, soutir dimoun asize dan distrik vey zaksyon, soutir dimoun pa travay. La enn taler i dir *URS* ti netway kot *bin site* e i dir mwan ki ti dir, i dir mwan ki ti dir.

URS, ti bann *field technicians*, e wi sa bann salte dan distrik ti napa distrik ti prop, *bin site* i ganny netwaye par kontrakter anba *LWMA*, ou en *MNA* elekte pou Grand Anse Praslin ou pa fout konnen ki mannyer *bin site* i netwaye dan ou distrik?

Be konmsi ki ou foute dan sa distrik? Ni *bin site* mannyer i netwaye ou pa konnen. Kontrakter *LWMA* ki netway *bin site* silvouple Onorab, *URS* ti bann *field technicians* e zot ti a netwaye la o bor *District Administration* Au Cap ki reste sal, obor *District Administration* Au Cap i reste sal. E zot pa kapab fer naryen.

Mr Speaker, i annan serten keksoz nou bezwen konpran, vwar dan politik, nou pa kapab fors dimoun siny let *resignation* premye zour ki zot antre. Sanmenm sa ki nou ganny en blok 30 ekek *yes men* dan en Lasanble

Nasyonal ki zis *rubberstamp* tou keksoz.

Sa let *resignation* ki zot tou zot in sinyen premye zour ki zot in antre la i fors zot dir wi pou tou keksoz ki vin la devan, sa let *resignation* ki pou fors zot ale.

Akoz ozordi la Sesel, sa ki'n lager pou LDS pou met LDS la i ganny koudpye i ganny fer ale, sa ki'n lager kont LDS, maltret LDS i pe asiz lo tronn dan milye zot, i ganny *pride of place*, li ki pe diriz zot ki pou fer ki pou dir dan sa Lasanble e i pe ganny *groomed* pou vin *Leader* Biznes Gouvernman kantmenm Mr Georges in fer nou krwar i pe retournen.

I pe ansarz zot, sa ki'n pli hay zot, pli maltret zot ozordi pe dir zot ki pou fer. Sa bann rezon ki Seselwa pe al fout zot deor. Mr Speaker, ler ou pran sa ki'n senser avek ou, ou zete, ou anmas sa ki'n koudpye ou, ou met asize drwat dan milye ou salon, la kot ou problem i komanse.

Mon Mosyon, mon Mosyon in vin avek - (zot be aprann koze, aprann lir avan ou asize pou kriye Onorab) Mr Speaker, ou war Onorab Porice ni koze i pa konnen, i oule zis kriye.

Mr Speaker, mon Mosyon in vin avek tout senserite, in vin avek tout lonnekte e in pran direksyon ki in pran, nou

tou nou bezwen asim responsabilite pou sa ki nou tou nou'n fer. E rezilta sa bann keksoz ki nou pe war isi anndan sanmenm sa ki pe fer LDS glise net, disparet. Mersi Mr Speaker.

MR DEPUTY SPEAKER

Mersi Onorab. Donk, in ariv ler aprezan pou nou pran vot lo Mosyon ki devan nou pou sa apre midi. E mon a rezis lir Mosyon ki pe demande avan ki nou pran vot; -

“Lasanble Nasyonal Sesel, pe demande ki Gouvernman aktyel, ensi ki tou lezot Gouvernman dan le fitir, i travay avek lonnekte, senserite e lentegrite pou sofgard e protez patrimwann Sesel dan son antyerte pour benefis nou bann fitir zenerasyon”. Mosyon dan non Onorab Johan Loze.

Mon ava demann tou bann Manm ki an faver pou endike silvouple. Mersi. Okenn Manm ki kont? Mersi. Mersi Madanm Clerk. Donk, Mosyon ki mon fek lir, rezilta vot i koumsa; - i annan 8 Manm ki'n vot an faver, i annan 20 Manm ki'n vot kont, napa personn ki'n *abstain*. Donk sa Mosyon i pa'n pase aköz 20 Manm in vot kont. Mersi.

Sa in anmenn nou lafen nou travay pou sa Merkredi. Mon ava remersi tou bann

Manm pou zot partisipasyon.
Lasanble pou repran travay
Mardi 9er bomaten. Donk, nou
ava dir zot mersi bokou e bon
rantre tou dimoun.

(ADJOURNMENT)